


VISION YA PATMOS

 . . .mutindu Mpangi Neville vwandaka pesa bansamununu yango ti...Mpangi Moore vwandaka tuba kilumbu yankaka yina, na kuzonzilaka na Mpeve ya Mfumu, yina kwizaka na kati...kotaka na kivinga. Yandi tubaka, “Ya kumaka mbote mingi na kati kuna ti mu banzaka Enlevement kusalamaka tii ntangu mu talaka na kizunga, mu monaka bayankaka ya kuvwanda awa,” mu tubaka, “ve, ya me salama ntete ve, samu ti kana—kana bawu kele dyaka awa na yina mu zaba ti mu kele dyaka awa.” Na yawu bantangu yankaka Mpeve ya Mfumu ke pesaka beto mbote yango.

² Beto kele na kyese mingi na kuzwa bankundi mingi yina beto ke mona na kivinga. Bawu kele mingi na kumeka na kutanga. Mu vwandaka me tala kaka, kukota na mwelo, Mpangi Carpenter, bakala yina kwelisaka munu mpe kento ya munu. Mpangi Carpenter, yandi me vwanda lusakumunu ya nene samu na beto awa na dibuundu, mpe me vwanda lusakumunu samu na beto na mutindu ya kisalu ya kulonga, mpe ke longaka nyonso, bisika nyonso. Mpe beto kele na kyese na kuzwa yandi na kati awa, oh, mingi ya bayankaka dyaka.

³ Ntangu yayi ya kele na kyuvu yankaka awa yina pesamaka na munu mazono na nkokila:

Mpangi Branham, bamwense tanu ya bazoba na Matthieu 25 kele ya kutanga na bayina ke bikana ya Bantu ya makanda? Mu bakulaka ti bamwense tanu ya bazoba vwandaka ya kuvuluka kasi fwana lutila na ntangu ya nene ya lukwamusu. Yayi kele kieleka? Kana ya kele mutindu yina, yinki ke vwanda kisika ya bawu ya nsuka? Bawu lendaka vwanda mameme yina kele ya kukabuka na bangombe na Matthieu 25:33 mpe 34?

⁴ Kieleka théologien ya mbote landila na yina mu..... [Kisika ya mpamba na bande—Mu.] . . .beno banza mpe na yawu, ti bawu kele bayina bikanaka, bamwense ya kulala kele bayina ke bikana yina zonzilaka Apocalypse; ya nkuna ya kento yina zitisaka balutumu ya Nzambi mpe kele na kimbangi ya Yesu Klisto. Kento ke baka kitini ya lele mpe ke tula yawu kuna; mbote, awa, ya kele yina yandi ke na kuzengaka ya yandi . . . to ke baka modele ya yandi mpe ke tula kisika nyonso yandi ke zola, landila mutindu yandi ke zenga yawu. Mpe na manima yina yandi ke bika ba ke bokilaka yawu kitende, kasi yandi me soola na kuzenga yawu na kisika mosi landila kipwanza ya kubanza ya yandi mosi. Kasi yina me bikana ba ke bokilaka yawu kitende.

⁵ Ntangu yayi, kana beno ke tala, ya vwandaka na tanu ya bamwense ya bazoba mpe tanu ya mayela; bawu nyonso

vwandaka bamwense, vwandaka ya kusala na kima mosi. Kasi, na nzila ya nsodolo, Nzambi soolaka Kento ya Yandi ya makwela na nzila ya nsodolo ntete mbandukulu ya yinza, tulaka bankumbu ya bawu na zulu ya Buku ya Luzingu ya Mwana-dimeme yina kufwaka ntete mbandukulu ya yinza; ntete yinza kubanda, Nzambi na dibanza ya Yandi, vwandaka ya kukondwa nsuka.

⁶ Mpe beto ke sadilaka bantangu yankaka mpova, ya kele “predestination,” kasi ya kele kieleka kima ya kusimbila na nsungi ya dibuundu yayi na yina beto ke na kuzingila. Ya vwandaka kieleka kima ya nene yina ba vwandaka sadila na bilumbu ya bambangi, samu ti kieleka bawu vwandaka kwikila yawu. Kasi bawu me kwenda ntama na Yawu ntangu yayi, samu na mabanza ya kukangama na misiku, na malongi ya kukangama na misiku na dibuundu yina me katuka . . . Yina vwandaka kima ya mbote, samu ti bawu nyonso kumaka Calviniste na Angleterre tii bawu kuzwaka dyaka mpe ve ba-réveil, mpe John Wesley kwizaka kulonga malongi ya Arminien yina tulaka yawu kitezo mosi. Nzambi ntangu nyonso ke tula yawu kitezo mosi.

⁷ Na yawu kuna bamwense ya bazoba vwandaka bayina vwandaka ve na mafuta na minda ya bawu, bayina mu ke kwikila ti ba losaka na ngaanda na mpimpa kisika ya ke vwanda na kudila, manyongo, mpe kukwetisa meno. Mpe kana beno ke fwanikisa yawu, to banote ya beno, ya ke vutula dyaka kaka beno mbala mosi na lukwamusu ya nene. Mpe mu ke banza ti ba kele bayina ke bikana mpe ke lutila na lukwamusu ya nene. Mpe kieleka ya kele leso kuna, kana beto vwandaka na ntangu ya kukota na yawu. Kana beno . . .

⁸ Ntangu yayi, beno bambuka moyo, mu vwandaka me tuba na ntete, kisika ntangu beno ke kuwa babande, “Bima yayi kele kaka landila mutindu mu ke kwikila ti yawu kele kieleka.” Beno me mona? Ntangu yayi, kana ya kele foti, mu ve—mu zaba ve ti ya kele. Mu . . . Mpe mu lenda tuba kaka yina mu ke kwikila. Mpe mu ke sosa ve kunyongisa bakuwa ya muntu mosi. Beto fwana tula kaka yawu na lweka ntangu beto ke kota, mpe na manima kubaka kima yina ba me tuba, mpe kufyongonina yawu, mpe kumona kana ya kele kieleka Masonuku to ve. Beno tala mutindu ya mbote ya kusala yawu. Na yina . . . Samu na kilumbu mutindu beto ke na kuzingila ntangu yayi, na yinsi kisika ba me lokotaka mbala mpe mbala mpe mbala mpe mbala na mitindu nyonso bima, mbote, ya kele mpasi na kuzwa bantu kaka yina ke baka kieleka yawu, mutindu ya kele na kizunga ya mwense. Beno tuba na bawu, bawu ke kwikila yawu, ya kele mutindu yawu ke kwendaka na ntwala.

⁹ Kasi, ntangu yayi, mosi ke kwiza na dibanza *yayi*, mpe mosi ke kwiza na dibanza *yayi*, mpe beto kele na pene bankama yivwa mpe kima ya mabuundu ya ba-dénomination ya kuswaswana, mpe mosi na mosi kele ya kuswaswana (na malongi ya yandi)

na yankaka; mpe ya fwana vwanda na muntu mosi na foti, mpe muntu mosi na kieleka. Na yawu ntangu yayi kidimbu kaka ya yawu kele, kele kuvutula yawu na Biblia; beno me mona, beno bika Biblia. Ntangu yayi, bambala mingi, bantu ke tulaka ntendulu ya bawu mosi. Kasi beto ke meka nyonso ya mbote yina beto lenda, samu na kutula ve ntendulu mosi ya muntu na yawu. Beno tanga kaka Yawu mutindu Yawu kele, mpe beno tuba, “Beni tala mutindu Yawu kele.”

¹⁰ Mpe na yina mu me talaka ntangu nyonso, kana beno ke baka kaka yina Yandi tubaka, ya ke sala kaka nyonso kuvukana kieleka kaka na Masonuku. Ya kele kaka mutindu kutula puzzle kintwadi, beno fwana tala na modele ntete beno kuzwa puzzle kintwadi kieleka. Kana ve, mu ke tubaka ntangu nyonso, “Beni ke kuzwa . . . Na kizizi ya beno, beno ke kuzwa ngombe ya kento yina ke na kudya matiti na zulu ya yinti.” Na yawu ya—ya ke talana kaka mbote ve.

¹¹ Mpe kana beto bika kaka Mpeve-Santu . . . Nani sonikaka Biblia? Mpeve-Santu salaka na bantu mpe sonikaka Biblia. Na yina kukondwa Mpeve-Santu, ata mutindu beno kele ya kulonguka, ata mbala mosi ve beno ke bakula Yawu. Samu ti mpe Yesu tondaka Nzambi na yina Yandi bumbaka Yawu na meso ya bantu ya ndwenga mpe ya mayela, mpe me monisa Yawu na bana yina zola longuka. Mpe pene-pene ya bilandi nyonso vwandaka bantu yina zabaka ve kutanga mpe kusonika mpe bantu yina longukaka ve kukatula mosi, mpe ya vwandaka Paul. Mpe Paul ke tuba ti yandi zolaka zimbisa nyonso yina yandi zabaka samu na kumona Klisto. Na yawu yandi tubaka na dibuundu ya Corinthe, ti yandi “kwizaka ve na ndwenga ya bantu mpe mutindu ya kuzonza ya nene,” samu ti kuna lukwikilu ya bawu—ya bawu zolaka vwanda na ndwenga ya bantu, kasi yandi kwizaka na bawu na ngolo mpe kumonisama ya Mpeve-Santu, ti lukwikilu ya bawu zolaka pema na zulu ya bisalu ya Mpeve-Santu landila Ndinga ya Nzambi. Mpe ya kele kisika beto zola kukangama mbote, ntangu kaka yayi, samu ti ntete sabala kumanisa, to ntangu sabala ke manisa, beno ke mona yawu, yina kieleka kele yina ya vwandaka, singa ya fyoti yayi yina ke na kutambula nzila nyonso ya bansungi.

¹² Matondo na yina beno me tula tablo fyoti na zulu mingi. Ya ke talana mbote mingi.

¹³ Ntangu yayi, oh, beto . . . Mu ke zola kana beto ke kuzwa kaka yawu hiver nyonso, na yawu beto zolaka baka kaka Buku nyonso ya Apocalypse mpe kukota kaka na Yawu. Ya kele na malongi mosi ya kitoko na kati kuna. Mpe mu ke bambuka moyo, mu banza ya me kuma bamvula makumi zole me luta to makumi zole na tanu, ntangu dibuundu vwandaka ntete malumalu, beto bandaka mbala mosi . . . na ntonono ya automne, mpe nzila nyonso pene ya automne yina landaka, na kulongukaka Buku ya Apocalypse.

¹⁴ Ntangu yayi, mu ke bambuka moyo na kubakaka Buku ya Job. Oh, Mpangi Wright! Mu vwandaka bilumbu mingi na zulu ya yawu ti na nsuka kento mosi sonikaka mpe yufulaka munu, yandi tubaka, “Mpangi Branham, nge ke katula dyaka ve Job na kikunku yango ya bombi?” Mbote, mu vwandaka meka na kusala kima mosi, samu ti kaka kuna kele kisika nyonso vukanaka, na kisika yina; tii na kisika na kisika ya kele na kisika Mpeve ya Mfumu kwizaka na zulu ya yandi, na yina ntangu lusyemo bandaka na nsemo mpe bidumu me duma, Mpeve kwizaka na zulu ya profete mpe yandi monaka nkwizulu ya Mfumu. Mpe mu vwandaka zola kunata yawu kati mingi, ya kele samu na yina mu bikaka yandi na kinkunku ya bombi bilumbu mingi, samu—samu beto kuma na kima mosi. Mpe mu zaba ya lendaka lembisa fyoti, bantangu yankaka. Mu ke dasukaka, mpe, ntangu mu ke kuwaka muntu kubaluka na kizunga ya kima mosi, na kisika ya kukwenda mpe kukota na dyambu. Kasi ya lendaka vwanda ti Nzambi ke na kutwadisaka muntu yango mutindu yina samu na lukanu mosi.

¹⁵ Ntangu yayi beto vutuka na yina bikanaka yayi, ntete beto bika kyuvu. Mu banza ti mu me lakisa yawu pwelele. Yayi. . . Kieleka mu ke kwikila ti yina bikanaka kele ya kusoola na Nzambi. Mu—mu ke kwikila yawu, ti Nzambi soolaka yina bikanaka ntete mbandukulu ya yinza; mpe yina na “luzabu” ya Yandi. Mpova ve. . . Ntangu yayi beno tala mbote mpova *luzabu ya mantwala*, beno me mona, samu ti ya kele mpova mosi yina ke tsokotaka fyoti na kati-kati ya bantu. Beno me mona? Kasi Nzambi, ntete mbandukulu ya yinza, na dibanza ya Yandi ya nene ya kukondwa nsuka, soololaka Dibuundu, soolaka Yesu, soolaka Dibuundu, mpe zolaka tuba na ntwala na mbandukulu yinki ya zolaka vwanda na nsuka. Yandi. . . Kana Yandi kele ya kukondwa nsuka, ya kele ve na kima yina Yandi zaba ve. Yandi zabaka konso sidi zolaka vwanda ntete na zulu ya ntoto, mpe bambala yikwa ya ke kanga meso ya yawu. Ntangu yayi, ya kele kaka mutindu. . . mpe mutindu ya mbwiki ya ke sala, mpe lutangu bawu nyonso ke sala kintwadi. Beno tala kukondwa nsuka, ya kele kukondwa nsuka; beno—beno. . . mutindu kele kaka ve samu na kubangula Yawu. Mpe Nzambi, ya kele yina Yandi kele, Nzambi ya kukondwa nsuka.

¹⁶ Na yawu, kana beno tala, Biblia ke tuba ti na bilumbu ya nsuka ti mbeni ya Klisto ti ke kwiza na zulu ya ntoto. . .

¹⁷ Ntangu yayi beno kuwa mbote! Ya kele kaka kifu yina kele. . . Mu banza ti yandi lenda tala mafuku na munu. Kasi na Mpangi ya beto ya ntalu ya bakala Billy Graham, kilumbu yankaka yina, dilongi ya mbote yina yandi longaka Lumingu me luta, mpe kieleka mu banza ti ya vwandaka nsangu ya ntangu. Mpe. . . kasi yandi tubaka ti “Satana ke na kuvunaka mpe Misolami.”

¹⁸ Ve, Biblia ke tuba, “Yandi ke vuna Misolami *kana* ya lendaka salama.” Kasi ya lendaka salama ve, samu ti Nzambi soolaka bawu ntete mbandukulu ya yinza. Beno me mona? Mwana- dimeme . . . Yesu Klisto vwandaka Mwana-dimeme yina ba kufwaka ntete mbandukulu ya yinza. Mpe ntangu Nzambi ke tula dibanza ya Yandi, ntangu Yandi ke zonza Dyambu yina, Yawu lendaka soba ata fyoti ve, Yawu lendaka soba ata fyoti ve. Beno me mona, samu ti Yandi—Yandi kele—Yandi kele ya kukondwa nsuka, mpe Bandinga ya Yandi ke salama.

¹⁹ Beno banza kaka, ya kieleka . . . ntoto yina beto kele ya kuvwandila na nkokila yayi kele Ndinga ya Nzambi yina me talana. Ba salaka yinza kintwadi na bima yina ke monikaka mpe ve. Yandi tubaka kaka, “Ti ya vwanda,” mpe ya vwandaka. Wapi mutindu mpasi ve ya kele samu na Nzambi na kubelusa nzutu ya kubela kuna, kana Yandi lenda tunga ndigikulu na kuzonzaka kaka yawu. Beno me mona, Ndinga ya Yandi. Kana beto lendaka kaka kuzwa lukwikilu ya kumona yina Ndinga ya Yandi kele! Beto kele mingi ya kukangama na ntoto mpe mingi ya kuvukana na dibanza ya beto ti beto . . . Oh, mu zaba ve. Ba me tsokota beto malongi mingi, ntunga ya yandi yayi, mpe ntunga ya yandi yina, mpe—mpe ya me kumisa kaka beto na kisika yawu me kuma nyonso poto-poto. Kasi kana beno lenda ningisa kima ya muvimba kukangula, kuvutuka na kuzaba ti Yandi kele Nzambi, mpe Bandinga ya Yandi lenda dyaka ve kubwa mutindu Yandi lenda kubwa ve. Mpe kana Ndinga yango kubwa, kuna Nzambi me kubwa; mpe kana Nzambi kubwa kuna . . . Yandi kele Nzambi ve. Beno me mona? Na yawu . . . Mpe beno bambuka moyo, Yandi lenda tuba ve kima mosi *awa* mpe kima yankaka lweka *awa*; Yandi fwana vwanda na lukanu ya Yandi ya ntete samu na kuvwanda Nzambi. Na yawu, beto fwana kaka vwan- . . .

²⁰ Mpe Yandi ke lomba kaka beto kima mosi, na kukwikila na yina Yandi tubaka kele Kieleka, mpe Yandi ke sala yawu. Oh, mutindu ya kele kitoko! Beno ke zola kima ke salama yawu mosi; bantangu yankaka ya ke lomba kaka mwa lukwikilu ya fyoti. Ya ke sala ve kimangu, kasi kana beno ke kangama na yawu, ya ke basisa beno; beno vwanda kaka na yawu. Mutindu Yandi tubaka, “Nkuna ya mutarde, ya kulutula fyoti na kati ya bankuna nyonso.” Kasi beno talaka ntete, mutarde lenda vukana ve na kima yankaka. Beno lenda vukisa ve mutarde na kima yankaka, ya ke vukana ve. Mpe kana beno kele na lukwikilu, kaka mwa fyoti ya lukwikilu yina ke vukana ve na kukondwa lukwikilu nyonso to nsambulu to dogme nyonso, beno vwanda kaka na Nzambi, beno vwanda kaka na Yawu, Yawu ke lutisa kaka beno na dibungi, ke basisa kaka beno. Yinga! Beno vwanda kaka na lukwikilu yina.

²¹ Ntangu yayi, na mbandukulu, ntangu Nzambi . . . Biblia ke tuba, na Apocalypse, ti “Mbeni ya Klisto, na bilumbu ya nsuka . . .” Ntangu yayi beno tala mabuundu nyonso yayi

kuvukana kintwadi. “Mbeni ya Klisto, na bilumbu ya nsuka, ke vuna bayina nyonso vwandaka na zulu ya ntoto bayina bankumbu kele ve ya kusonama na Buku ya Luzingu ya Mwana-dimeme tuka mbandukulu ya yinza.” Wapi ntangu nkumbu ya beno kutulamaka na Buku ya Luzingu? Ntete beto kuzwa ntete yinza, ba soolaka beno na kuzwa Mpeve-Santu na nsungi yayi.

22 Mu ke vukana na Eddie Perronet:

Mu me kanga moyo ya munu na kiswamunu ya
kupema,
Samu na kunata dyaka ve maswa na mubu ya
kudasuka;
Kitembo lendaka komba mabulu, na ngolo na
mudindú,
Kasi na Yesu beto kele ntangu nyonso na
nkebolo.

23 Ya kele ve na kima mosi lenda kabula beto (Nzambi lenda ve. . . kuvutuka ve na Ndinga ya Yandi. Mpe kana Yandi kele ya kukondwa nsuka, mpe ke pesa beno Mpeve-Santu *awa*, na kuzabaka ti Yandi ke zimbisa beno *awa*, wapi mutindu ya mumbungu Yandi ke na kusala?), kana beno kele ve ya kuvuna na nzingulu ya beno, kana beno kele na Mpeve-Santu. Kasi beno tala mbote yina Biblia ke tuba, Éphésiens 4:30, “Benoni yongisa ve Mpeve-Santu ya Nzambi, na yina na beno kutulamaka kidimbu tii kilumbu ya mpulusu. . . ” Réveil yina ke landa? Ya ke wakana mbote? “Benoni kutulamaka kidimbu tii kilumbu ya beno ya mpulusu!” Bilumbu yikwa? Tii kilumbu ya beno ya mpulusu.

24 Benoni baka wagon, benoni fulusa yawu na zulu ya mulayi, mpe na yina ya kele ya kifuluka mbote. . . Ntangu yayi, ba lenda kanga ntete ve yawu, mfumu ya kutala fwana kwiza. Mpe yandi ke tala, mpe ke mona kana kima mosi ya kukangama ve yina ke ningana. Wagon lendaka vwanda. . . Wagon lendaka vwanda ya kifuluka mbote, kasi kana ya kele na bisika ya kukangama ve na kati ya yawu, benoni fwana kanga dyaka yawu. Mpe ya kele yina kele dyambu, mingi ya beto ke kuzwaka ve Mpeve-Santu; ntangu muntu ke talaka ke kwiza, Yandi ke tala bisika mingi ya kukangama ve, benoni me mona, na yawu Yandi ke tula yawu ntete ve kidimbu.

25 Muntu mosi ya théologie ya nene kwizaka na munu kilumbu yankaka yina, to kilumbu yankaka yina ve, ya me kuma bamvula tatu to yiya, mpe yandi tubaka, “Mu zola kuyufula nge kima mosi.” Yandi tubaka, “Abraham kwikilaka Nzambi, mpe ya tulamaka ve na yandi samu na ludedomo.”

Mu tubaka, “Ya kele kaka, kieleka.”

Yandi tubaka, “Yinki dyaka muntu lenda sala kasi kukwikila?”

Mu tubaka, “Ya kele nyonso yina yandi lendaka sala.”

26 Yandi tubaka, “Na yina wapi kisika beno ke kwenda na dyambu ya Mpeve-Santu yayi na ngaanda ya yawu?” Ntangu yayi, beno zaba yandi vwandaka Baptiste. Mpe yandi tubaka—yandi tubaka, “Wapi kisika nge ke kwenda na Mpeve-Santu yayi?” Yandi tubaka, “Kana muntu ke kwikila! Minuti beno ke kwikila, beno me kuzwa Mpeve-Santu.”

Mu tubaka, “Ve, ve. Ntangu yayi, nge—nge ke na kunata ntembe na Masonuku, Masonuku ke swaswanaka Yawu mosi ve. Beno me mona? Paul yufulaka bawu, ‘Beno kuzwaka Mpeve-Santu *tuka* beno kwikilaka?’”

Mpe yandi tubaka, “Mbote. . .”

27 Mu tubaka, “Ya kele kieleka ti Abraham tata ya lukwikilu pesaka. . . yandi vwandaka na nsilulu ya Nzambi mpe kwikilaka Nzambi, mpe ya tulamaka ve na yandi samu na ludedomo, kasi Yandi pesaka yandi kidimbu ya nzengolo mutindu kidimbu ti Yandi kuzwaka lukwikilu ya yandi.”

28 Ntangu yayi, kana ata mbala mosi ve Yandi me tulaka beno ntete kidimbu ya Mpeve-Santu, ata mbala mosi ve ti Yandi me kuzwaka ntete lukwikilu ya beno kati ya Yandi, beno kele na mwa bisika ya kukangama ve. Beno me mona? Beno lendaka kwikila, yinga, kasi ya kele na bisika mingi ya kukangama ve. Kasi ntangu beno ke kuzwa bisika nyonso ya kukangama ve ya kukanga mbote, kuna Yandi ke tula beno kidimbu ya Mpeve-Santu tii kilumbu ya beno ya mpulusu. Ya kele kusiamisa ya Nzambi ti Yandi me kuzwa lukwikilu yina beno ke tubaka samu na Yandi.

29 Abraham vwandaka tuba lukwikilu ya yandi, mpe Nzambi tubaka, “Mu ke pesa nge kidimbu ntangu yayi ti nge. . . ti Mu me yamba nge.” Mpe Yandi pesaka yandi kidimbu ya nzengolo.

30 Ntangu yayi, ntangu beno ke yamba Klisto mutindu Mvulusi ya beno mosi mpe ke kwikila na Yandi mpe beno ke lomba Yandi na kusukula luzingu ya beno, mpe na yina ntangu Yandi ke vutuka na Mpeve-Santu mpe ke pesa beno kidimbu ya Mpeve-Santu, kuna beno kele ya kutula kidimbu tii kilumbu ya beno ya mpulusu.

31 Awa wagon yayi, kana ya kele ya kukanga ve. . . Na manima ba me kanga yawu nyonso kintwadi mpe ti bawu ke kanga mwelo yina mpe ba me tula kidimbu na zulu ya yawu, mpe ya kele—ya kele ya kutula kidimbu tii kisika ya yawu, kompani ya nzila ya masini ke kanga beno na boloko luzingu ya beno nyonso kana beno zenga kidimbu yina. Ba lenda zenga yawu ve. Ya kele ya kutula kidimbu tii kisika ya yawu; muntu ve lenda benda na kufungula yawu mpe kutala na kati ya yawu nzila nyonso ya mulayi, mpe kufyonginina yawu mpe kutala dyaka yawu, mpe kubasisa mwa bima, kutula mwa bima dyaka na kati. Ve, ve!

32 Dibuundu *yayi* ke tuba, mbote, kinkulu yina, “*Yayi* kele mbote ve, *ya kele* mbote ve.” Ntangu Nzambi me pesa beno

Mpeve-Santu, ya ke sukisa dyambu! Beno zaba kisika beno me telama, beno zaba yinki me salama, mpe beno kele ya kutula kidimbu nzila nyonso tii kilumbu ya beno ya mpulusu, kisika ya zyetolo ya beno na ntoto yayi. Oh, la la! Yina ke sala kaka muntu nyonso kuzwa lukwikilu mpe kukwikila Nzambi, kutelama kaka na ngolo ya Mpeve-Santu.

³³ Ntangu yayi, bamwense yayi yina kuzwaka ve Mpeve-Santu, (Beno me bambuka moyo?) kima mosi kaka yina bawu kondwaka vwandaka mafuta na minda ya bawu. Ya kele kieleka? Biblia ke tuba *mafuta* ke lakisa “Mpeve-Santu,” ya kele samu na yina beto ke kusaka bantu ya kubela na mafuta, mpe nyonso yina, samu ti ya kele kidimbu ya Mpeve-Santu. Ntangu yayi, mpe na yina kana—kana Mpeve-Santu kwizaka ve na zulu ya bawu, bawu kuzwaka Yawu ve. Mpe na yina ntangu Yandi kwizaka, ba tubaka . . . Ntangu yayi, na bamwense yina vwandaka na mafuta, ba tubaka . . .

³⁴ Beno me mona, bawu vwandaka ntete na nsungi ya dibuundu; ya vwandaka na bayankaka ya bawu na kati kuna yina vwandaka bantu ya mbote kasi ba vwandaka ve na kati ya Nsemo ya mbwetete, yina mu zola kutuba, na nsinga ya kukota na mafuta. Beno me mona, mpe ya vwandaka na ngaanda. Ya basikaka, bawu kabukaka bawu mosi. Paul tubaka, na kilumbu ya yandi, “Bawu kabukaka bawu mosi na beto, na kumona vwandaka ve na lukwikilu.” Beno me mona, mpe kwendaka ntama na bawu, “Bawu basikaka na beto samu ti bawu vwandaka ve ya beto.” Ntangu yayi, ya bandaka kuna na nsungi ya ntete yina ya Éphèse mpe me landila na nsungi ya kilumbu yayi. Kima mutindu mosi, mosi na mosi ya bansungi yango yina salamaka na yawu lutaka na bansungi yayi awa. Beto ke kota na kati ya yawu na mwa ntangu fyoti.

³⁵ Ntangu yayi, beno tala ti mwense yayi, kasi, yandi kwendaka na kisika ya vwandaka na kudila, manyongo, mpe kukwetisa meno.

³⁶ Bika mu tuba yayi, mpangi ya munu ya luzolo ya ntalu; samu ti bantangu mingi na dibuundu awa, ntangu mu ke kwizaka awa, Mu ke kwizaka kaka awa mpe ke kuzwa lukutakanu ya kusambila bantu ya kubela, mpe na ngaanda na bisika yankaka na yinsi. Kasi yayi kele ntangu, mu vwandaka zonzila beno ntama mingi, beno tula konsiansi ya beno na posi. Ntangu yayi beto zola—beto zola kukwiza mpe kuvwanda ya kusungama mpe kieleka na mosi na yankaka, samu ti beto kele na kilumbu ya nsuka. Yinga!

³⁷ Ntangu yayi, ya kele kisika beno ba-Nazaréen mpe ba-Pèlerin ya Sainteté ya ntalu na yisi ya kusantisama kubwaka. Beno me mona? Ntangu yayi, beno zaba ti Judas Iscariot zingaka na kisika mosi yina? Judas kwikilaka na Mfumu Yesu mutindu Mvulusi, ndimaka Yandi mutindu Mvulusi. Mpe yandi vwandaka

mpe ya kusantisama. Yandi vwandaka ya kusantisama, na Jean 17:17, ntangu Yesu tubaka, “Tata, santisa bawu na nzila ya Kieleka, Ndinga ya Nge keke Kieleka.” Mpe Yandi vwandaka Ndinga. Mbote mingi!

³⁸ Na Matthieu 10, ba pesaka bawu ngolo ya kubelusa bantu ya kubela, ya kuvumbula bantu ya kufwa, ya kubasisa bampeve ya yimbi. Mpe bawu kwendaka bisika nyonso ya—ya yinsi mpe basisaka bampeve ya yimbi, mpe vutukaka na kusepela mpe kuboka mpe vwandaka kembila Nzambi. Mpe Yesu tubaka na bawu, “Beno sepela ve samu ti bampeve ya yimbi ke na kutumama na beno, kasi beno sepela samu ti bankumbu ya beno keke na Buku ya Luzingu.” Ya keke kieleka? Mpe Judas vwandaka na bawu, Judas vwandaka na bawu, kasi yina vwandaka mvula mosi mpe bangonda sambanu ntete ba koma ntete Yesu.

³⁹ Ntangu yayi, na yina ntangu ya kumaka Pantekote, samu Judas kuzwa Mpeve-Santu mpe nyonso yina, yandi lakisaka ntinta ya yandi. Yandi—yandi mangaka Yesu, mpe kumaka muyekudi ya Yandi. Mpe ya keke kaka kieleka kisika mpeve yango ke kumaka; mbala mosi na Luther, Wesley, nataka dibuundu yango tii kusantisama na luzingu ya mwense (bantu ya kuvedila, ya kutyema, ya santu, ya mbote, bantu ya kulutila mbote yina beno me kutanaka ntete ve), kasi ntangu ya ke kuma na . . . ntangu bawu ke kwenda na kuzonza bandinga mpe kuzwa Mpeve-Santu, ba-Nazaréen, ba-Pèlerin ya Sainteté, ba-Méthodiste ya Kimpwanza, kuna ke tuba, “Ya keke dyabulu.” Mpe kaka kuna keke kisika beno ke vwenza Mpeve-Santu mpe ke kanga beno mosi kukondwa nsuka; “Samu ti muntu nyonso yina ke zonga dyambu na kuteleinaka Mwana ya muntu ba ke lemvokila yandi, kasi muntu nyonso yina ke zonga na kuteleinaka Mpeve-Santu ba ke lemvokila yandi ata fyoti ve.”

⁴⁰ Beno bambuka moyo, bilandi nyonso zonzaka na bandinga. Yesu Klisto kufwaka na kulunsi, na kuzonzaka na bandinga. Uhum. Na yawu kana beno lenda ve kusala na yawu awa, beno sala bumpangi na yawu awa, wapi mutindu samu na yawu kuna? Na yawu . . . Kana bayayi keke bampeve ya yimbi, mutindu yawu vwandaka. Na yawu beno me mona kuna kisika yandi lakisaka ntinta ya yandi? Kuna me kwiza mwense yango, ya kutsyema mutindu bayankaka nyonso, ya luzingu ya kuvedila. Mu ke baka mabuundu ya ba-Nazaréen ya mutindu ya ntama, ya ba-Pèlerin ya Sainteté, bayina kieleka kwikilaka na kusantisama, beno lenda tula ve musapi na baluzingu ya bawu; ya kutsyema mutindu bawu lendaka vwanda. Ya keke kima ya mbote kana beto nyonso kuzinga mutindu yina. Ya keke kieleka, beno fwana.

⁴¹ Ntangu yayi, beto zaba beto keke na mingi na ba-Pantecotiste mutindu bantu ya bilanda-landa. Ya keke kieleka. Kasi kaka mutindu beno ke mona dollar ya luvunu, beno ke zaba ti ba salaka yawu na kulandaka mosi ya mbote, mosi ya kieleka. Ya keke kieleka. Mpe ya keke—ya keke na Mpeve-Santu ya kieleka,

Mosi ya kieleka yina ke zonzaka na bandinga mpe ke lakisaka bidimbu mpe bimangu, mpe ya kele tuka Pantekote. Na yawu beto fwana kuzwa bantu ya bilanda-landa. Beto fwana kuzwa kento ya yimbi yina kele mbote ve, samu na kusala kento ya kieleka kulezima. Beto fwana kuzwa ntangu ya mpimpa, mpimpa ya ndombe, samu na kulakisa nsemu ya mwini kele nkembo. Ya kele kieleka. Mpe beno fwana kuvwanda ya kubela, samu na kusepela na mavimpi ya mbote. Mpe ya kele musiku ya mbote mpe yimbi; mpe ya kele—mpe ya kele ntangu nyonso, mpe ke vwanda ntangu nyonso, ntangu nyonso yina ntangu ke vwanda.

Ntangu yayi, na yawu, ya kele kisika dibuundu me kuma yawu mosi.

⁴² Ntangu yayi, Yesu tubaka yawu ve “Na kilumbu ya nsuka,” na Matthieu 24, “ti bampeve zole ke vwanda pene-pene mingi mutindu ti ya ke vuna Musolami ya kieleka kana ya lendaka salama”? Uh-hum. Kasi yandi yina ba soolaka tuka mbandukulu ya ntoto kele na Luzingu ya Kukonda nsuka. Luzingu ya Kukonda nsuka, beno lendaka katukila Yawu ve. Ya kele ya Kukonda nsuka mutindu Nzambi kele, beno lenda dyaka ve kusuka na kuzinga mutindu Nzambi lenda suka na kuzinga. Ya kele kieleka. Samu ti beno kele ndambu ya Nzambi, beno kele mwana ya bakala mpe mwana ya kento ya Nzambi, luzingu ya beno me sobaka mpe beno kele ndambu ya Nzambi, beno ke na Luzingu ya Kukonda nsuka. Oh, mu zola Yandi. Beno ve?

⁴³ Ntangu yayi, muntu me pesa munu note awa, kaka kyuvu mosi ya fyoti. Beto ke baka ntangu mingi ve ntangu yayi samu na kupesa mvutu na yawu. Mpe beno bambuka moyo, ntangu nyonso yina beno ke tula mwa kyuvu awa, mu ke meka na mbote ya munu na kubaka yawu kana mu lenda. Kasi yayi vwandaka kyuvu mosi ya mfunu mingi:

Muntu vwandaka zola kuzaba kana ya vwandaka yimbi samu na bakento na kupesa kimbangi, to na kuyimba, to kupesa bansangu na bandinga, kubangula bansangu, profesi, na kati ya dibuundu.

⁴⁴ Ve, ya kele ve yimbi, ya kele...ntangu nyonso yina ke vwanda na kisika ya kuyilama. Beno me mona? Dibundu kele ya kuyilama, mpe kaka ntangu...Mutindu ya mbote, ya kieleka ya kusala yawu kele samu na bayina ke zonzaka na bandinga mpe nyonso, ba ke pesa bansangu ya bawu ntete nsangu na chaire, ata mbala mosi ve na kati ya ntangu yina; samu ti Mpeve-Santu ke na kusalaka kaka na kisika mosi na ntangu yina, mutindu Paul zonzilaka kuna. Kasi bakento kele na makabu ya profesi, mpe makabu ya bandinga mpe bantendulu, mpe nyonso kasi kuvwanda milongi. Ba kele ya kuvwanda ve milongi. Ba nimirika bawu na kulonga na mabuundu, ya kele kieleka, kubaka kisika, to kuvwanda mulongisi to kima mosi na

dibuundu. Kasi na yina me tala makabu, kento kele na nyonso yina, yandi lenda kuzwa mosi to nyonso ya makabu yango nana ya kimpeve landila ya Ntete ya Corinthiens 12, mpe ya kele na yisi ya ata mpasi ti nsangu ya yandi ke pesama na kisika ya yawu. Beno me mona, konso nsangu ke vingilaka na ntangu ya yawu.

⁴⁵ “Kana ya kele na mosi yina ke na kuzonza na bandinga, ti ya kele ve na mutendudi, ti yandi vwanda swi tii ya ke vwanda na mutendudi.” Beno me mona? Mpe ba ke pesaka bansangu yayi, na nene, kaka na ntete ya lukutakanu, na yina profete, to, mulongi, yina kele profete ya Ngwisani ya Malu-malu, mulongi, ntangu yandi ke belama Nzambi ke banda na kusala na nzila ya yandi, beno me mona, na yina ntangu yandi ke manisa kuna bansangu ke banda, yankaka, kuna kaka na ntuala, ya kele ntangu nyonso ya kuyilama, ntangu nyonso; kasi kento kele na muswa.

⁴⁶ Kima yina ke landa, mu ke zola kaka, kubaka ntangu fyoti samu na kupesa mvutu na yayi, mu ke tanga yintu:

KUBANDA KUBANGULA BIBLIA MOSI YA
BALUKWIKILU TATU. Washington, na Ngonda ya kumi
na kilumbu ya 15. Katolika, Misyoni mpe bizabi ya ba-Juif
ke na kusalaka mutindu kimvuka me banda mbangululu
ya Masonuku ya malu-malu ya kintwadi yina ke monisa
na kuvwanda Biblia ya canon yina ba vwandaka vingila
bilumbu mingi.

⁴⁷ Bima mwa mingi na kati awa mu zola kulonguka mwa fyoti ntete mu sala nsamununu ya yawu. Na bampova yankaka, beno ke na kumona kaka kieleka yina beto ke na kuzonzila, kaka kieleka yina Masonuku tubaka, ti ke salama na bilumbu ya nsuka yayi, ti bima yayi ke vukana kintwadi mpe ke sala kizizi ya kibulu. Kieleka. Bawu mekaka yawu, mpe salaka na yawu, mpe ntangu yayi bawu me kuzwa bweso ya mbote yina bawu me kuzwaka ntete na kumonikisa yawu, samu ti ya kele kaka na maboko ya bawu. Mpe ya kele samu na yina ti mu ke na kunataka bansangu ya profesu yayi, samu ti mu banza ya kele ntangu.

⁴⁸ Mpe kana ya kele na muntu yina lendaka vutuka konso nkokila, beto ke meka na kubanda na ntangu ya mbote mpe kubasika na ntangu ya mbote. Mpe kana mu ke manisa dilongi ve, kuna mu ke zabisa na suka yina ke landa. Kana beto lutila ve na kuvwanda ya 19, na nzila ya 9 tii 20 na nkokila yayi, beto ke banda yawu na suka na ngunga ya kumi. Beto ke zabisa beno na nkangulu ya lukutakanu, mutindu beto ke landila.

⁴⁹ Mpe kuna mbasi na nkokila, beto ke banda, na dibuundu ya Éphèse, na kulandilaka na bankokila sambwadi: na Éphèse, Nsungi ya Dibundu ya Éphèse; mpe Smyrne; mpe Pergame; mpe Thyatire; mpe Sardes; mpe Philadelphie; mpe Laodika, Lumingu yina ke landa.

50 Mpe na kuzabaka ntalu ya nene yayi ya kulala na nzila, ya kele mpasi mingi na kubumba maboko ya munu na yawu tii ntangu yango. kaka na kumonaka yawu kuna, mpe na kumonaka Mpeve kudikisa na kati-kati ya bantu, ya ke sala munu kaka kuzola kudumuka kieleka na swalu mpe—mpe kutuba kima mosi na yina me tala yawu; kasi mu fwana vingila kaka mpe tula yawu na nsungi ya yawu mpe na ntangu ya yawu. Na yawu kana beno kondwa kukwiza na nkokila, kieleka beno kuzwa bande to mutindu mosi yina beno lenda kuzwa Yawu, samu ti mu zola ti ya kwenda bisika nyonso. Mpe mu ke sala yayi samu ti mu ke kuwa kutwadisama ya Mpeve-Santu na kusala yawu; ya kele kaka samu na yina mu ke na kusalaka yawu. Mpe munu, kana mu banza ve ti ya ke sadisa dibuundu. . . Mpe na kilumbu yayi, beno bambuka moyo, ngunga ke na kukwiza ntangu mingi ve kisika beto ke lenda ve kuzwa balukutakanu yayi, mpe beno fwana sala yawu ntangu yayi na yina beto me kuzwa ntangu ya kusala yawu. Beno me mona, beto zaba ve wapi ntangu bawu ke kanga yayi, ntangu yayi.

51 Mpe na yawu ya ke vwanda na bimvuka na kati ya mabuundu mpe bawu ke vukana bawu mosi kintwadi, ke sala yintu ya kuvukana ya mabuundu, yina beno me kuzwa yimeni yinzo ya nene ya O.N.U mpe denomination nyonso kele na kati ya yawu. Mpe beno fwana vwanda na mosi ya ba-denomination yango to kuvwanda na ngaanda. Mpe ya kele ntangu kisika beto fwana lakisa bantinta ya beto mpe kuvwanda kieleka yina beto zaba, kasi mabanza ve, kasi kuzaba MUTINDU ME TUBA MFUMU kisika beno kele ya kutelama. Mwa Dibundu yango ke vwandaka ntangu nyonso fyoti, ya kele mwa nkonga mosi ya fyoti yina. . . singa ya fyoti, mutindu singa ya mbwaki yina ke luta na Biblia, kasi ya kele Dibundu ntangu nyonso. Mpe beto zola kubambuka moyo na yawu.

52 Ntangu yayi kaka mwa mulabu ntete beto tanga dyaka. Na suka yayi beto bakaka Bunene ya Bunzambi ya Luzayikisu ya Yesu Klisto, yina Nzambi monikisaka Yandi na beto na suka yayi mutindu Bunene ya Bunzambi: ya Nene MU KELE (ve Mu *vwandaka to ke vwanda*), MU KELE, ntangu nyonso. Mpe beto me tala na kapu yayi ya Ntete ya Apocalypse, ya Apocalypse. . . Na yinki kele luzayikisu? Yesu Klisto. Na wapi mutindu ya kima ya ntete Yandi me monikisa Yandi mosi awa? Nzambi ya Mazulu. Ve nzambi ya butatu, kasi Nzambi mosi. Nzambi mosi, mpe Yandi me monikisa Yandi mosi mutindu yina na Apocalypse ya ntete. Mpe me zonza yawu bambala yiya na kapu ya Ntete samu ti ya kuvwanda ve foti. Kima ya netete beno fwana zaba, ti: Yandi kele profete, Yandi kele ve nzambi junior, Yandi kele ve nzambi ya zole, Yandi kele Nzambi! Yandi kele Nzambi. Mpe kuna na yawu Luzayikisu me kwiza, mpe beto ke landila na Yawu na nkokila yayi tii ntangu beto ke kuma na moyo ya bumuntu ya Yandi ya bima sambwadi yina ke lakisa Yandi.

⁵³ Mpe, oh, ti Nzambi sadisa beto na yina beto ke longuka Bandinga ya yayi. Mu—mu—mu me longuka yawu landila kutala ya disolo, kasi beno vingila tii ntangu mu ke kuma awa na chaire na ntwadusulu ya kimpeve. Samu ti mu ke tala ti beto kele ya kuvwanda kintwadi na bisika ya Mazulu na kati ya Klisto Yesu, mpe ti Mpeve ya beno, ndambu ya beno, mulaka ya Tiya (Mpeve-Santu) yina kele na beno ke kwiza na muntu yankaka, mpe na yankaka na yankaka, Yawu ke pelisa Nzutu ya nene ya Nzambi mpe ke tula Yawu na tiya, mpe ya kele kisika baluzayikisu. . .

⁵⁴ Ntangu yayi, kima yina beto ke na kuzonzila, ba yufulaka munu kyuvu yayi, “Bakento lendaka . . . mpe nyonso yina?” Ya kele kieleka yina kotisaka dibuundu na poto-poto ya yawu na mbandukulu, ba katulaka bunene nyonso ya bantu mpe tulaka yawu na chaire. Kasi Nzambi kele Nzambi ya bantu. Yandi ke salaka na konso moyo ya muntu, Yandi ke zingaka na konso ntima yina Yandi lenda kota. Yandi ke tala bantu yango ya makabu mpe ke sala na nzila ya bawu. Ntangu yayi, kana dyabulu lenda ve kuzwa bawu na kima mosi, na yina yandi ke kwiza kuna mpe ke sala kaka kimvuka ya nene ya kima ve mpe ke kimisa bantu. Mutindu Paul ke tuba, “Ntangu beno ke vukana, kana beno nyonso ke zonza na bandinga, mpe ti muntu yina longukaka ve kukota, yandi ke tuba ve, ‘Benome lawuka! Buzoba!’? Kana muntu kuzonza na bandinga, mpe *yayi* mpe *yayi* kele ya kuyilama ve, mpe nyonso, yina ke tambula ve. Kasi,” yandi tubaka, “na yina kana mosi pesa profesi mpe monikisa mansweki ya ntima, kuna bawu ke tuba, ‘Kieleka Nzambi kele na beno.’” Kasi kana mosi kuzonza na bandinga na nzila ya luzayikisu mpe pesa ntendulu ya yawu, kima mosi samu na kupesa malongi na dibuundu, na yina dibuundu ya muvimba ke kuzwa malongi na nzila ya yawu. Ti kima ke zonza mpe Nzambi kuzonza na bandinga yina beto zaba kima mosi ve mpe ke pesa yawu na muntu mpe muntu yankaka ke tendula yawu, mpe ke tuba dyambu mosi yina ke salama kaka kieleka mutindu ba tubaka yawu, na yina beno kele na Mpeve ya Mfumu na kati ya beno. Mpe, oh, beto sala nyonso samu na yawu, bankundi; ti—ti beto bumba tiya yango ya kunamisa.

⁵⁵ Ntangu yayi, kaka ntete beto zibula . . . canon ya nene yayi ya Masonuku, Mu ke kumiyufula kana ya ke vwanda ya kulutila kana beto lendaka telama kaka mpe kusoba mutindu ya kuvwanda ya beto kaka baminuti fyoti na yina beto ke sambila.

⁵⁶ Nzambi ya Ngolo nyonso yina vumbulaka dyaka Mfumu Yesu na lufwa mpe me monisa Yandi na beto (na manima ya bamvula funda mosi na bankama yivwa) mutindu Nzambi ya Mazulu yina ke kondwaka ve, beto ke tonda Nge samu na yayi mpe samu na Mvwandulu ya Yandi na beto kilumbu na manima ya kilumbu na kutambula ya beto ya konso kilumbu. Mpe beto kele na kyese mingi ya kuzaba ti na ngunga yayi ya poto-poto na yina yinza zaba ve yinki ya kusala, bawu ke na kutimuna mabulu na ntoto,

mpe ke na kusalaka samu na bawu mosi bibaka ya matadi, kasi, O Nzambi, bawu lenda bumbama ve na nganzi ya Nzambi. Ya kele kaka na mosi—na nkisi mosi, Mfumu, mpe beto kele na kyese mingi ti beto me ndima Yawu: “Ntangu Mu ke mona Menga Mu ke luta na zulu ya beno.” Oh, wapi mutindu beto kele na nsayi samu na nkebolo yango nyonso ya kulunga na nkokila yayi ya Menga ya Mwana-dimeme ya Nzambi, Nganga-Nzambi ya Ntete, ya kutelama na Nkembo na nkokila yayi na kusalaka balusambulu na zulu ya yina beto ke na kutuba. Beto kele na nsayi mingi na kuzwa Yandi na beto na nkokila yayi, Mulongi ya nene, Mpeve-Santu ya nene, mupesi-kupakulama ya nene, mupesi-Luzinga ya nene.

⁵⁷ Mpe ntangu yayi, Mfumu Nzambi, mutindu mu me bokila bantu yayi kintwadi awa na yisi ya muludi yayi na nkokila yayi, mpe beto me vukana awa mutindu dibuundu to ndambu ya yawu, beto me vukana ve na nkumbu ya tabernacle yayi to na nkumbu ya muntu mosi, kasi na Nkumbu ya Yesu Klisto. Ti Mpeve yina yalaka na zulu ya nzutu ya Yandi mpe dibanza ya Yandi, mpe tumikaka Yandi, kukwiza na kati ya beto na nkokila yayi mpe tendula Ndinga mpe kulonga Ndinga, mpe kupesa Yawu na bantima ya beto ya nsatu mutindu beto ke vingila na Yandi. Samu ti beto me lomba yawu na Nkumbu ya Yandi mpe samu na nkembo ya Yandi. Amen. (Beno lenda vwanda.)

⁵⁸ Ntangu yayi samu na beno bayina kele na Babibilia ya beno, beno baka kapu ya 1 ya Apocalypse mpe kubanda na nzila ya 9; bilapi ya beno mpe ba-papié, mpe mu ke meka na kupesa beno mwa ba-date mpe nyonso yina na yina beto ke kwenda na ntwala.

⁵⁹ Ntangu yayi, yayi kele kieleka... Dilongi na suka yayi vwandaka mingi na kifwanukusu, na kutulaka lufulu na zulu ya Bunzambi, ya Luzayikisu; Nzambi na kumonanaka na kati ya Klisto. Bantu yikwa ke kwikila Yawu? Nzambi kumonanaka na kati ya Klisto, Jehovah kumonanaka na kati ya Klisto. Ntangu yayi wapi kisika Nzambi ke monana? Na kati ya Dibundu ya Yandi, na bantu ya Yandi, na kati ya beto. Mpeve mosi, bisalu mosi, kumonisama mosi, zola mosi, lemvo mosi, mvibudulu mosi, kusalasana, kukanga-ntima, ngemba, kyadi, nyonso yina vwandaka na Klisto kele na Dibundu. Beno bambuka moyo, beno simba yayi na dibanza: nyonso yina Nzambi vwandaka Yandi me tula na kati ya Klisto (Yandi vwandaka muvimba ya Bunzambi na nzutu), mpe nyonso yina Klisto vwandaka Yandi me tiamuna na kati ya Dibundu. Nzambi na zulu ya beto, Nzambi na beto, Nzambi na kati ya beto. Butatu ya Nzambi, Nzambi kutalanaka na mitindu tatu: Tata, Mwana, Mpeve-Santu.

⁶⁰ Luzayikisu ke lakisa ti Yandi kele ve banzambi tatu, to dyaka ti Yandi kele ya kuzenga na bitini tatu. Kasi Yandi kele Nzambi mosi yina vwandaka na bilumbu ya Tata, Yandi vwandaka

Nzambi na bilumbu ya Mwana, Yandi keke Nzambi na bilumbu ya kilumbu ya Mpeve-Santu, Nzambi mosi. Ve banzambi tatu ya kuswaswana, ba-persona tatu ve, na ba-persona tatu ve. Yandi keke Muntu mosi, na persona mosi. Beno lenda vwanda ve na bumuntu kukondwa kuvwanda muntu. Bantu yankaka ke tubaka, “Yandi keke ve bantu tatu, kasi Yandi keke na ba-persona tatu.” Beno lenda kabula yawu ve; samu ti kana Yandi keke na bumuntu, Yandi keke muntu; fwana vwanda muntu na kusala bumuntu. Na yawu Yandi keke Muntu mosi, na bumuntu mosi; mutindu mosi mazono, bubu yayi, mpe kukondwa nsuka; Alpha, Omega; Yandi yina vwandaka, yina keke, mpe ke na kwiza. Oh, Yandi keke kaka NYONSO. Mu zola yawu.

⁶¹ Beno tala mbote nkadulu ya Yandi, luzingu ya Yandi, bisalu ya Yandi. Ya zolaka monisama kaka awa na tabernacle, kaka mutindu ya vwandaka na kilumbu ya Yandi. (Mu ke na kutubaka yayi ve samu na kunyongisa beno; Nzambi zaba yawu.) Kaka awa ve, kasi yinza nyonso. Mu keke na kyese ti ya keke. Na yina beto zaba kisika beto keke ya kutelama samu ti beto keke na Mpeve mosi yango na kati ya beto, ke tambula na beto mpe ke lakisa ti Yandi keke awa. Ya keke beto ve, ya keke Yandi; beto lenda sala bima yango ve, ya keke Nzambi. Na balweka yankakaya yawu, na yinza ya science, Yandi pesaka muswa ti foto ya Yandi kubakama. Na beto, na kati ya beto, na zulu ya beto, na nzila ya beto, ke sala na kati mpe na ngaanda ya beto. Oh, mutindu ya keke mbote mingi!

⁶² Ba vwanda yimbaka mwa nkunga mosi:

MU KELE yina zonzaka na Moïse na mulaka
ya Tiya,
MU KELE Nzambi ya Abraham, Mbwetete
yina ke Ngengaka ya Suka.
MU KELE Rose ya Saron, oh, wapi kisika beno
ke tuba ti Mu me katuka?
Beno zaba Tata ya munu, to beno lenda tuba
Nkumbu ya Yandi?
Oh, nani beno ke tuba ti Mu keke, to na wapi
kisika beno ke tuba ti Mu me katuka,
Beno zaba Tata ya munu, to beno lenda tuba
Nkumbu ya Yandi?
MU KELE Alpha, Omega, mbandukulu na
nsuka,
MU KELE ngidikulu ya muvimba, mpe Yesu
keke Nkumbu.

⁶³ Oh, mutindu ya keke ya kuyituka, Luzayikisu! Ntangu yayi, beno bambuka moyo, lenda ve kuzwa Yawu na nzila ya ba-théologien, Yawu ke kwizaka ve mutindu yina. Yawu ke kwizaka kaka mutindu luzayikisu. Mbotika na maza, na kusadilaka Nkumbu ya Yesu Klisto, lendaka vwanda kaka ya

kupesama mutindu luzayikisu. Yesu mpe Nzambi kele Muntu mosi lenda kwiza kaka mutindu luzayikisu. Biblia ya muvimba kele ya kutunga na luzayikisu. Dibuundu ya muvimba kele ya kutunga na zulu ya luzayikisu. Matthieu 17 ke tuba, “Na yina Mu ke tuba, ‘Na zulu ya ditadi yayi (luzayikisu ya kimpeve) Mu ke tunga Dibuundu ya Munu, mpe mielo ya difelo lenda telemina Yawu ve.’” Beto ke telemina muntu nyonso na kulakisa beto, kisika nyonso, na disolo to na Masonuku, kisika ya vwandaka ntete na bantu yina ba botikaka na nkumbu ya “Tata, Mwana, Mpeve-Santu” na ngaanda ya dibuundu ya Katolika tii kilumbu ya Martin Luther. Na manima dibuundu ya Misyoni, ya vwandaka . . .

⁶⁴ Mpe konso mpeve ya yimbi, beno kuwa, na yina beto ke kota na bansungi ya dibuundu, konso mpeve ya yimbi yina vwandaka na dibuundu ya ntete, me luta na mosi yina vwandaka landa. Me landila kaka na kukwenda tii na nsuka ya me suka kumanga lukwikilu ya muvimba na kilumbu ya nsuka. Konso mpeve ya yimbi me landila na kukota na konso dibuundu, na konso mwa isme yina vwandaka banda. Mutindu na Genèse, yinti ya vinu, bandaka na kukula, ya salaka nzila ya yawu na nzila ya dibuundu mpe na bilumbu ya nsuka me basika. Kukondwa ntembe ti Biblia ke tuba, “Kyese na bawu yina ke kima na kilumbu yina.” Yinga, tata, ya ke kimisa ve bima nyonso yayi.

⁶⁵ Ntangu yayi beno lombamba Nzambi na . . . na yina beto ke na kuzonzila na Luzayikisu, beno lombamba Yandi na kupesa beno luzayikisu ya Yayi. Samu ti Yawu lendaka zabana kaka na nzila ya luzayikisu, mpe beno lendaka kaka kuvwanda ya kuvuuka na nzila ya luzayikisu. Beno kele na luzabu ya Yawu, na mutindu ya mayela, kasi beno lendaka vwanza ve ya kuzwa mpulusu tii ntangu Yawu ke monana na beno. “Muntu ve lenda bokila Yesu Klisto, kaka na nzila ya Mpeve-Santu.” Ya kele yina Biblia ke tuba. Muntu ve lendaka tuba ti Yesu kele Klisto tii yandi ke kuzwa Mpeve-Santu. Yandi lendaka tuba, “Pasteur me tuba yawu, Biblia me tuba yawu.” Ya kele kieleka. “Dibuundu me tuba yawu.” Ya kele kieleka. Kasi beno zaba ve beno mosi tii Mpeve-Santu ke monikisa Yawu na *beno*, mpe Yandi me kuma na kati ya *beno*. “Muntu ve lendaka bokila Yesu Klisto, kaka na nzila ya Mpeve-Santu.” Na nzila ya luzabu ve, na nzila ya mayele ve.

⁶⁶ Wapi mutindu bawu ke sala Biblia . . . Ke meka na kufyeta Yawu, kusala Yawu kulunga samu na ba-Juif, Bakatolika, mpe Bamisyoni, na yina ti bawu kele ya kuswaswana mutindu kilumbu kele na mpimpa. Mu vwandaka banza ti ba-Juif zabaka mingi mbote kulutila yina; mu banza ti na kutala ya kele kaka ngunga samu na yawu na kusalama, kisika yawu nyonso fwana kukota na kumanga lukwikilu ya nene yayi. Na yawu, mpe na bima nyonso beno bambuka kaka moyo, beto lenda kanga yawu ve, kasi kima kaka beto lenda sala kele kubasisa Nsemo na

ngaanda kuna, ya lendaka vwanda kupesa beto mosi mutindu mbangi mpe kukwenda, na yawu ya kele kaka mutindu beto lendaka sala yawu. Kasi mingi ke fwana sala yawu. Mpe na yawu ya kele mutindu Biblia kele ya kusala mpe na bima yina beto ke kota. Kana mu sala keba ve, mu ke kota na kati ya yawu.

⁶⁷ Ntangu yayi, kima ya ntete na Buku ya Apocalypse, ya ke banda ti Yawu kele Luzayikisu ya Yesu Klisto, nani Yandi kele. Ntangu yayi, Yesu Klisto kele Nzambi ya Ngolo nyonso. Beto zaba yawu. Bantu yikwa ke kwikila yawu? beno tuba “Amen.” [Dibuundu me tuba, “Amen.”—Mu.] Yandi kele Nzambi ya Ngolo nyonso, mpe Yandi kele na Nkumbu mosi. Nkumbu yango kele nkumbu kaka yina pesamaka na yisi ya Mazulu na nzila ya yina beno fwana kuzwa mpulusu, Yesu Klisto. “Samu na yinki bawu ke na boma ya Yawu na kizinga ya maza?” ya kele yina mu lenda kumiyufula ve. Uh-huh. Beno me mona? Ya kele samu ti mpeve yango kotaka na malembe na bilumbu ya ntama kuna na Nsungi ya Smyrne; mpe kotaka yawu mosi kaka nzila nyonso ya nsungu ya mpimpa yango ya nene, mpe salaka yawu malongi, mpe me basika kaka na yawu na kilumbu ya nsuka yayi. Ntangu yayi, beno tala kaka mbote disolo mpe Biblia na yina beto ke kota na yawu sabala yayi, mutindu yawu—mutindu yawu ke basisa bima yango.

⁶⁸ Ntangu yayi kima yankaka. Ya pesamaka na nzila ya Klisto na Jean, na nzila ya wanzio, samu na kupesa na ya Yandi (yinki?) mabuundu, samu na kumonikisa Yawu na mabuundu ya Yandi. Mpe bambwetete sambwadi na diboko ya Yandi vwandaka minati-nsangu sambwadi ya mabuundu sambwadi. Mpe muntu nyonso yina ke kuzwa Nsangu, ke kuzwa yawu, Nsangu mosi ya kieleka yina bandaka na mbandukulu.

⁶⁹ Mpe dyaka, ntangu beto ke kota na bisika yango ya kati kuna, samu na kumona mutindu Nzambi tulaka bima yayi, ya kele ngitukulu. Ya ke sala kaka beno kuboka. Mu vwandaka, tanga yawu, mpe na manima vwandaka tambula na kizunga mwa ntangu fyoti mpe vwandaka dila mpe vwandaka vwanda dyaka, na manima kutambula na kizunga mwa ntangu fyoti. Mu ke kaka na kyese mingi na kuzaba yawu: Wapi mutindu Nzambi kuzwaka mingi kyadi samu na beto samu na kubika beto kumona kima yango na ngunga yina beto ke na kuzingilaka? Mbote, ya kele mutindu Yesu tubaka, “Muntu tekisaka nyonso yina vwandaka na yandi samu na kusumba diama mosi.” Beno tekisa na yinza, bima ya yinza, mpe nyonso yina kele na kima yankaka, samu na kuzwa Yayi. Ya kele kieleka, beno tula kizundu ya beno nyonso kaka na zulu ya Yawu. Ya kele kizundu ya moyo na kumona luzayikisu ya Ndinga ya Yandi.

⁷⁰ Ntangu yayi, muntu nyonso yina ke tanga Yawu kele ya kusakumuna. Ya kele kieleka? Mpe beto tubaka na suka yayi, kana beno lenda tanga ve, muntu nyonso yina ke kuwa Yawu, kele ya kusakumuna. Ntangu yayi, Yawu ke banda na

lusakumunu samu na bayina mpe ke vwanda mpe ke kuwa ba kutanga Yawu, mpe ya kele nsingulu na zulu ya muntu nyonso yina ke meka kubwela kima na Yawu to kukatula kima na Yawu. Na yina kana Biblia me monikisa pwelele ti Yesu wandaka Nzambi ya Ngolo nyonso, na yina nsingulu na yandi yina ke katula yawu kuna. Yinga. Ya kele luzayikisu. Muntu nyonso yina ke bwela kima . . . Ya kele canon ya muvimba ya—ya Luzayikisu; ya kele Buku ya nsuka ya Nzambi, Bandinga ya nsuka ya Yandi, ya Yandi nsu- . . . Mpe luzayikisu nyonso yina ke vwanda ya kuswaswana na Yawu, kele ya profesi ya luvunu; ya kele ve Nzambi, samu ti yayi kele Kieleka.

⁷¹ Mpe, beno bambuka moyo, yayi kele kaka buku na kati ya Biblia yina Klisto tula kidimbu, ya Yandi mosi. Beno banza na yawu! Buku kaka, kele luzayikisu ya Yandi mosi. Buku kaka yina Yandi tulaka kidimbu ya Yandi na zulu, mpe tulaka balusakumunu ya Yandi mpe bansingulu ya Yandi. Balusakumunu na bayina ke kuzwa Yawu, nsingulu na bayina ke kuzwa Yawu ve.

⁷² Ntangu yayi—ntangu yayi beto me kuma na kisanga ya Patmos samu na kubanda, na nzila ya 9. Na kisika ya ntete, beto zola kutuba ya kele. . . Yintu ya dilongi yayi kele: *Vision Ya Patmos*. Ya salamaka na Manima ya Yesu, kati-kati ya mvula 95 na Manima ya Yesu mpe 96 na Manima ya Yesu. Kisika wandaka na kisanga ya Patmos. Ya kele bakilometele makumi tanu na mukidi ya Asie Mineur, na wesete, na ntuala ya dibuundu ya Éphèse, na Mubu ya Egée yina kele ndilu na Méditerranée. Ya kele kisika ya kele.

⁷³ Beno banza! Ntangu yayi, mwa kisanga yina kele bakilometele makumi tanu na mukidi ya Asie Mineur, na Mubu ya Egée. Kaka na ntuala ya dibuundu ya Philadel- . . . to dibuundu ya Éphèse, kisika Nsangu ya ntete kupesamaka, kisika Jean wandaka pasteur na ntangu yina. Na bampova yankaka, na kutalaka kaka na manima na esete mpe yandi wandaka tala kaka mbala mosi na dibuundu ya yandi, kubanda kisika yandi wandaka. Mpe Nsangu ya ntete wandaka na dibuundu ya yandi, yina monisaka nsungi ya dibuundu. Mbote mingi, vision kupesamaka na Santu Jean ya ntumwa, yina wandaka pasteur ya dibuundu ya Éphèse na ntangu yina.

⁷⁴ Na wapi mutindu wandaka kisanga yayi kuna? Wapi kisika ya vwandaka mpe na wapi mutindu? Mbote mingi, ya kele ya kuzabana na disolo mutindu kisanga ya matadi ya kufulukuka na banyoka, bankala-nseke, miseleketete, mpe nyonso. Ya kele bakilometele makumi tanu na kizunga ya yawu, mpe ya kufulukuka na matadi. Ba vwanda sadilaka yawu, na bilumbu ya Jean, mutindu Alcatraz. Kisika bamfumu ya kimfumu ya Rome vwanda fidisaka na kukwenda zinga bantu ya mambu ya yimbi, kieleka bantu ya mambu ya yimbi, ti bawu lendaka ve na kubumba bawu na boloko mpe nyonso, bawu wandaka

tula bawu kuna na kisanga yina samu na kufwa; vwandaka bika bawu kuvwanda kuna tii bawu zolaka kufwa.

⁷⁵ Kyuvu: Samu na yinki Jean vwandaka kuna? Muntu ya kinzambi, muntu ya mbote, muntu yina me zabana na mutindu ya mbote, ya nkadulu ya mbote, ata mbala mosi ve na mpasi, samu na yinki muntu yayi vwandaka kuna? Biblia ke tuba, “Samu na Ndinga ya Nzambi mpe kimbangi ya Yesu Klisto.”

⁷⁶ Ntangu yayi beto me vwandisa yawu. Kisanga ya Patmos, na Mubu ya Egée, bakilometele makumi tanu na mukidi, pene ya makumi tanu na kizunga ya yawu, ya matadi, ya kifuluka na miseleketete mpe bankala-nseke mpe nyonso, mpe ba vwanada sadilaka yawu mutindu boloko (mutindu Alcatraz kele). Bawu vwandaka baka muntu ya boloko yina bawu vwandaka lenda ve kubumba na boloko awa, bawu. . .muntu ya mambu ya yimbi mingi, bawu vwandaka tula yandi na Alcatraz.

⁷⁷ Mpe awa bawu bakaka Jean yayi ya santu ya ntumwa. . .ya nsuka ya bilandi, mpe yandi yina kaka kufwaka na mutindu ya lufwa ya yinza. Jean, ntete yandi kwenda na kisanga, ba fundaka yandi ti vwandaka “ndoki,” mpe ba tokisaka yandi na ndonga ya nene ya mafuta bangunga makumi zole na yiya, kukondwa kuyoka yandi na tiya. Beno lendaka basisa ve Mpeve-Santu na muntu na kutokisaka. . .?. . .Ba tokisaka yandi bangunga makumi zole na yiya na ndonga ya nene ya mafuta, kukondwa ya kusala yandi mpasi. Mpe tubaka, ya kele samu na yina bantu ya Rome pesaka, ti, “Yandi vwandaka ndoki, mpe ti yandi lókaka mafuta.” Yina dibanza ya nsuni lenda banza na yawu! Ntangu yayi, beno me mona, ntangu bawu ke bokilaka beto “bantu ke tangaka mabanza, mpe mimoni, mpe Béelzébul,” beno me mona kisika mpeve yango ya ntama me katuka? Kasi beno me mona kisika Mpeve ya kieleka me katuka? Ya kele bansungi ya dibuundu. Beno me mona? Bangunga makumi zole na yiya, vwandaka toka na tiya, mafuta vwandaka basisa bambuma, kasi mpe ata mbala mosi ve simbaka yandi. Oh, mutindu Nzambi zungidilaka yandi na Yandi na Mpeve-Santu ya Yandi. Kisalu ya yandi vwandaka me manisa ve.

⁷⁸ Ba tulaka yandi na kisanga bamvula zole. Mpe na yina Nzambi kuzwaka yandi kuna yandi mosi, yandi sonikaka Buku ya Apocalypse mutindu Wanzio ya Mfumu monikisaka yawu na yandi. Mpe kuna na yina ya manisaka, yandi vutukaka na yinsi mpe vwandaka pasteur ya dibuundu ya Éphèse. Mpe kufwaka mpe ba zikaka yandi na Éphèse, ntumwa Jean.

⁷⁹ Oh, wapi mutindu ya kuvwanda ntangu yayi! Mbote mingi, dibuundu kuna na yisi ya Jean, to na yisi ya kutalisa mpasi ya nene, Jean sonikaka nzila ya 9:

Munu Jean, yina kele mpe mpangi ya beno. . .na mpa- . . .mpe mpangi na lukwamusu, mpe na kimfumu mpe na ngemba ya Yesu Klisto, vwandaka na kisanga

yina ba ke bokilaka Patmos, samu na ndinga ya Nzambi, mpe samu na kimbangi ya Yesu Klisto.

⁸⁰ Na bampova yankaka, yandi bakaka Ndinga ya Nzambi mpe vwandaka monisa Yawu, ti Yawu vwandaka Ndinga ya Nzambi, mpe Klisto vutukaka na nzila ya yandi mpe pesaka kimbangi ti yandi vwandaka na kieleka. Beno bawu yayi. Ndinga ya Nzambi na kuvwandaka ya kumonisama na yandi, vwandaka monisa ti yandi vwandaka kisadi ya Nzambi. Na yina bawu lendaka ve kumanga Yawu, na yawu ti bawu tubaka na yandi ti yandi vwandaka “ndoki.” “Yandi me loka mafuta mpe ya lendaka ve kutalisa yandi mpasi, mpe yandi lokaka bantu mpe bawu belukaka ve, mpe yandi vwandaka mumoni yina lendaka ve. . . Mutindu mosi ya muntu ya yimbi, ya kubela na kim-. . . mpeve ya yimbi.” Mpe ya kele samu na yina ba tulaka yandi kuna, na kubanzaka ti yandi vwandaka pesa boma na kuvwanda na kati ya bantu. Kasi yandi vwandaka nata kaka luzolo ya Nzambi, mpe Nzambi vwandaka na lukanu na yisi ya mutindu yina.

⁸¹ Yandi zolaka sadila yandi ve, mpe bampasi nyonso mpe nyonso, samu ti basantu vwandaka kwiza, “Oh, Mpangi Jean, yinki beto ke sala samu na *yayi*? Mpe yinki beto ke sala?”

⁸² Jean vwandaka profete, beto zaba yawu. Mpe na yawu ba vwandaka pesa yandi bakyuvu yayi, na yawu Nzambi vwandaka kaka na Kimfumu ya Rome, samu na kubaka yandi mpe kutula yandi na ngaanda kuna na kisanga. Mpe Yandi tubaka, “Ntangu yayi, kwiza, Jean, Mu zola kulakisa nge kima yina ke salama.” Ya nsuka ya bantumwa, ya vwandaka dyaka ve na yankaka na kusonika Yawu kasi Jean. Na yawu bawu tulaka yandi na kisanga ya Patmos na mvula 95 na Manima ya Yesu tii na mvula 96 na Manima ya Yesu. Mpe yandi sonikaka Yawu, mpe yandi tubaka:

Munu. . . kele mpangi ya beno, mpe mpangi na lukwamusu, . . .

⁸³ Ntangu yayi, yandi vwandaka zonzila ve na Lukwamusu ya Nene. Ya vwandaka ve Lukwamusu ya Nene, mpe ke kwiza ve na Dibuundu. Lukwamusu ya Nene ke kwiza samu na ba-Juif, ve samu na Dibuundu. Na yawu ya vwandaka ve Lukwamusu, Lukwamusu ya Nene.

⁸⁴ Ntangu yayi nzila ya 10:

Mu vwandaka na kati ya Mpeve na kilumbu ya Mfumu, mpe kuwaka na manima ya munu ndinga. . . , ya. . . mpungi,

Mu vwandaka na kati ya Mpeve na kilumbu ya Mfumu, . . .

⁸⁵ Ntangu yayi, beno lendaka sala ata mbote ti ntete beno kota na Kimpeve; Nzambi lenda ve kusadila beno. Beno kele—beno kele—beno kele—beno kele. . . Bangolo ya beno nyonso kele—kele

mpamba tii ntete beno sala yawu na Kimpeve. “Kana mu ke yimba, mu ke yimba na Kimpeve. Kana mu ke sambila,” tubaka Paul, “Mu ke sambila na Kimpeve.” Mpe na yina kana ya kele na kima yina ke kwiza na munu yina kele mbote, ya fwana monana na munu na Kimpeve mpe ke pesama kimbangi na nzila ya Ndinga (ke talana na nzila ya bandambu ya mbote yina ya ke pesa kimbangi).

⁸⁶ Ntangu yayi mutindu, na bampova yankaka, kana mu tuba, Yesu Klisto silaka na Ndinga ya Yandi ti kana mu ke balula ntima, kuvwanda ya kubotama na Nkumbu ya Yesu Klisto, mu ke kuzwa dikabu ya Mpeve-Santu. Kima ya ntete samu na munu na kusala kele kubalula ntima. Ya kele ya kumonikisa na munu ti ya kele kieleka. Na manima kuvwanda ya kubotika na Nkumbu ya Yesu Klisto, na manima ndandu ya mbote kele: mu ke kuzwa Mpeve-Santu.

⁸⁷ Kana mu kele ya kubela, mpe Yandi silaka munu kana mu ke kwikila mpe kuna kuzwa bakuluntu ya dibuundu kupakula munu mafuta, bawu sambila na munu, kisambu ya lukwikilu ke vulusa muntu ya kubela. “Mfumu, mu ke kwikila. Mu ke landa malongi ya Nge, ti kuluntu sambila na munu, kupakula munu na mafuta.” Yina ke sukisa dyambu, beno landila kaka, ya kele nyonso—ya kele nyonso ya kusuka.

⁸⁸ “Oh,” beno ke tuba, beno “ke tala ata luswaswanu ve, na mutindu nyonso.” Yesu butamaka ve, ntangu Nzambi kufwaka Yandi ntete mbandukulu ya yinza, ntangu Yandi vwandaka—Yandi vwandaka Mwana-dimeme ya Nzambi, yina ba kufwaka ntete mbandukulu ya yinza. Kasi na dibanza ya Yandi mosi Nzambi, Yandi vwandaka yimeni ya kufwa. Awa mu vwandaka mpe ve, mutindu mosi beno vwandaka ve; kasi na buku ya Nzambi, kana bankumbu ya beto vwandaka ntete kuna, ya vwandaka ya kutula kuna ntete mbandukulu ya yinza.

⁸⁹ Ntangu Nzambi ke tubaka kima, Yawu fwana salama. Na yawu ntangu beno ke lungisa misiku ya Nzambi, beno bambuka kaka moyo, Nzambi ke talana Yandi mosi mpe ke keba na yina ke bikana ya yawu, beno kwenda kaka na ntwala, ya kele kisalu me manisa. Oh, ya kele mbote ve? Oh, la la, beno banza! Beno tuba kaka na Nzambi. . . Mpe Nzambi tubaka, “Nge sala *yayi*, mpe Mu ke sala *yayi*.” Mbote, kana mu kwenda sala *yayi*, Yandi fwana sala *yina*.

⁹⁰ Ntangu yayi, dyabulu ke tuba, “Benome mona, Yandi ke na kuvutula yawu na manima.”

Ya ke sala ata luswaswanu ve. Daniel sambila kilumbu mosi, mpe ya vwandaka bilumbu makumi zole na mosi ntete Wanzio kwiza na yandi, kasi yandi lembaka ve, yandi zabaka ti Yandi na mutindu nyonso ke kwizaka, na yawu yandi vingilaka kaka tii ntangu Yandi kumaka kuna. Beno tala dyambu. Oh, ya kele ntangu beno ke kuzwa lukwikilu. Ntangu yayi beto fwana

sukisa na yawu, beto ke vwanada na lukutakanu ya kubeluka kaka na manima, mutindu yina ve? Ya kele kieleka. Yinga, lukwikilu. Kasi beto zola lukutakanu ya kubeluka ya moyo, samu na kubelusa kati, samu ti ya kele yina ke bikanaka, beno kuzwa Luzingu ya Kukonda nsuka. Luzingu ya Kukonda nsuka ke zimbanaka ve to ke nunaka ve, ya ke vwandaka, ke bikanaka mosi.

⁹¹ Ntangu yayi, yandi kotaka na Kimpeve ntete kima mosi kusalama. Kima ya ntete yandi salaka, yandi vwandaka na kisanga yina ba ke bokilaka Patmos (bima nyonso yayi yina yandi salaka), mpe yandi tubaka, “Mu kuwaka Ndinga,” mpe bima nyonso yankaka yayi. Kasi ntete kima kusalama, yandi vwandaka na Kimpeve. Mpe kana beno tala yawu na Biblia ya beno, Mpeve kele na kisono ya nene, Mpeve-Santu. Amen! Yandi kotaka na Kimpeve. Oh, mu ke banza kaka ti ya kele mbote:

Mu vwandaka na kati ya Mpeve na kilumbu ya Mfumu, . . .

⁹² Na wapi kilumbu? Na kilumbu ya Mfumu. Ntangu yayi, beno tala kuswana ya nene. Beto vwandisa kaka yawu, kaka minuti mosi.

⁹³ Ntangu yayi, mutindu beto vwandaka me tuba na suka yayi, bayankaka ke tubaka ti kubeluka, ya Santu Matthieu 17, vwandaka “Pierre.” Dibuundu ya Katolika ke tubaka, “Yandi tungaka Dibuundu ya Yandi na zulu ya Pierre; yandi vwandaka pape ya ntete.” Wapi mutindu yandi zolaka vwanada pape mpe kuvwanda ya kukwelana? Beno me mona? Mpe bawu ke tubaka, “Pierre kwendaka na Rome, ba zikaka yandi kuna.” Na yina beno tuba na munu kisika mosi, na disolo to kisika mosi, yina Pierre kwendaka na Rome. Beno me mona? Paul kwendaka, kasi Pierre ve. Mbote mingi.

⁹⁴ Na yawu beto talaka ti ba-isme nyonso yayi mpe nyonso, kotaka kaka na malembe. Beno me mona? Kasi, mpe bantu bubu yayi kele. . . bisika nyonso beno ke kwenda, bawu. . . Dibuundu mosi ya nene kele na nsoso mosi yina vwandaka na diboko ya Yandi. Beno zaba bansoso yikwa kele na bawu, bansoso ya kieleka, bubu yayi yina vwandaka na. . . ? Kumi na yivwa. Bawu kele na mikwa, bawu kele—bawu kele na bitini ya ba-robe, mpe ke simba mpe ke sadila yawu. Mpe beto ve—beto kele na bima yango ve, beto kele na nsatu ya yawu ve. Klisto kele moyo! Yandi kele na kati ya beto, nsoso mosi ve, to kitini ya kulunsi, to kitini ya mukwa, to kima mosi. Yandi kele Nzambi ya moyo, ke na kuzingaka na kati ya beto ntangu yayi, ke na kutalanaka Yandi mosi. Beto kele kaka na kima mosi ya lubambuku, ya kele Kudya ya nkokila ya Mfumu, kubambuka moyo na lufwa ya Yandi. Kasi ntangu nyonso Klisto Yandi mosi, Yandi kele na beto mpe na kati ya beto. Mpe ya kele kima yina beto zola kuningisa (nkembo ya

Mpeve-Santu) na yinza. Beno ningisa Yawu tii ntangu Nsemo ke kwenda na ngaanda. Mbote mingi.

⁹⁵ Ntangu yayi, . . .Na yawu, beno me mona, beto me baka lweka yango yankaka ya nzila. Beno zaba mu ntangu nyonso ke mekaka na kuvwanda yayi, mpe Mfumu ya beto ke monikisaka yawu ntangu nyonso na munu; ya kele na lweka mosi, mpe lweka yankaka, kasi kaka na kati-kati ya nzila kele ya kuvwanda Kieleka. Beno talaka na Ésaïe, kisika Yandi tubaka ti ya ke vwanda na nzila ya nene? Ésaïe 35. Mpe beno ke bambuka moyo mutindu bankundi ya beto ya ntalu ba-Nazaréen vwanda yimbaka nkunga yango, beno me zaba, “*Nzila ya nene ya Busantu. Nzila ya nene ya Busantu.*” Ntangu yayi, kana beno tanga mbote Biblia ya beno, ya ke tuba ve “nzila ya nene ya busantu.” Ya ke tuba, “Ya ke vwanda na nzila ya nene mpe *nzila mosi*, mpe ba ke bokila yawu,” nzila ya nene ya busantu ve, kasi “*nzila ya busantu.*” Mpe kele muvukisi-bampova yina ke sukisaka flaze ya beno. Beno me mona? “Ya ke vwanda na nzila ya nene *mpe nzila mosi*, mpe ba ke bokila yawu *nzila ya busantu*,” nzila ya nene ya busantu ve.

⁹⁶ Beno me mona, nzila kele ya kutungama, *nzila mosi*. . . Nzila ya mbote kele ya kutungama, kisika ya zulu mingi kele na kati-kati, samu ya ke bikaka maza ya yimbi kukwenda balweka zole. Ya kele yina. Ntangu muntu kieleka ke kwizaka na Klisto, yandi kele na meso ya yandi ya kukangama na kati-kati na Klisto. Kana yandi kele mwa fyoti muntu ya ba-emotion, yandi ke vwanda fanatiki. Kana yandi kele mwa fyoti madidi, yandi ke kwenda na lweka yankaka yayi mpe ke vwanda kaka concombres, na lweka yankaka yina; beno me mona, ya kele mayela ya yandi. Kasi kima ya ngundi kele kaka na kati-kati ya nzila, na mingi ya Mpeve na beno, yina ke bumba beno tiya mpe na nzila. Amen! Mpe kuzaba mingi na kubumba beno mosi na yisi ya lutumu ya Mpeve, kutambula kaka mutindu Mpeve ke tambulaka; na ntwala ve to na manima ve, kaka mutindu Mpeve ke tambula.

⁹⁷ Dibuundu ya Katolika ke tubaka, “Luzayikisu vwandaka Pierre.”

Dibuundu ya Misyoni ke tubaka, “Ya vwandaka Klisto.”

Kasi Biblia ke longa, “Ya vwandaka Luzayikisu yina Yandi pesaka (Nzambi pesaka yandi) ya Klisto.”

“Nge kele Klisto, Mwana ya Nzambi ya moyo.”

“Kyese na nge Simon, mwana ya Jonas, nsuni mpe menga ve me monikisa yayi na nge, muntu ve, seminere, to monastere, nyonso, vwandaka me tuba Yawu na nge. Kasi Tata ya Munu yina kele na mazulu me monikisa yayi na nge. Nge kele Pierre, na zulu ya ditadi yayi Mu ke tunga Dibuundu ya Munu, mpe bankotolo ya difelo lenda telemina Yawu ve.”

⁹⁸ Ntangu yayi beto ke kuma na kisika yankaka awa kisika ba kele na mabanza zole ya kuswaswana. Ntangu yayi, mu lendaka

vwanda na foti; kana mu kele, Nzambi lemvokila munu. Kasi mu ke vwanda ntima mosi ve na ba-Adventiste ya kilumbu ya Sambwadi bayina ke tubaka ti, “Ya vwandaka na kilumbu ya sambwadi ti yandi vwandaka na kati, na kilumbu ya Mfumu.” Bankundi ya ba-Adventiste ya kilumbu ya Sambwadi, mpe mingi ya bawu, ke tubaka ti ya vwandaka na kilumbu ya saba ti yandi bokilaka kilumbu ya Mfumu. Dibuundu ya Klisto ke bokilaka yawu, kilumbu ya Mfumu, “Lumingu, kilumbu ya ntete.” Mpe beto talaka bambala mingi ti—ti dibuundu ya Klisto dyaka, bubu yayi, Bamisyoni, ke lakisaka yawu mutindu “Kilumbu ya Mfumu, Lumingu.” Ya kele Masonuku ve. Lumingu vwandaka kilumbu ya ntete na sabala na kati ya Biblia, kilumbu ya Mfumu ve. Mpe ve ti ya vwandaka na kilumbu ya sambwadi, saba. Ya ke vwanda mpasi ti ya vwanda to mosi ya bilumbu yango samu ti ya bakaka Jean bamvula zole na kusunika Apocalypse. Wapi kilumbu ya vwandaka? Ya zolaka vwanda na bilumbu sambwadi yango mingi mpe bilumbu ya ntete yina lutaka.

⁹⁹ Biblia, Apocalypse kusunamaka na mvula 95 na Manima ya Yesu tii na mvula 96 na Manima ya Yesu, bamvula zole. Ya vwandaka kilumbu ya Mfumu. Kilumbu ya Mfumu kele kaka yina ya ke tuba, mpe ya kele yina ya vwandaka. Jean kunatamaka na Kimpeve na kilumbu ya Mfumu. Yayi kele kilumbu ya muntu, kasi kilumbu ya Mfumu ke kwiza. Nzila nyonso ya Masonuku beto ke tala ti yandi vwandaka na kilumbu ya Mfumu, kusimbamaka na Kimpeve mpe bakamaka na kilumbu ya Mfumu. Amen! Ya kele kieleka. Beno me mona, yandi vwandaka na kati ya kilumbu ya Mfumu. Biblia ke zonzila na kilumbu ya Mfumu. Beto ke kota na yawu na mwa ntangu fyoti, na Masonuku mingi.

¹⁰⁰ Kima ya ntete, kilumbu ya saba, na yina beto ke zonzila na yawu, kilumbu ya saba kele ve kuzitisa kilumbu mosi. Beto kele ve na lutumu samu na kuzitisa Sabala mutindu saba. Beto kele ve na lutumu samu na kuzitisa kilumbu ya ntete mutindu saba, na Ngwisani ya Ntama. Biblia ke tuba, na Hébreux kapu 4, “Kana Josué zolaka pesa bawu kupema, na manima Yandi zolaka zonzila dyaka ve na kilumbu yankaka.” Ya kele kieleka. Kasi ya kele na kupema, to kuzitisa ya saba, samu na bantu ya Nzambi. Samu na beto bayina me kwikila, mpe, me kota na kupema ya Yandi; beto ke sukisa na bisalu ya beto mutindu Nzambi salaka na ya Yandi.

¹⁰¹ Beno tala mbote! Oh! Nkembo na Mfumu. Mu ke na kuwa kaka mbote, mu ke na kutala munu mosi kunatama.

¹⁰² Beno tala, kilumbu ya saba. Nzambi salaka ntoto na bilumbu sambanu, mpe na kilumbu ya sambwadi Yandi kotaka na kupema mpe ata mbala mosi ve ti vutukaka dyaka na kutunga dyaka bayinza. Na yina Yandi pesaka yawu na bantu mutindu lubambuku. Samu ti beno lenda zitisa yawu ve ntangu yayi, samu ti ntangu beno ke na kuzitisa saba awa, lweka yankaka

ya yinza kele Lumingu kuna dyaka. Beno me mona? Na yawu ya ke lakisa ti ya vwandaka samu na bantu mosi, na kati-kati ya ntangu mpe ntangu samu na Israël. Kasi kuna ya kele na kuzitisa ya saba samu na bantu ya Nzambi.

Samu na beto bayina...kwikila beto ke na kukota na kupema ya Yandi,...ata ti bisalu... (Mu ke na kutangaka Hébreux, kapu ya 4)...ata ti bisalu vwandaka ya kumanisaka katuka mbandukulu ya yinza.

Samu ti yandi zonzaka na kisika mosi... ,...kilumbu ya sambwadi... .

Mpe mbala mosi dyaka, yandi zengaka kilumbu mosi, na kutubaka na nzila ya David, ... (samu na beno bayina ke sonikaka yawu, Hébreux 4)

Mbala mosi dyaka, yandi zengaka kilumbu mosi, na kutubaka na nzila ya David, Bubu yayi, na manima ya ntangu mingi; mutindu ya kele ya kuwa, Ntangu beno kuwa...to kutuba, Ntangu beno ke kuwa ndinga ya yandi, beno kanga ve ntima.

Samu ti kana Josué zolaka pesaka bawu kupema, (kilumbu)...na manima yandi zolaka zonzila dyaka ve na kilumbu yankaka.

Kasi ya kele...kupema (to kuzitisa ya saba)... .

¹⁰³ Mpova “kupema.” Saba kele mpova ya nzenza samu na beto, yina zola kutuba “kupema.” Ya kele mpova ya Hébreux yina zola kutuba kilumbu ya “kupema”, kilumbu ya saba; kusala ve, kupema.

Samu ti kana Josué zolaka pesaka bawu kupema,... yandi zolaka zonzila dyaka ve...na kilumbu yankaka.

Kasi ya kele...kupema (to kuzitisa ya saba) samu na bantu ya Nzambi.

Samu ti beto yina me kota na kupema ya yandi,... beto me sukisa na bisalu ya beto... , mutindu Nzambi salaka ya yandi.

¹⁰⁴ Ata mbala mosi ve ti beto ke baluka na yawu na kilumbu ya sabala yina ke landa mpe kubanda dyaka yawu, beto kotaka na Kupema. Yesu na kuzonzilaka na bakyese, Yandi tubaka, “Beno kuwaka bawu kutuba na ntangu ya ntama, ‘Nge ke kufwa muntu ve.’ Mu ke tuba na beno, muntu nyonso yina, ke dasuka na mpangi ya yandi kukondwa dyambu, me kufwa muntu yimeni. Beno kuwaka kutuba, na bawu ya bilumbu ya ntama, ‘Nge fwana sala pité.’ Ya kele lutumu. Kasi Mu ke tuba na beno, muntu nyonso yina ke tala kento samu na kulula yandi me sala yimeni pité na yandi na ntima ya yandi.” Ya kele kieleka?

¹⁰⁵ Na yawu nyonso ya bima yayi vwandaka balubambuku, kaka bidimbu, bimangu, na kuingilaka na ntangu ya kieleka yina ke

kwizaka. Ntangu yayi, ntangu Yesu manisaka yawu, na Matthieu 11, (bakyese), Yandi tubaka:

Beno kwiza na Munu, beno nyonso kele ya kulemba, ya fatike, mpe kele na bizitu ya mingi, mpe mu ke pesa beno kupema na myoyo ya beno.

Beno baka kizitu ya munu na munu, mpe beno longoka na munu; samu ti mu kele na ntima ya kulembama mpe ya kukikulumusa . . . (ya kele kieleka?)

Beno kwiza na munu, beno nyonso ya kulemba mpe . . . na bizitu ya mingi, mpe mu ke pesa beno kupema na moyo ya beno. (“Kana beno me sala kilumbu mosi, bilumbu kumi, bamvula tanu, bamvula makumi tatu na tanu, bamvula makumi tanu, bamvula makumi yivwa, mpe ti beno kele ya kulemba mpe fatike, beno kwiza na Munu, Mu ke pesa beno Kupema. Mu ke katula kizitu yango nyonso ya masumu na beno, mpe kukota na beno, mpe kupesa beno kupema ya kulunga mpe ya kufwana.”)

106 Ntangu yayi, yinki kele kupema? Beto—beto sukisa kaka yayi mwa ntangu kaka fyoti, kumona yinki ya kele. Bayankaka ya bawu ke tubaka, “Mbote, ya kele kukuma ya dibuundu.” Ve! “Ya kele kutula nkumbu na buku.” Ve! “Mbote, ya kele mutindu mosi ya kubotama na maza.” Ve! Beto sukisa kaka yawu mpe kumona yinki ya kele. Beno ke zola kaka kusala yawu awa na yina beto ke na kovingila? Beto ke mona kisika Jean kotaka. Na wapi mutindu ya kilumbu yandi kotaka?

107 Ntangu Yesu kufwaka na zulu ya ntoto, mpe ti bisalu ya Yandi kumanisaka, Yandi kotaka kisika mosi.

108 Ntangu yayi beto vutuka na Ésaïe kapu ya 28, mpe na nzila ya 8. Mu banza ya kele, ntangu yayi, Ésaïe 28:8. Mpe beto tanga, Ésaïe 28, profete ke na kuzonzaka bamvula bankama sambwadi na kumi na zole ntete ya salama. Ntangu yayi, bantu yikwa ke zola kuzaba yinki *saba* ya kieleka kele, kupema ya kieleka kele? Yawu yayi. Ntangu yayi, awa kele kisika profete zonzaka yawu, mpe mu ke lakisa beno kisika ya me salama. Beno tala mbote, Ésaïe 28:8:

Samu ti nyonso . . . (profete ke na kupesaka profesi ya bilumbu yayi)

Samu ti mesa nyonso kele ya kufuluka na bilusi mpe bamvindu, (bantu ke bakaka mbundana, bayina ke kunwaka tabaka mpe ke kunwaka mpe ke vunaka mpe ke yibaka) . . . na yawu ti ya kele ve na kisika ya kutsyema.

Na nani yandi ke longa luzabu? . . .

Nani beno lenda longa luzabu bubu yayi?

109 Bantu yikwa vwandaka me kuwa Billy Graham bubu yayi? Ya vwandaka dilongi ya mbote yandi vwandaka me longa, wapi mutindu bantu lendaka kwikila na luvunu mpe kulandila kaka na luvunu yango mpe—mpe kunungisa mpe bawu mosi mpe kubanza ti bawu vwandaka sala yina vwandaka ya kulunga. Yina bantu ya Amerika ke bakaka, yandi tubaka, mpe vwandaka tuba, “Muyungulu ya muntu ya ndwenga, mpe tabaka ya muntu ke kunwaka tabaka,” na kubakaka mosi ya baluvunu ya dyabulu, mpe na kisika ya kusalaka yandi kilawu, nyonso yina yandi kele, samu na kunwa tabaka kima ya mutindu yina mpe ke meka na kusala yandi muntu ya ndwenga. Yandi kele mpe kilawu na kunwaka yawu, ntangu . . . na yina ya kele ya kufuluka na lufwa mpe cancer mpe nyonso yankaka, mpe dyaka yandi ke kotisa yawu na mazafu ya yandi. Yandi kele kilawu. Ve—ve muyungulu ya muntu ya ndwenga, mpe ya kele ve na kima ya mutindu. Muntu ya ndwenga ke sadilaka ve kima yina.

110 “Ya kele ve na luzingu kana na Oertel 92,” to kima mutindu yina. Ya kele ve na Luzingu na ngaanda ya Klisto, beno tala Luzingu ya kieleka. Yinki ke salaka babakala mpe bakento kunwa kima yina? Samu ti bawu ke na kumekaka na kusepedisa mpwila na kati kuna yina Nzambi tulaka na kati kuna samu na kuvwanda na mpwila ya Yandi, mpe bawu ke na kumekaka na kusepedisa yawu na bima ya yinza. Mpe ya kele samu na yina beto kele na bima yango. Ya kele samu na yina bantu ke salaka mutindu yina, samu ti bawu zola kufwa mpwila yango yina kele na kati ya bawu samu na Nzambi, mpe dyabulu ke pesa bawu lufwa na kisika ya Luzingu.

. . . *bamesa nyonso kele ya kufuluka na bilusi. . .*

111 Bisiyelo, bima nyonso yankaka, ke zonzila na yawu, “Ya kele mbote mingi na kuzwa mwa kusakana mosi ya kutsyema.” Ya kele ve na kima ya mutindu!

Na nani yandi ke longa luzabu? mpe na nani yandi ke sala . . . kubakula malongi? bawu yina ba me zenga madya milki, mpe ba me zenga mabene. (Ntangu yayi beto kele dyaka ve ba-bébé.)

Samu ti lutumu fwana vwanda na zulu ya lutumu, lutumu na zulu ya lutumu; musiku na zulu ya musiku, musiku na zulu ya musiku; awa fyoti, mpe kuna fyoti:

Samu ti na bikoba ya lunkukama mpe bandinga yankaka yandi ke zonza na bantu yayi.

Na yina yandi tubaka, Yayi kele . . . (yinki? kuzitisa ya saba!) . . . kupema kisika na yina beno lendaka bika muntu ya kulemba . . . (“Beni kwiza na Munu beno nyonso yina kele ya kulemba mpe bizitu ya mingi.”) . . . lendaka bika muntu ya kulemba kupema; mpe yayi kele yina ke pemisaka: kasi bawu zolaka ve kuwa.

112 Na wapi ntangu yawu kusalamaka? Bamvula bankama sambwadi na kumi zole na ntwala ntangu na Kilumbu ya Pantekote bikoba ya lukukama kukotaka na kisalu na bantu mpe bawu nyonso vwandaka ya kifuluka na Mpeve-Santu mpe bandaka na kuzonza na bandinga yankaka mpe, Mpeve-Santu bakaka baluzingu ya bawu, mpe sukisaka na bawu bima ya yinza. Na yina bawu kotaka na Kupema na Klisto. Paul ke tuba, na Hébreux kapu ya 4, “Beto bayina me kota na kupema ya Yandi me sukisa na bakusala nyonso ya yinza mutindu Nzambi salaka na kilumbu ya ngidikulu ya Yandi, Yandi kotaka na kupema ya Yandi, mpe beto ke kota na Yandi na manima bisalu ya beto ya yinza me luta.” Beno tala Saba ya beno ya kieleka, ya kieleka.

113 Na yawu Paul kubakamaka mpe kotaka na Mpeve yango ya Saba, mpe natamaka na Mpeve-Santu nzila nyonso tii na kilumbu ya Mfumu.

114 Samu na yinki beto kele na bamvita? Samu na yinki beto kele na bankwamusu? Samu na yinki yinsi ke telemina yinsi? Yesu kwizaka, Mwana ya ntinu ya Luzingu, mpe bawu kufwaka Yandi.

115 Na basabala fyoti, to mpe bilumbu yayi, beto ke tala Saint-Nicolas mpe ba-renne mpe—mpe kuwa kubula bangunga mpe mitindu nyonso ya bima ya kukangisa, ya kele nkinzi ya mimpani. Ya kele dyambu ya dibuundu ya Katolika. Bantu ke manisa mbingo mingi mpe ke pesana bakado mpe bima mutindu yina, kimupani! Nowele kele kilumbu ya kusambila.

116 Mpe dyaka, Klisto kubutamaka ve na kilumbu ya makumi zole na tanu ya Ngonda ya kumi na zole mpe ve. Yandi zolaka butama ve. Kana beno me vwandaka na Judée, bamongo ke fulukaka na mvula ya mpembe, kulutila na yina kele awa. Yandi butamaka na Ngonda ya yiya ntangu bima nyonso ya yinza ke basikaka.

117 Ntangu yayi, kasi ya kele kinkulu ya bawu. Mpe samu na yinki—samu na yinki beto ke salaka bima yango? Samu beto ke landaka binkulu ya bantu na kisika ya balutumumu ya Nzambi. Bawu . . . Kima ya mutindu yina zolaka vwanda ve na lukumu, kasi bawu me sala kaka yawu kilumbu ya kusala mumbongo. Ya kele nsoni, mawa na bawu na kusalaka bima ya mutindu yina. Nkinzi ya mimpani! Wapi kisika Saint-Nicolas kele na kima ya kusala na Yesu? Wapi kisika kalumbu ya Paki to nsusu to . . . ya kutula tinta na mutindu mosi ya tinta to kima mosi, to mutindu mosi ya bakalumbu ya fyoti ya mpembe kele na kima ya kusala na mvumbukulu ya Yesu Klisto? Beno ke mona ve mutindu yinza ya mumbungu . . . ?

118 Ya kele samu na yina bawu ke tekisaka babuku yayi ya rock-and-roll, mpe bafoto ya mvindu, mpe ya buzoba, mpe bima ya mutindu yina, ya kele nkadulu ya bantu na kulula buzoza ya mutindu. Ya kele samu ti ya kele na kima ya yimbi na kati ya

ntima, bawu me kotaka ntete ve na Kupema na Nzambi mpe me sukisa na bima yayi. Ntangu bawu ke kota na yawu mpe ke yamba Mpeve-Santu, kuna bawu ke manisa na yinza mpe bima ya yinza.

119 Nzambi nataka yandi. Oh, mu ke kwikila ve ti ba bakaka yandi mutindu Paul, ntangu yayi, na zulu na mazulu ya tatu mpe monaka bima. Mbote, Mpeve-Santu ya ntalu salaka basabala fyoti me luta, awa, ti mu mona. . . Na bampova yankaka, Mu vwandaka na boma ya lufwa, mpe Mpeve-Santu bakaka munu mpe lakisaka munu yinki ya vwandaka. Beno kuwaka kimbangi. Kuna ntangu mu vutukaka, “Na yina, lufwa, wapi kisika kele ntunga ya nge?” Ba nataka munu kumona yinki vwandaka kaka na manima ya lele ya nela. Yandi bikaka munu kuvutuka samu na kutuba na beno ti na manima kuna beto kele ve mikuyu mpe bampeve, beto kele babakala mpe bakento, ntwenya, ke kufwa ata mbala mosi ve, ke bela ata mbala mosi ve, kaka na manima ya vwale. Lufwa lenda sala beno mingi ve ya kulutila kana kubenda kaka beno na Kisika yango.

120 Ntangu yayi, ba nataka Jean katuka kisanga ya Patmos, na Kimpeve, na kati ya kilumbu ya Mfumu. Yayi kele kilumbu ya bantu, bantu ke na kunwana, kasi kilumbu ya Mfumu ke kwiza ntangu bimfumu yayi ke kuma bimfumu ya Mfumu ya beto mpe ya Klisto ya Yandi, kuna ya ke vwanda Millenium ya nene. Kilumbu ya Mfumu, kilumbu ya nkwezulu ya Yandi, ya lufundusu ya Yandi, ya ke vwanda kilumbu ya Mfumu.

121 Yayi kele kilumbu ya bantu, ya kele samu na yina bawu ke kangaka beno mwelo bisika nyonso mpe ke sala nyonso yina bawu zola na beno, kasi ya ke vwanda na ntangu. . . Bokila beno. . . bawu ke bokila beno ntangu yayi, “ba-exalté mpe ba-fanatiki,” kasi ya ke na ntangu ke na kwiza, beno me mona, ti bawu ke sala yawu ve. Bawu ke looka mpe ke dila na ngolo mpe ke kubwa na makulu ya beno. Biblia ke tuba, na Malachie 4, beno ke tambula mpe na zulu ya bombi na manima bawu me kuzika na tiya; ya ke bikana na ata nsimbulu to divala. Ya kele kieleka yina Biblia ke tuba, “Bantu ya kulunga ke tambula na zulu ya bombi ya bantu ya yimbi.” Ya kele kieleka. Ya ke bikana ve na nsimbulu to divala, kima ve samu na kuvutuka. Mpe ya ke vwanda yimeni. Ntangu yayi yayi kele kilumbu ya muntu (bakusala ya muntu, bisalu ya muntu, dibuundu ya muntu, mabanza ya muntu), kasi kilumbu ya Mfumu ke na kwizaka.

122 Ntangu yayi, yandi vwandaka na Kimpeve na kilumbu ya Mfumu. Mbote mingi, mpe kima ya ntete yandi kuwaka ntangu yandi vwandaka na Kimpeve na kilumbu ya Mfumu. . . Ntangu yayi beto kele na nzila ya 10:

. . . na Mpeve na kilumbu ya Mfumu, mpe yandi kuwaka. . . mosi. . . ndinga, mutindu. . . mpungi,

¹²³ Beto bika ve kingana mosi kuluta, ntangu yayi. Kana beto fwana baka yawu mbasi, beto lenda baka yawu, beno me mona. Ti muntu landa kaka ngunga, ti mu luta yawu ve.

¹²⁴ Mbote mingi, ntangu yayi, “. . .vwandaka na Kimpeve na kilumbu ya Mfumu.” Ntangu yayi beno bambuka moyo, kima ya ntete beno fwana sala kele yinki? Kukota na Kimpeve. Wapi mutindu baluzayikisu yayi ke kwiza ntete na beno? Na kukotaka na Kimpeve. Wapi mutindu ntete beno ke kuzwa Mpeve-Santu? Na kukotaka na Kimpeve. Na kukotaka na Kimpeve!

¹²⁵ Ntangu beno vwandaka musumuki mpe ti beno kwendaka na kubina, beno vwandaka kota na mpeve *yina*. Oh, la la, beno vwandaka banda na kubula maboko mpe kunikisa makulu, mpe vwandaka sala makelele, mpe vwandaka losa yimpu ya beno na ntoto, mpe vwandaka kwenda awa mpe awa, na kusalaka mutindu muntu me lawuka. Beno vwandaka na mpeve ya yawu. Beno lenda banza na muntu, yina vwandaka yina ke sakanaka ve na kubina, kukwenda na kubina, yandi ke tuba, “Mbote, mpe beno nyonso ke na kuzwa kieleka ntangu ya mbote, mu banza.”

“Oh!” bawu ke tuba. “Nge tapisserie, basika awa!” Beno me mona?

¹²⁶ Beno kwenda tala nsaka ya ballon, muntu ke kotisa but, to kima yankaka, beno ke vwanda mpe ke tala, mpe ke tuba, “Mbote, mu banza ya kele na kutala mbote.” Ve, beno lenda vwanda ve muntu ke zolaka baseball, beno lenda vwanda ve mosi ya kieleka. . . beno lenda vwanda ve na mpeve ya baseball. Ntangu muntu ke kotisa but, beno ke telama mpe ke boka, “Fiu! Oh! Ya me kota!” Beno ke bwisisa yimpu ya yintu ya muntu mutindu *yina*, muntu ve ke tuba dyambu samu na yawu.

¹²⁷ Na yina na dibuundu ntangu beno ke kota na Mpeve, beno ke telama mpe ke boka, “Nkembo! Aleluya! Nkembo na Mfumu!”

Muntu ke baluka, ke tuba, “Exalté.” (Oh, Mpangi Wood. . .)

¹²⁸ Mu ke pesa beno kyuvu. Kana beto kele ba-exalté samu ti beto ke salaka yina, na yina bawu kele ba-exalté *ya yimbi* na ngaanda kuna. Mu ke zola kuvwanda exalté (Beni ve?) na kuvwanda muntu ya busantu ve. Oh! Kieleka! Ba-exalté ya yimbi.

¹²⁹ Ntangu yayi, yandi kotaka na Kimpeve. Yandi kotaka na Kimpeve, kuna bima bandaka na kusalama. Mpe kuna ntangu yandi kotaka kuna, yandi kuwaka mpungi. Ntangu yayi, mpungi ntangu nyonso ke samunaka kubelama ya kima mosi. Mutindu ntangu beno ke kwiza. . . Ntinu ke na kubelamaka, ba ke bula mpungi. Ntangu Yesu ke belama, Yandi ke bula mpungi. Ya kele kieleka? Ntangu Joseph vwanda basikaka, ba vwanda bulaka mpungi. Mpe ntangu yayi kima ke na kwiza kusalama, Jean kotaka na Kimpeve mpe yandi kuwaka mpungi. Yandi kuwaka mpungi, mpe yandi balukaka na kutala yina vwandaka na

manima ya yandi ntangu yandi kuwaka mpungi; na manima yandi me kota na Kimpeve.

¹³⁰ Ya lendaka vwanda ti yandi vwandaka bina, vwandaka tambula bisika nyonso ya kisanga. Yandi vwanda kuzwa ntangu mosi ya mbote, yandi vwandaka na Kimpeve. Na yawu, mpe yandi. . . Ya lendaka wakana mutindu kuvwenza, kasi mu zola ve kutuba yawu mutindu yina, beno me mona. Yandi lendaka! Ya kele. . . mbote, ya lendaka vwanda ti yandi salaka yawu. Mu banza ti yandi vwanda kuzwa ntangu mosi ya mbote na Kimpeve, na kukembilaka kaka Nzambi, samu ti ya kele kieleka yina salamaka ntangu Mpeve kubwaka na zulu ya bawu na kisika ya ntete. Ntangu Mpeve-Santu kubwaka na zulu ya bawu, bawu vwandaka kwenda tengu-tengu mutindu babakala mpe bakento ya kulawuka malafu, mpe vwandaka sala mutindu ti bawu vwandaka ya kulawuka malafu, mpe kuzonza ndinga ya kuzabana ve. Mpe kubo-. . . na kulandilaka mutindu yina tii bantu tubaka, “Bantu yayi kele ya kifuluka na vinu ya malumu.” Ya kele mutindu bawu salaka na mbala ya ntete, na yawu ntangu Mpeve ke kwiza dyaka, kukondwa ntembe yandi ke sala mutindu mosi. Beno me mona? Ya kele ve na kima ya malumu na yayi—na kima yayi, yayi kele nsambulu ya *ntangu ya ntama*. Yinga.

¹³¹ “Na Kimpeve na kilumbu ya Mfumu.” Ntangu yayi, beto zola kuwa yawu. Ntangu yayi yinki? Ntangu yayi, yinki yandi vwandaka sala? Ba nataka yandi katuka kisanga awa, na Kimpeve, na kilumbu ya Mfumu. Mpe kaka na ntangu yandi kotaka na kilumbu ya Mfumu, ti yandi kuwaka mpungi. Yinki ya kele? Ya kele Muntu ke na kubelama. Muntu ya nene ke na kubelama. Mpungi ke wakana, Muntu ke na kwiza! Yandi talaka! Alleluia! Mpungi:

Na kutubaka, mu kele Alpha mpe Omega, ya ntete mpe ya nsuka: . . . (nsamununu ya muntu ya zole to ya muntu ya tatu ve, kasi ya Muntu kaka mosi). . . Mu kele nyonso zole Alpha mpe Omega, . . . (“Ntete Mu lakisa beno kima, mu zola ti beno zaba nani Mu kele!”)

¹³² Ya kulutila nene ya baluzayikisu nyonso kele Bunzambi, Bunene ya Bunzambi ya Mfumu ya beto Yesu Klisto. Beno lenda kuma ve na lufulu ya ntete ti beno kwikila yawu, kubasika. . . Ya kele samu na yina Pierre tubaka, “Beno balula ntima, mpe kuna beno mona Bunzambi. Beno botama na Nkumbu ya Yesu Klisto samu na lemvo ya masumu ya beno, mpe kuna beno me yilama na kukota na Kimpeve.” Kima ya ntete beno fwana zaba kele Bunzambi ya Klisto. “Mu kele Alpha mpe Omega! Mu kele A tii Z, ya kele na ya kulutila ve kasi Munu. Mu vwandaka na mbandukulu, Mu ke vwanda na nsuka. Mu kele Yandi yina vwandaka, yina kele, mpe ke kwiza, ya Ngolo nyonso.” Beno banza na Yawu! Ya kele yina mpungi tubaka.

133 Sala keba Jean! Nge me kota na Kimpeve, kima ke monana na nge. Yinki ya kele? Makelele ya mpungi, kima ya ntete, “Mu kele Alpha mpe Omega.” Ya ntete ya baluzayikisu nyonso. (Oh, musumuki, fukama, balula ntima ntangu yayi ntete ntangu luta mingi.) “Mu kele Alpha mpe Omega.” Ya kele kima ya ntete yina Yandi bikaka yandi kuza, nani Yandi vwandaka. (Nani kele yayi ke na kubelama? Yayi kele Ntinu Yesu? Ntinu Nzambi? Ntinu Mpeve-Santu?) Yandi tubaka, “Mu kele nyonso ya Yawu! Mu kele A tii Z. Mu kele mbandukulu mpe nsuka. Mu kele Yina ke kufwaka ve, Muntu ya Seko!”

134 Kaka mwa fyoti ntama beto ke tala Yandi mbote na bima sambwadi ya bumuntu ya Yandi, kuna beno tala mbote yina Yandi kele. “Mu kele mbandukulu mpe nsuka. Mu kele Alpha mpe Omega, ya ntete mpe ya nsuka. Mu vwandaka ntete ya vwanda na ntete; mpe na manima ya kele dyaka ve na nsuka, Mu ke vwanda dyaka kuna,” na bampova yankaka. “Ya ntete mpe ya nsuka!”

...mpe, Yina nge ke mona, sonika na buku, mpe fidisa...na mabuundu sambwadi yina kele na Asie; na Ephèse, ... Smyrne, ... Pergame, ... Thyatire, ... Sardes, ... Philadelphie, mpe tii Laodika.

135 Mbote mingi, ya ntete ya baluzayikisu nyonso kele Bunene ya Bunzambi ya Yesu Klisto. Beno fwana zaba nani Yandi kele ntangu beno ke kuwa Ndinga. Mbote mingi, Ndinga mosi yina wakanaka na Mongo ya Sinaï, Ndinga mosi yina wakanaka na Mongo ya Kukituka, yina Mosi kaka, “Mosi mutindu Mwana ya muntu.”

136 Ntangu yayi beno tala mbote na nzila yayi yina ke landa. Mbote mingi:

Mpe mu balukaka . . . (Kapu 12 ntangu yayi.)

137 Beto ke bika kaka mabuudu yayi kaka ntangu fyoti, samu ti sabala nyonso yayi yina ke na kwiza kele samu na mabuundu yayi. Beno me mona, beto ke luta kaka na zulu ya yawu.

138 Kasi Yandi tubaka, “Bayayi...Mu ke twadisa nge na kufidisa Nsangu yayi yina Mu me lakisa nge.” Nani ya kele? “Mu kele ya ntete mpe ya nsuka. Mu kele Muntu ya Bunene. Mu kele Muntu ya Ngolo nyonso. Mpe Mu me kwiza tuba na nge ti mu ke na kupesa nge Nsangu samu na mabuundu sambwadi. Mu zola nge kusonika Yawu, kukubika Yawu.” Beno me mona? “Mpe na mabuundu sambwadi yina kele na Asie.” Ntangu yayi, ba vwandaka mabuundu kuna na kati ya bawu yina nkadulu vwandaka monisa mabuundu ya bansungi yayi yina vwandaka kwiza.

139 Ntangu yayi:

Mpe mu balukaka na kumona ndinga yina zonzaka na munu. Mpe na kubalukaka, mu monaka minda sambwadi ya wolo;

¹⁴⁰ “Minda sambwadi ya wolo.” Ntangu yayi, ya kele... Mbanguululu ya Roi Jacques, yina kukondwa ntembe kele na beno to dyaka Scofield to—to ya lendaka vwanda Thompson Chain, to mosi ya bawu, ya kele ve ya kulunga kuna. Ya ke tuba ve minda, ya ke tuba bisimbidi minda; mu banza, ya kele kieleka, makulu ya minda, mpova ya kulunga landila mbanguululu ya ntete. Beno me mona, na bampova yankaka, minda sambwadi ya wolo yayi vwandaka mabuundu sambwadi. Yandi ke tuba mwa fyoti na ntuala, basa- . . . na nzila ya 20 awa, “Minda sambwadi yina nge monaka kele mabuundu sambwadi.” Na yawu, beno me mona, kana ya vwandaka buzi, ya zolaka nyenga ntangu mingi ve mpe kufwa, na ntangu kaka mwa fyoti. Kasi ya kele ve babuzi, ya kele dikulu ya mwinda. Yandi pesaka yawu mutindu dikulu ya mwinda. “Na kubalukaka mu monaka mosi mutindu Mwana ya muntu ya kutelama na kati-kati ya . . . na kati-kati ya makulu ya minda sambwadi.”

¹⁴¹ Ntangu yayi—ntangu yayi beno tala. Buzi zolaka kufwa na mbangu, ya zola kufwa, ya zolaka vwanda dyaka ve, na bangunga fyoti ya zola kufwa. Kasi dikulu ya mwinda, dikulu ya mwinda kele mutindu yayi, . . .

¹⁴² Ntangu yayi, beto—beto baka Masonuku awa, beto—beto baka Zacharie 4:1 na yina beto lenda na kutala kuzwa na Zacharie kuna yina beto zola. Zacharie 4:1, mpe mu banza kuna ti na kati ya yayi beto ke lenda na—na kubasisa kintwadi yina beto zola. Mu lenda tala ve Zacharie na kati ya Sophonie, mu lenda? Mbote mingi. Mbote mingi. Biblia ya munu ya ntama me beba. Zacharie 4:1, beno kuwa mbote ntangu yayi, beno ke kuzwa kizizi ya kitoko awa:

Mpe wanzio . . .

¹⁴³ Profete, awa, kaka bamvula bankama tanu mpe kumi na yivwa ntete Klisto:

Mpe wanzio yina zonzaka na munu kwizaka dyaka, mpe vumbulaka munu, mutindu muntu yina ba ke vumbulaka na mpongi, mutindu muntu yina ba ke vumbulaka na pongi, (Ntangu yayi profete kele na kati ya vision.)

Mpe yandi tubaka na munu, Yinki nge ke mona? Mpe mu tubaka, mu me tala, mpe beno tala ya vwandaka mwinda (Ntangu yayi, mpova mosi yango ba me bangula “dikulu ya mwinda.”) mwinda nyonso na wolo . . . na zulu ya yawu, (Yina vwandaka mwinda.) mpe minda sambwadi ya yawu na zulu, mpe bansinga sambwadi na minda sambwadi, yina kele na zulu ya yawu: (Beno me

mona, bansungi ya dibuundu mosi kutalana. Beno me mona?)

Mpe bayintu zole ya olive na yawu, . . . (Ntangu yayi, wapi mutindu ya . . . Yinki ba vwandaka kupelisa na minda yango na ntangu ya Biblia? Ya kele na muntu zaba? Mafuta. Wapi mutindu ya mafuta? Mafuta ya Olive.) . . . *bayinti zole ya olive . . .* (Yinki ya kele? Ngwisani ya Malu-malu mpe ya Ntama; nyonso zole kele ya kutelama na lweka ya yawu.) . . . *mosi na lweka ya bakala ya ndonga, mpe yankaka na lweka ya kento ya yawu.*

Mpe mu pesaka mvutu mpe zonzaka na wanzo yina zonzaka na munu, na kutubaka, Yinki kele yayi, mfumu ya munu?

Mpe wanzio yina zonzaka na munu pesaka mvutu mpe tubaka na munu, Nge zaba ve yinki yayi—yayi kele? Mpe mu tubaka, Ve, mfumu ya munu.

Mpe yandi pesaka mvutu mpe zonzaka na munu, na kutubaka, Yayi kele ndinga ya MFUMU na Zorobabel, na kutubaka, Na ngolo ve, na ngolo mingi ve, kasi na mpeve ya munu, me tuba MFUMU ya basoda. (Yandi ke vutula Jérusalem.)

¹⁴⁴ Ntangu yayi, yinki kele mwinda? Ya kele dikulu ya mwinda. Mpe beno tala mutindu ya kele kitoko. Ntangu yayi, ntangu yandi balukaka, yandi monaka Muntu yayi mutindu Mwana ya muntu awa ya kutelama na kati-kati ya makulu ya minda sambwadi ya wolo, yina zola kutuba bansungi sambwadi ya dibuundu yina ke kwiza. Mpe konso nsinga, to—to dikulu ya mwinda, vwandaka ya kukangama na encenseur ya nene ya mafuta ya kieleka. Mpe na mafuta yayi vwandaka kwiza na zulu mwa mwinda ya fyoti ya kuzenga ya ntama yina vwandaka na nsinga na yawu mpe nsinga vwandaka na kati ya mafuta. Mpe ntangu nyonso. . . Bawu vwandaka dukula mafuta na zulu ya dikulu, yina vwandaka fulusa tiyó ya nene ya kieleka, mpe kukabuka ya nene, mpe ya vwandaka kwenda na batiyó, mutindu yayi. Mpe mwinda na nsinga vwanaka kubwa na yisi, nsinga yayi—yayi na kati. . . vwanaka landila na kupela, kilumbu mpe mpimpa. Beno ke zola kunamisa yawu ve, ya vwanaka kufwaka ve; ba vwanaka dukulaka kaka mafuta na singa ya kieleka. Mpe makulu ya mwinda yayi yina vwandaka basika mutindu yayi, vwandaka na minda ya kuvwanda na zulu ya yawu. Nsinga na mwinda vwandaka kuluka na kati kuna, na kuzwaka luzingu ya yawu na ngaanda ya awa. Oh, wapi luswaswanu ya kele na buzi. Wapi mutindu ya luswaswanu! Ya kele dikulu ya mwinda, mpe ya ke na kubenda mafuta.

¹⁴⁵ Ntangu yayi, makulu ya mwinda yayi, tiya yina vwandaka na makulu ya minda yayi na Ngwisani ya Ntama. Ntangu ba

vwandaka namisa mwinda mosi, ba zolaka namisa ve mwinda yina vwandaka landa na tiya mosi yina vwandaka na diboko ya bawu. Ba vwandaka namisa mwinda mosi, na manima kubaka yawu mpe kunamisa mwinda yankaka, na manima kutula yawu na yisi. Mpe vwandaka namisa mwinda yayi, mpe na manima kubaka mpe kunamisa mwinda yayi na tiya mosi yina bawu bandaka na mbandukulu. Oh, mu banza ti ya ke luta yintu ya beno ve. “Yesu Klisto mutindu mosi mazono, bubu yayi, mpe kukonda nsuka,” tiya mosi (Mpeve-Santu) ke namisa mosi na mosi ya mabuundu yango nzila nyonso ya bansungi.

¹⁴⁶ Yesu tubaka ve na Santu Jean 15, “Mu kele vinu, beno kele mavala”? Ntangu yayi, Yandi kele Vinu ya kieleka, beto kele bintala. Ntangu yayi, vinu ke pesaka ve mbuma. . .

¹⁴⁷ [Kisika ya mpamba na bande—Mu.] . . ti beno lenda baka yinti ya dilala, mutindu dilala, mpe beno lenda baka dikasa ya—ya, mbote, mu ke tuba, yinti ya dilalanzi, mpe beno sala mwa kisika na yinti ya dilala mpe beno kotisa yawu na dilalanzi, ya ke mena. Beno kwenda na lweka awa mpe beno baka dikasa ya dilala ya ngayi mpe beno kotisa yawu na yinti ya dilala, ya ke mena, to beno baka grenade, mpe beno baka yawu, to, yinti nyonso ya dilala, mandaline, tangelo, mosi ya bambuma yango ya malala, mpe beno kotisa yawu na yinti yayi, mpe ya ke mena na luzingu ya yinti ya dilala yina; kasi ya ke buta ve malala. Ya ke buta malalanzi, ya ke buta ba-tangelo, ya ke buta malala ya ngayi, kasi ya ke mena na luzingu ya vinu ya kieleka, kasi kana vinu yina buta vinu yankaka. . . kintala yankaka, ya ke vwanda na luzingu mosi yina kele na kati ya yawu, ya ke buta dilala. Samu ti, na mbandukulu, na musisa ya yawu kele luzingu ya yinti ya dilala, kasi bayankaka lenda zinga na yawu ntangu nyonso ya kele na nkadulu ya dilala. Kasi ya lenda buta ve mbumba ya ntete, samu ti ya kele ve na ya ntete.

¹⁴⁸ Ya kele mutindu dibuundu kele. Bawu me sala Vinu mpe me bwela ba-Presbytérien, ba-Méthodiste, ba-Baptiste, mpe nyonso yankaka mutindu yina. Ya ke na kubutaka mbuma ya ba-Baptiste, mbuma ya ba-Presbytérien, ya ba-Méthodiste, kasi ya . . . yinti yina ke buta vinu yankaka, ya ke vwanda mutindu mosi ya vinu yina Yawu butaka na Kilumbu ya Pantekote: Vinu ya ntete! Ya ke zonga na bandinga mpe ke kuzwa ngolo mpe bidimbu ya mvumbukulu ya Klisto na kati ya yawu. Samu na yinki? Samu ti ya ke na kumenaka na kisina ya yinza yina kele ya kukunda na kati. Kieleka, ya kele ve ya kukuna na kati ya yawu, ya kele ya kubuta na kati ya yawu! Nkembo na Mfumu! Oh, la la! Mu banzaka ntete ve na yawu kana kaka awa.

¹⁴⁹ Beno me mona, bayankaka yayi kele ya namika; ba namikaka bawu na yinti, na yawu bawu ke buta mutindu ya bawu mosi ya mbuma. Ba lenda baka *Yayi* ve. Ba ke kwikila na *Yina* ve, samu ti ba zaba ve kima na yina me tala Yawu. Kasi kana bawu kele ya kubutama na Luzingu mosi yango yina ke basika na yinti yina,

ya kele kaka kima bawu lenda buta, ya kele Luzingu ya yinti ya ntete.

¹⁵⁰ Makulu ya mwinda yayi nyonso ke lunga na kati ya ndonga mosi ya nene kisimbidi mosi ya nene, mpe yivwa ya kuswaswana. . . to bisimbidi sambwadi yankaka ke basika na yawu. Mpe ntangu ba salaka, mosi na mosi ya bansemo yango vwandaka benda na kisina ya kieleka ya luzingu ya yawu. Mpe nsemo ya yawu vwandaka samu ti ya vwandaka na buzi ya yawu ya kukota na yisi na ngungulu yayi ya kieleka. Oh, wapi kizizi ya kitoko ya mosi ya bambwetete sambwadi yango (ya vwandaka monisa yawu) na luzingu ya yandi na tiya na Mpeve-Santu awa. Mpe ya . . . Na lukwikilu yandi ke na kupela na Mpeve-Santu, mpe luzingu ya yandi kele buzi, to buzi ve, kasi nsinga yina kele ya kukota na kati ya Mpeve-Santu (na kati ya Klisto), mpe na nzila ya singa yango yandi ke benda Luzingu ya Nzambi samu na kupesa Nsemo na dibuundu ya yandi. Oh, wapi kizizi ya mukwikidi ya kieleka! Wapi mutindu ya Nsemo yandi ke na kupesaka? Mutindu mosi ya Nsemo yina vwandaka ntangu ba namisaka buzi ya ntete.

¹⁵¹ Ntangu nsungi ya dibuundu ya ntete kubandaka, ya vwandaka Ephèse. Paul, wanzio ya dibuundu yango, vwandaka mosi ya bambwetete. Ya kele na bambwetete sambwadi yina zola kutuba bawanzio sambwadi, “minati-nsangu” sambwadi. Sabala yayi mu lenda baka Masonuku mpe disolo mpe kulakisa beno ti mosi na mosi ya bayango kele kieleka na konso wanzio, mpe konso wanzio vwandaka na Nsemo mosi. Ya kele kieleka. Mpe kuna na kati-kati ya bansungi yayi, ya kele na Mosi ya nene ke na kwiza.

¹⁵² Beno tala, ntangu yayi ba ke na kubenda na ngungulu yayi ya Mafuta ya kieleka, Nsemo. . . luzingu kele ya kukota na Klisto. Beno kele ya kufwa, mpe luzingu ya beno kele ya kubumbama na Klisto na nzila. . . to ya kubumbama na Nzambi na nzila ya Klisto, mpe ya kutula kidimbu na Mpeve-Santu. Ya kele na ata mutindu ya fyoti ve yina lenda katula beno kuna. Wapi mutindu beno lenda sala yawu? Muntu ve lenda vuna beno. Nsuka ya luzingu ya beno ke na kunyenga na Mpeve-Santu; oh, ke na kunyenga, na kupesaka Nsemo. Wapi kisika nsuka yankaka ya luzingu ya beno ke kota? Na kati ya Klisto. Beno kele ya kufwa mpe ya kubumbama na Klisto, Mpeve-Santu, ke na kukangaka yawu kuna ti beno lenda. . . dyabulu lenda simba beno ve. Amen! Yandi lenda sala muyosi mpe kusala makelele. Mpe lufwa yawu mosi lenda simba beno ve, “O lufwa, wapi kisika kele ntunga ya nge? Wapi kisika kele lunungu ya nge? Matonda na Nzambi yina ke pesa beto kununga na nzila ya Mfumu ya beto Yesu Klisto.”

¹⁵³ Nsuka ya nzila yayi, beto tanga yawu:

Mpe na kubalukaka, mu monaka minda sambwadi ya wolo;

Mpe na kati-kati ya minda sambwadi wolo muntu mutindu...Mwana ya muntu,...

154 Oh! Beno me tala? Bambwetete, misimbidi minda, minda. Yinki ya zola kutuba? Yinki ya zola kutuba? Ti kilumbu yina beto ke na kuzingila kele mpimpa, babuzi mpe bansemo mpe bambwetete zola kutuba mpimpa. Mpe yinki ke salaka mbwetete? Ya ke lakisaka nsemo ya mwini tii ntangu mwini ke vutuka. Lusakumunu vwanda na Nkumbu ya Mfumu! Mpe ministere ya kieleka ya Nzambi ke lakisaka ve mwinda mosi ya torche, ya mwa yinti ya fofolo, ya dititi mosi ya kunyenga; yandi ke lakisa minzenzi ya wolo ya Klisto na Dibuundu, ti “Yandi kele mosi, mpe Yandi kele moyo, mpe Yandi ke na kulezima na munu.” Amen! Ya kele Nsemo yandi ke lakisa. Mbwetete ke lakisaka nsemo ya mwini, beno me mona, na yawu beto ke na kulakisaka Nsemo ya Mwana ya Nzambi. Na kusalaka kima mosi yina Yandi salaka, na kupesaka Nsemo. Wapi mutindu ya nsemo? Nsemo ya Nsangu ya mbote na bayango.

155 Ntangu yayi beto tala Yandi mbote kaka fyoti na mantwala, na yina beto ke baka yina bikanaka ya nzila ya 13 yayi:

Mpe na kati (ya kele kati-kati) ya minda sambwadi wolo mosi mutindu...Mwana ya muntu, ya kulwata robe tii na makulu, mpe kangaka na ntulu nsinga ya luketo ya wolo.

156 Ntangu yayi beno tala dyaka kidimbu ti malongi yayi kele kieleka na yawu na kuvwandaka kilumbu ya Mfumu. Beno me tala Yandi? Yandi vwandaka ve nganga-Nzambi na ntangu yayi, to dyaka ti Yandi vwandaka ntinu, Yandi vwandaka zuzi. Beno tala, nganga-Nzambi, nganga-Nzambi ya ntete, ntangu yandi vwandaka kwenda na sanctuaire to vwandaka kota na ministere, to na kisalu, yandi vwandaka kanga yandi mosi luketo. Na kukangaka nsinga ya luketo na luketo, yina na kutubaka ti yandi vwandaka sala; ata mbala mosi ve ti yandi vwandaka kanga yawu na zulu ya ntulu ya yandi. Kasi awa Yandi me basika, na kutambulaka na nsinga ya luketo ya kukanga na zulu, na nsinga ya laka na ntulu ya Yandi; ya kukanga na ntulu, na ntulu, na nsinga ya luketo ya wolo, ya kukanga na zulu. Yinki ya kele? Muzonzi, zuzi. Zuzi na nsinga ya yandi ya laka na zulu ya ntulu ya yandi, ya kukanga na zulu awa, na yisi ve mutindu nganga-Nzambi. Beno me mona, yina ke lakisa ti Yandi vwandaka ve na kinganga-Nzambi ya Yandi awa, Jean kwendaka nzila nyonso tii na kilumbu ya Mfumu mpe monaka Yandi kukwiza mutindu zuzi.

157 Beno ke kwikila ti Yandi kele zuzi? Beto tanga Santu Jean 5:22, na nswalu kaka, beto ke mona kana Yandi kele zuzi to ve. Santu Jean 5:22:

Samu ti Tata ke fundisaka muntu ve, kasi me pesa lufundusu nyonso na Mwana:

158 Ya kele kieleka? Yandi kele zuzi, Zuzi ya Nene. Mpe Jean lakisaka ti Yandi vwandaka ve na kilumbu ya profesu ya Yandi, mutindu profete, to dyaka ti Yandi vwandaka ya kukangama na bilumbu ya buntinu ya Yandi, kasi Yandi vwandaka na kilumbu ya Mfumu mutindu Zuzi. Ntangu yayi, bantu yikwa zaba ti nganga-Nzambi na kuvwandaka na singa na luketo ya yandi, singa ya yandi pene ya luketo ya yandi zolaka kutuba yandi vwandaka na kati ya kisalu? Muntu nyonso yina ke tangaka Bangwisani, yina zaba Ngwisani ya Ntama, zaba yawu. Ntangu nganga-Nzambi me kanga nsinga ya luketo awa, yandi kele na kati ya kisalu, yandi kele kisadi. Kasi Yandi vwandaka ya kukanga nsinga ya luketo na zulu awa, zuzi.

159 Beto tanga fyoti ntama:

. . . kangaka . . . nsinga ya luketo ya wolo . . . vwandaka na ntulu . . .

160 Ya kele kieleka, na zulu awa, Yandi vwandaka Zuzi.

Ntangu yayi beto ke tanga bima sambwadi ya nkembo ya Muntu ya Yandi. Oh, la la! Yayi ke sala munu kuboka ntete mu kuma na yawu. [Kisika ya mpamba na bande—Mu.] Beno tala! Oh, yayi kele kima mosi ya mbote. Beno kuwa kaka:

Mpe yintu ya Yandi . . .

161 Ntangu yayi beno tala mbote, Yandi bima sambwadi, awa yandi me tanga: Yintu ya Yandi, nsuki ya Yandi, meso ya Yandi, makulu ya Yandi, Ndinga ya Yandi, bima sambwadi Yandi tangaka awa, bima sambwadi ya nkembo ya Yesu Klisto. Bika mu tanga Yawu:

Yintu ya yandi mpe nsuki ya yandi vwandaka mpembe mutindu mika, ya mpembe mutindu mvula ya mpembe; . . . meso ya yandi vwandaka . . . milaka ya tiya;

. . . makulu ya yandi mutindu . . . kisengo ya tiya, mutindu kana ba me nyengisa yawu na dibulu ya tiya; mpe ndinga ya yandi . . . makelele ya bamaza mingi.

Mpe na . . . Mpe yandi vwandaka na diboko ya yandi ya bakala bambwetete sambwadi: mpe vwandaka basika na yinwa ya yandi mbele ya yinda ya meno na balweka nyonso zole: mpe kizizi ya yandi vwandaka mutindu mwini ke lezimaka na kati ya ngolo ya yandi.

162 Wapi mutindu ya vision! Yinki yandi monaka awa? Mwana ya Nzambi ya kukembila, mpe kidimbu. Ntangu yayi, ti—ti beto vwanda kaka ya kuyilama ntangu yayi.

163 Oh, la la, mu vwandaka banza ti ya vwandaka ngunga ya yivwa, ya kele ntete ngunga ya nana. Mu me banda ntete ve. Mbote mingi. Ya kele mbote. Ntangu yayi, lemvo na bampangi yayi ya babakala yina kele ya kutelama, ya ke nyongisaka munu na kumona bawu kutelama, beno me mona, samu mu zaba ti makulu ya bawu ke sala mpasi. Kana mu vwandaka kaka na

mutindu yankaka bankundi, ya kima mu lendaka sala, kieleka mu zolaka sala yawu. Ntangu yayi, mu zola beno kubakula yayi mbote-mbote. Mpe beno vwanda mwa ntangu fyoti mpe ti Nzambi pesa beno musendo ya mfunu, ya kele kisambu ya munu.

¹⁶⁴ Ntangu yayi—ntangu yayi beno tala, kima ya ntete, ntangu yayi beno tala, yintu ya Yandi mpe nsuki ya Yandi vwandaka mpembe mutindu mika. Yintu ya Yandi mpe nsuki ya Yandi vwandaka mpembe mutindu mika. Ntangu yayi, ya ke zola ve kutuba ti, mvula ya Yandi vwandaka yina salaka yayi. Ya vwandaka ve samu na yina. Mvula ya Yandi vwandaka ve yina salaka yayi. Yandi vwandaka . . . Ya vwandaka samu na nzingulu ya Yandi mpe mutindu mpe ndwenga ya Yandi. Samu ti Yandi kele Seko, mpe Seko lenda vwanda na mvula ve. Beno me bakula?

¹⁶⁵ Beto baka ntete, mpe beto ke—beto ke tala kizizi ya Yandi awa mutindu yayi, mpe beto ke tala yina Yandi kele. Ntangu yayi, beto baka Daniel 7:9, kaka minuti mosi, beno ke mona kizizi mosi na Daniel kisika Yandi kwizaka mutindu . . . awa mutindu Kuluntu ya ntangu. Mpe mingi ya bantu, kizabi ya Biblia, zaba kieleka kisika beto ke na kwenda ntangu kaka yayi. Daniel 7, mpe nzila ya 9; mu ke banda na 8:

Mpe mu vwandaka tanga dimpoka, mpe, beno tala, kuna me basika . . . dimpoka yankaka ya fyoti, na yina na ntwala—na ntwala ba katulaka mampoka tatu ya ntete na misisa: mpe, beno tala, na dimpoka yayi ya vwandaka meso mutindu meso . . . muntu, mpe yinwa yina vwandaka zonza bima ya nene.

Mpe mu vwandaka tala tii ba vwandaka tula bakiti ya kintinu, . . .

¹⁶⁶ Ntangu yayi beno kuwa. Beno kuwa mbote, ntangu yayi. Beno lenda kuwa munu mbote na manima? Beno tuba “Amen,” kana beno lenda. Mu me yufula kento ya munu na manima kuna. Mu banza ti kinzonzolo yayi awa kele. . . ya mingi moyo awa, mutindu yina ve? Ntangu yayi, mu ke na kuzonzaka mingi na ngolo, mu banza, na yandi yayi.

¹⁶⁷ Mbote mingi, ntangu yayi Daniel 7:9:

Mpe mu vwandaka tala tii ba vwandaka tula bakiti ya kintinu, mpe Kuluntu ya bilumbu vwandaka, yandi yina ba-robe vwandaka mpembe mutindu mvula ya mpembe, mpe nsuki ya yintu ya yandi vwandaka mutindu . . . mika ya kieleka: (Kuluntu ya bilumbu.) kiti ya yandi ya kintinu vwandaka mutindu mulaka ya tiya, mpe makulu ya yandi vwandaka mutindu tiya ke na kunyengaka.

Mpe banzadi mosi ya tiya—ya tiya vwandaka luta mpe vwandaka basika na ntwala ya yandi: mpe mafunda mafunda sadilaka yandi, mpe mafunda kumi

na bambala . . . kumi telamaka na ntuala ya yandi: mpe bazuzi vwandaka, mpe babuku zibukaka.

168 “Nsuki ya mpembe!” Nyonso . . . muntu nyonso zaba ti ya kele bazuzi ya ntama na bilumbu ya ntama. Mutindu bazuzi ya Kingelesi vwanda lwataka na pelike ya mpembe ya mutindu mvula ya mpembe. Bantu yikwa ke bambuka moyo na yawu? Bazuzi ya ntama vwanda lwataka perruque ya mpembe samu ti bawu vwandaka . . . Mpe awa Yandi kele, ke lakisa dyaka ti Jean na kilumbu ya Mfumu, yandi monaka Yandi mutindu zuzi. Amen! Ve mutindu nganga-Nzambi, ve mutindu ntinu, ve mutindu profete, kasi mutindu zuzi. Tata (Ya kele Santu Jean 5:22) pesaka Yandi lufundusu nyonso. Mpe Yandi kele zuzi ntangu yayi, ke kwiza na kufundisa bayinsi. Oh samu na kilumbu yangi ntangu beno ke mona Yandi mutindu yina! Nsuki ya Yandi vwandaka mutindu mvula ya mpembe, Daniel monaka Yandi kukwiza na Kuluntu ya bilumbu. Beno tala Yandi mbote kuvukisa zole yayi kintwadi. Mbote mingi:

. . . mpe bazuzi vwandaka, mpe babuku zibukaka.

Mpe mu talaka kuna samu . . . Mpe mu talaka kuna samu na ndinga ya bampova ya nene—ya nene yina dimpoka . . . (Ve, mu me baka kisika ya yimbi, mutindu yina ve?)

169 Daniel 7:9, yinga, awa beto kele:

. . . mpe makulu ya yandi . . .

Mpe nzadi mosi ya tiya vwandaka luta mpe vwandaka basika na ntuala . . . ya . . . yandi: mpe mafunda kumi kwizaka mpe sadilaka yandi, . . .

Mpe mu talaka kuna samu na ndinga ya bampova ya nene yina dimpoka vwandaka zonza: mpe mu talaka mpe tii ba kufwaka kibulu, mpe nzutu ya yandi vwandaka ya kubebaka, mpe pesamaka na batiya na kunyenga. (Uhm!)

Na yina samu na bayankaka ya bibulu, ba katulaka bawu kuyala ya bawu nyonso: (ya kele mangolo nyonso ya Bantu ya makanda mpe bimumu ke kubwa) kasi ba bwelaka bawu baluzingu na nsungi mpe ntangu mosi.

Mpe mu monaka na vision ya mpimpa, mpe, beno tala, mosi mutindu Mwana ya muntu kotaka . . . na matudi ya mazulu, . . . (Wapi mutindu beto monaka Yandi kukwiza na suka yayi, na nzila ya 3? Kwizaka na matuti ya mazulu, Mwana ya muntu.) . . . mosi mutindu na Mwana ya muntu kotaka na matudi ya mazulu, mpe yandi kwizaka na Kuluntu ya bilumbu, mpe ba nataka yandi ya pene-pene na ntuala ya yandi.

Mpe kuna pesamaka na yandi kuyala, mpe nkembo, mpe kimfumu, mpe bantu nyonso, bayinsi, . . . bandinga,

zolaka sadila yandi: kuyala ya yandi yayi kele kuyala ya kukonda nsuka, yina ke luta ve, mpe kimfumu ya yandi ke . . . kimfumu ya yandi yina ke beba ve.

170 Beno kwiza na Kuluntu ya bilumbu yandi yina nsuki vwandaka mpembe mutindu mika. Mpe Jean balukaka mpe yandi monaka mosi mutindu Mwana ya muntu ya kutelama na kati-kati ya minda sambwadi ya wolo, na nsuki ya mpembe mutindu mvula ya mpembe, Zuzi! Ve ya kukanga singa ya luketo na luketo, kasi ya kukanga singa ya luketo na ntulu, na zulu awa, zuzi! Na lele ya laka ya zuzi na zulu ya mapeka ya Yandi, Yandi telamaka na ya wolo, ya kuvedila, ya santu, ya mbote, na singa ya luketo ya kukanga yina na kulakisa ludedomo ya Yandi. Mwela ya Yandi! Yandi vwandaka nyonso ya kufuka tii na makulu. Beno tala mbote kotalana ya bima sambwadi ya Muntu mpe nkembo ya Yandi.

171 Ntangu yayi, mu banza, nzila ya 14:

Nsuki ya yandi . . . Yintu ya yandi mpe nsuki ya yandi vwandaka mutindu mpembe mutindu mika, mutindu mpembe mutindu mvula ya mpembe; mpe meso ya yandi vwandaka . . . milaka ya tiya;

172 Yintu, nsuki; “meso vwandaka mutindu milaka ya tiya.” Beno banza na yawu! Meso yango yina vwandaka mbala mosi ya kukanga na mansangaza kimuntu, ntangu yayi me kuma milaka ya tiya. Na kudasuka Yandi telamaka kuna mutindu zuzi ya kudasuka. Samu na yinki beno mangaka Yandi? Oh, musumuki, beno banza na yayi! Beno banza na yawu, mambele ya dibuundu ya mwa-tiya! Beno banza na yawu, Katolika, Baptiste, Presbytérien, Pantekote! Beno banza na yawu Katolika! Mwense Marie ya beno zolaka mata na Pantekote mpe kuzwa Mpeve-Santu, mpe kwendaka tengu-tengu mpe salaka mutindu kento ya kulawuka malafu. Mama ya kieleka ya Klisto zolaka kuzwa yawu ntete yandi vwanza ya kundima na Mazulu. Wapi mutindu beno bakento ke kuma kuna na kima ya fyoti na yawu? Beno banza na yawu, babakala, mosi na mosi ya beno!

173 Nsuki ya Yandi, mpe meso ya Yandi mbala mosi ya kufuka na masa ya meso ya bumuntu, dyaka mu zola beno kutala kima na meso yango. Ntangu Yandi vwandaka ntete na ntoto, ya vwandaka ya kufuka na mansangaza mutindu muntu, samu ti Yandidilaka na ndyamu ya Lazare. Kieleka! Ya kifuluka na kyadi; bumuntu ya Yandi. Yandi vwandaka ya kulwata, Yandi vwandaka ya kulwata Nzambi na kati ya bumuntu, samu na kukatula disumu. Kasi dyaka na manima ya bumuntu yina, Yandi vwandaka na kima na manima ya Yandi yina zolaka tala kaka na kati ya ntima ya muntu mpe kuzaba nyonso ya yandi. Samu na yinki? Ya vwandaka na kima na manima ya Yandi, dyaka Yandi vwandaka ya kulwata nsuni yina ke kufwa.

¹⁷⁴ Kasi ba zabaka ve nani ya vwandaka. “Kana beno kwikila ve,” Yandi tubaka, “ti Mu kele Yandi, beno ke kufwa na masumu ya beno.” Ya kele kieleka. “Kana mu ke sala ve bisalu ya Tata ya Munu, kuna beno kwikila Munu ve; kasi kana mu ke sala bisalu ya Tata ya Munu, kuna beno kwikila bisalu kana beno lendaka ve kukwikila Munu.” Oh, mutindu Yandi mekaka na kupesa bawu Nsangu, luzayikisu! Lendaka kutala mbala mosi na kati ya ntima ya muntu, kuzaba nyonso ya yandi. Mutindu mu ke banza na yawu! Meso yango yina ntangu mosi vwandaka tala na kati ya myongo, vwandaka tala kizizi ya muntu ya mpasi, mpe zolaka dila mutindu muntu, kasi dyaka zolaka baka Mpeve ya Nzambi na manima ya vision yango ya muntu kuna mpe kumona bima nyonso; bima yina vwandaka, bima yango yina vwandaka—vwandaka, mpe bima yina ke kwiza. Tubaka na ntwala nsuka na mbandukulu, ya kele samu ti Nzambi vwandaka na manima ya meso yango ya muntu. Beno bika Nzambi kukota na luzingu ya beno mpe kuyala beno, mpe Yandi ke lakisa beno bima ke kwiza. Samu ti ya kele dyaka beno ve, ya kele Mpeve-Santu na luzingu ya beno na manima kuna ke na kutalaka na nzila ya meso ke kufwa ve samu na kubakula bima.

¹⁷⁵ Oh, nkembo na Nzambi! “Mu ke tsyamuna Mpeve ya Munu na zulu ya nsuni nyonso, mpe bana ya beno ya babakala mpe bana ya bakento ke pesa profesi, bantwenya ya beno ke mona ba-vision, biboba ya beno ke lota bandosi.” Alleluia! Bantangu yankaka Yandi fwana tula beno na mfulu samu Yandi lenda kutala na nzila ya beno, kasi Yandi kieleka ke lakisa beno bambala mingi. “Bantwenya ya beno ke mona ba-vision, biboba ya beno ke lota bandosi; na zulu ya bisadi ya Munu ya babakala mpe bisadi ya kento Mu ke tsyamuna Mpeve ya Munu.” Ve, “Na zulu ya badiakre ya Munu mpe ba-pasteur, mpe na zulu ya Munu. . .” “Na zulu ya muntu nyonso ke zola, na zulu ya nsuni nyonso, Mu ke tsyamuna Mpeve ya Munu.” Beno ke kukiyufula samu na yinki mu ke boka mutindu yina, kasi ya ke na kukwizaka na bansungu yayi ya dibuundu.

¹⁷⁶ Oh, kuna Yandi vwandaka, meso yango. Mpe, beno bambuka moyo, kilumbu mosi, meso yango yina vwandaka ya kufuka na masa ya meso, meso yango ke vwanda na lufundusu. Ntangu yayi bawu kele mutindu milaka ya tiya yina ke na kutambulaka bisika nyonso na ntoto ya muvimba, mpe ya kele ve na kima yina ke na kusalama kasi yina Yandi zaba yawu. Oh, la la, ba ke na kuba yawu na bande. Ke na kutambulaka bisika nyonso na ntoto na kutalaka mbote konso kuningana, na kutalaka konso dibanza, na kuzabaka nyonso beno ke na kusalaka, balukanu ya ntima, yina beno me kanga na kusala. Yandi zaba nyonso yina me tala yawu. Yandi zaba kana beno zola Yandi. Yandi zaba kana mabanza ya beno kele mbote, samu na kusadila Yandi. Yandi zaba nyonso na zulu ya yawu. Mpe wapi mutindu ya ke vwanda ntangu beno ke telama kilumbu yina ntangu konso disumu ke

zabana na ntwala ya Yandi, mpe Yandi ke telama kuna na Kiti ya kintinu ya Mpembe ya Lufundusu?

¹⁷⁷ Nzambi, kangula munu na kisika yina! Mu zola ve kumona yawu. Ntangu Nzambi ya kudasuka ke basika kuna na tiya ke na kulezima na meso ya Yandi, na ludedomo, na pelike ya mpembe na zulu ya yintu ya Yandi mutindu yina, mpe meso ya Yandi ke na kulezima na tiya yina ke zabaka konso mabanza ya ntima ya beno, mpe nyonso beno kanisaka ntete na kusala. Bumba munu na Ditadi ya Bansungi yina ba bulaka samu na munu! Muntu ya ntama yina vwanda yimbaka, “Ntangu yinza nyonso yayi kele na tiya, vwanda pene-pene ya munu. Vwanda pene-pene ya munu, mpe ti dibene ya Nge vwanda kuse ya munu. Bumba munu na Ditadi ya Bansungi.” Nzambi, mu zola ve lufundusu ya Nge. Mu zola ve ya Nge. . . Yina mu zola kele kyadi ya Nge, Mfumu. Pesa munu kyadi ya Nge, ludedomo ya Nge ve. Pesa kaka munu kyadi ya Nge. Misiku ya Nge ve, mosi ve. . . Tala munu kaka kyadi, Mfumu, ya kele nyonso mu lenda lomba. Kima ve na maboko ya munu mu ke nata (Mu kele mbote ve, na ata luvalu ve), mu ke kangama kaka na kulunsi ya Nge. Mfumu, ya kele nyonso mu zaba: Muntu kwizaka baka kisika ya munu.

¹⁷⁸ Beno tala mbote bima sambwadi ya bumuntu ya Yandi ntangu yayi ya muntu ya Yandi, mpe beno ke mona yina Yandi salaka.

Yintu ya yandi. . .vwandaka mpembe mutindu mvula ya mpembe; mutindu mika, nsuki ya mpembe; mpe meso ya yandi vwandaka mutindu. . .(beto mona). . .Yintu ya yandi. . .vwandaka mpembe mutindu. . .mvula ya mpembe; mpe meso ya yandi vwandaka. . .milaka ya tiya;

Mpe makulu ya yandi vwandaka mutindu. . .kisengo ya tiya, mutindu vwandaka me nyenga na dibulu ya tiya;

¹⁷⁹ Beno tala mbote ntangu yayi. Beto me tala kaka mutindu Yandi kele ya kufuka, beno zaba. Ntangu yayi beno tala mbote. Yintu ya Yandi, meso ya Yandi, ntangu yayi yandi ke kulumuka na makulu ya Yandi mutindu kisengo. Beno tala luswaswanu na kizizi yina kuna ti Jean monaka ya Yesu, mpe yina Daniel monaka ya kimfumu ya yinza, yintu ya wolo mpe nyonso yankaka.

¹⁸⁰ Beno tala na yina yayi vwandaka awa, ya kutelama kuna, kisengo. Yinki ke zola kuzonza kisengo? Kisengo ke zonzila lufundusu, lufundusu ya Kinzambi. Ya ke lakisa ti lukanu ya Yandi ya muvimba kele kukwiza awa na zulu ya ntoto mutindu Nzambi, na kukumaka nsuni, mpe Yandi kufwaka samu na beto mpe bakaka balufundusu ya Nzambi, lufundusu ya Kinzambi, mpe me kuzwa Kimfumu yina kele kisengo, mpe ya ngolo, mpe ba lenda ningisa yawu ve. Kima mosi ve kele ngolo mingi na kisengo, mpe me talaka ntete kima ve yina ke sala yawu.

¹⁸¹ Lufundusu! Kisengo ke zonzila na lufundusu ya Kinzambi yina lutaka. Beno tala na nyoka ya kisengo na ntoto ya kuyuma. Yinki nyoka yango ya kisengo vwandaka monisa? Nyoka vwandaka monisa disumu; kasi, na kuvwandaka ya kisengo, lufundusu lutaka na disumu yimeni.

¹⁸² Ntangu yayi, beno tala mpe na bilumbu ya Élie, ntangu ba mangaka Élie mutindu profete, nsinga yango ya fyoti, ya nsungi ya dibuundu ya ntama. Mosi ya bilumbu yayi mu ke nata mpe ke lakisa beno ti Israël vwandaka na bansungi sambwadi ya dibuundu, mpe, mpe fwanakanaka na bayayi. Mpe na nsungi ya dibuundu ya bawu, na kilumbu ya Élie, bawu mangaka yandi mpe beno tala bamvula tatu mpe bangonda sambanu ya vwandaka ve na mvula. Mpe profete ya ntama yina tubaka ti, “mazulu talanaka mutindu kisengo,” lufundusu ya Kinzambi na zulu ya bayinsi na kumangaka Nzambi mpe na kuwaka na Jézabel.

¹⁸³ Kisengo mpe ke monisaka lufundusu ya Kinzambi na autel kisika ba kufwaka munkayulu, autel ya kisengo, ba me kufwa. Balufulu ya kieleka vwandaka kisengo, lufundusu. Yandi sadilaka kikamununu ya ngolo ya Nzambi mpe bakaka lufundusu ya beto na zulu ya Yandi. Beno baka Apocalypse 19:15, kaka minuti mosi, beto mona yina Yandi salaka. Apocalypse 19:15, beto tanga kaka ntangu fyoti kana mu lenda tala yawu. Inga, beto banda na . . . beto mona, na nzila ya 12:

Meso ya yandi vwandaka . . . milaka ya tiya, mpe na yintu ya yandi vwandaka yimpu, bayimpu mingi; mpe yandi vwandaka na nkumbu ya kusunama, yina muntu ve zabaka, kasi . . . yandi mosi.

Mpe yandi vwandaka ya kulwata kazaka ya kubola na menga: mpe nkumbu ya yandi vwandaka ya kubokila Ndinga ya Nzambi. (Ntangu yayi, beno bambuka moyo, Nkumbu ya Yandi vwandaka ve Ndinga ya Nzambi, Nkumbu ya Yandi vwandaka ya kubokila yawu. Beno me mona?) . . . nkumbu ya yandi vwandaka ya kubokila Ndinga ya Nzambi.

Mpe basoda . . . ya mazulu . . . basoda yina vwandaka na mazulu landaka yandi na zulu ya bampunda ya mpembe, ya kulwata lino ya kitoko, ya mpembe mpe ya kuvedila.

Mpe basikaka na yinwa ya yandi mbele ya yinda ya meno, ti na yina yandi zolaka bula yinsi: mpe yandi ke tuma bawu na yinti ya kisengo: mpe yandi ke sadila . . . (Yinki ya kele?) . . . sadila kikamununu ya ngolo mpe ya nkele ya Nzambi ya ngolonso.

¹⁸⁴ Yinki Yandi salaka? Nkele ya Nzambi vwandaka na zulu ya beto na kuvwandaka misumuki. Ya kele kieleka? Muntu ve zolaka vuukisa yandi mosi. Ya kele ve na kima beto lenda sala,

beto nyonso kele “Ya kubutama na kati ya disumu, ya kusala na disumu ya nko, kwizaka na yinza na kuzonzaka baluvunu.” Mpe yinki Yandi salaka? Yandi kwizaka na ntoto, Aleluya, mpe sadilaka kikamununu! Nkele nyonso ya Nzambi ya Ngolo nyonso vwandaka ya kutsyamuka na zulu ya Yandi. “Nge kele ya kulunga, O Mwana-dimeme ya Nzambi, samu ti ba kufwaka Nge.” Na kubakaka masumu ya yinza na zulu ya Yandi, mpe Yandi bakaka disumu ya beto, ti Nzambi tsyamunaka ngolo ya nkele ya Yandi na zulu ya Yandi. “Mpe Yandi lwalaka samu na masumu ya beto, kuzengamaka samu na disumu ya beto ya nko, mpasi ya ngemba ya beto na zulu ya Yandi, mpe na bamputa ya Yandi beto belukka.” Ata mbala mosi ve muntu kufwaka mutindu Muntu yina! Yandi talaka mpasi tii menga mpe maza kukabukaka na nzutu ya Yandi. Mpe mabete ya menga vwanza kubwa na kizizi ya Yandi na ntuala ya lufwa ya Yandi.

. . .kikamununu ya . . .nkele . . .ya ngolo . . .ya Nzambi ya ngolo nyonso.

¹⁸⁵ Kilumbu mosi na makulu yango ya ludedomo (Nkembo!), ntangu Yandi ke kwiza mutindu zuzi, Yandi ke nika mbeni ya Klisto, mpe bambeni ya Yandi nyonso. Aleluya! Yandi ke tambula na ntoto na yinti ya kisengo na diboko ya Yandi. Amen! Oh, beno fungula masumu, nkundi ya musumuki, na yina beno kele na siansi ya kubalula ntima. Beno meka, beno bika yawu mpe beno banza ya kele kaka disolo yina ke salama ve. Ya ke salama! “Ya lendaka kaka ve kusalama na munu.” Ya ke salama na beno!

¹⁸⁶ Makulu ya kisengo, ke nika bambeni ya Yandi. Samu ti Yandi talaka mpasi mpe dyataka kikamununu ya ngolo ya Nzambi samu na kufuta masumu ya beto. Mpe kuna beto, ya kuzaba dyambu, ya mputu, minsyobo ya mawa mutindu beto kele, beto ke telemisa mwa mbombo ya beto mpe ke tanga mutindu mosi ya buku ya athée mpe kumeka na kubanza “ya kele ve na Nzambi,” mpe ke tuba “ya kele ve na kima mutindu *yayi*, mpe lufundusu lenda kwiza ve.” Yandi ke baka makulu yango ya kisengo mpe ke losa na ngaanda mbeni ya Yandi. Yandi ke dyata mbeni ya Klisto. Yandi ke baka mabuundu yango ya apostat mpe ke losa bawu kuna na Seko, kisika mosi na tiya ya nene kisika yandi ke kuzika na tiya mpe ke kufwa. Mpe Yandi ke yala na zulu ya ntoto, Yandi mpe Dibuundu ya Yandi ntangu nyonso. Nkembo!

¹⁸⁷ “Yintu, ya mpembe mutindu mika,” ludedomo, nzingulu, bunzonzi, ya kulunga, ndwenga. Mvula, mpembe, ke zonzila na ndwenga, bukuluntu. Zaba yina Yandi ke na kusalaka. Yandi kele—Yandi kele Yinto ya masa ya ndwenga. Yandi kele Yinto ya masa ya nzingulu. Yandi kele Yinto ya masa ya konso kima ya mbote, na yawu Yandi kele ya kumonisa na yandi yayi mutindu Mwana ya muntu, vwandaka ya kulwata na nsuki ya mpembe yayi yina ke na kubwa. Daniel monaka Yandi bankama mingi ya bamvula, bamvula bankama sambwadi, mpe tubaka, “Yandi

vwandaka Kuluntu ya bilumbu. Mpe mosi mutindu Mwana ya muntu kotaka na ngolo mpe vukanaka na Kuluntu yayi ya bilumbu, mpe lufundusu bandaka.”

¹⁸⁸ Ntangu yayi mu zola kaka kuyufula beno kima. Mu ke na kuzonzila na beno dibuundu ya madidi ve tiya ve. Bamwense kumi kubasikaka na kukutana na Mfumu, tanu ya bawu vwanaka ya mayela, tanu ya kizoba; mutindu beto vwanaka me baka yayi na nsuka yayi, yinti yina ba namikaka. Ntangu yayi, beno bambuka moyo, na yina bawu kubasikaka na kukutana Nzambi. . . Ntangu yayi beno tala mbote, Biblia ke tuba, “Babuku zibukaka.” Daniel 7:9, “Babuku zibukaka.” Ya kele buku ya musumuki. “Mpe buku yankaka zibukaka.” Nani kwizaka na Yandi? Dibundu na Enlevement. Oh! “Bakumi ya mafunda na mbala mafunda na mbala mafunda ya mafunda kwizaka na Yandi mpe sadilaka Yandi,” Kento ya Yandi, Kento ya makwela. Oh, nkembo! Kento ya Yandi kwizaka na Yandi, Dibundu.

¹⁸⁹ Lufundusu kusalamaka, mpe babuku zibukaka. Mpe buku yankaka zibukaka, yina vwanaka mwense ya kulala, mpe muntu nyonso vwanaka ya kufundisa landila buku. Ba ke yufula beno na kupesa samu na yinki beno salaka ve, mpe kuna samu na yinki? Beno zaba mingi mbote ntangu yayi, beno zaba mingi mbote. Beno lendaka vwanda ya kuzaba Yawu ve na ntete, kasi beno zaba ntangu yayi. Beno me mona? Kisika kana muntu ya kusungama na mpasi ke vuuka, wapi kisika musumuki yina mpe muntu ya yimbi ke monika? Muntu yina ke mangaka, zaba mbote mingi mpe kuna ke manga Yawu. Wapi kisika bawu ke talana? Makulu ya Yandi mutindu kisengo, lufundusu ya Kinzambi.

¹⁹⁰ Ntangu yayi, beto mona, beto ntama mingi ve. . . na yisi na nsuka ya page ntangu yayi:

. . . nsuki *mutindu mika*, . . . mpe meso ya yandi vwanaka . . . milaka ya tiya;

Mpe makulu ya yandi mutindu—makulu ya yandi mutindu. . . kisengo, . . . nyenga na dibulu ya tiya; mpe ndinga ya yandi. . . makelele ya maza mingi.

¹⁹¹ “Ndinga ya bamaza mingi.” Yinki bamaza ke monisa? Kana beno zola kusonika yawu, beno baka Apocalypse 17:15, mpe beno ke tala Biblia kutuba, “Bamaza yina nge monaka kele bunene, mpe bankonga, mpe bantu, mpe bandinga.”

Mbote mingi, *Ndinga*. Wapi kima ya boma samu na moyo ke na kwenda na lweka na mubu ya luzingu, Ata kinati-masuwa ve samu na kutwadisa yandi, ya kusimba mbote ve, ke pepa na ngolo na maza, na kuwaka makelele ya kabisa ya nene, na kubwa! Wapi mutindu ya kima ya boma ya ke vwanda na moyo ke na kwenda na lweka! “Ndinga ya bamaza mingi.” Yinki kele *Ndinga* ya Yandi? Ya kele lufundusu, ndinga ya milongi,

na nzila ya Mpeve-Santu, yina bokaka na bantu na konso nsungi, na kutelamaka kuna, Ndinga ya bamaza mingi yina bokaka, na bankonga mpe bantu mingi, Ndinga ya bambwetete sambwadi na diboko ya Yandi, na konso nsungi ya dibuundu, na kulongaka mbotika ya Mpeve-Santu, mbotika na Nkumbu ya Yesu, kuzonza na bandinga, ngolo ya Nzambi, mvumbukulu ya Klisto, Nkwizulu ya Zole, Lufundusu ya Kinzambi. Ndinga ya bamaza mingi basikaka na yandi yayi yina talanaka mutindu Mwana ya muntu, bamaza mingi.

192 Wapi mutindu ya ke vwanda na kuzaba ti beno me vwanda na balukutakanu mpe kuwa ti beno fwana kusungama na Nzambi mpe kuzwa Mpeve-Santu, mpe moyo kukwenda na lweka na kuwaka ndinga yango kubasisa na lukutakanu yina beno kele ya kuvwanda, mpe kuwa balufundusu ya Nzambi kulongama, mpe kumanga Yawu. Kubwa ya nene kele kaka na yisi ya beno, bakasiba ya nene yina ke nata beno na kisika ya beno ya Seko.

193 Ndinga ya bamaza mingi, bumuntu ya yiya ya Yandi. Ndinga ya bamaza mingi. Wapi mutindu beno ke sala ntangu ya kele ya kubaka na bande na Nkembo, na yina ndinga na nkokila yayi ke na kubakama na bande? Ndinga ya beno kele ya kubaka na bande. Mabanza ya beno kele ya kubakama na bande. “Mutindu muntu ke banzaka na ntima ya yandi, mutindu ya kele.” Benoit tala, ndinga ya beno kele ngolo mingi na Mazulu na ya beno . . . Mu zola kutuba, mabanza ya beno kele ngolo mingi na Mazulu kulutila na ndinga ya beno na ntoto. Kieleka, ya kele. Nzambi zaba mabanza mpe balukanu ya ntima, Yandi zaba nyonso yina me tala yawu.

194 Yandi tubaka na ba-Pharisien, “Benoit bantu ya luvunu, wapi mutindu beno lenda zonza bima ya mbote, ntangu na kifuluka ya ntima ke zonzaka yinwa? Benoit ke bokila Munu, ‘Mfumu, ya mbote,’ mpe mu zaba, mu lenda tala kaka na nzila ya benoit mpe kumona ti benoit kele bantu ya luvunu. Benoit zola ve kutuba yawu.”

195 Oh, wapi mutindu ya ke vwanda na kilumbu yina ntangu Ndinga yina ke wakana na ngolo na ngaanda ya bamaza mingi, bansungi mingi ya dibuundu yina me salama?

196 Ntangu yayi mu zola kuyufula benoit kima yankaka. Benoit bika munu kutuba kima na benoit bayina kele ya kuvuluka, bika mu tuba yayi na benoit.

197 Ntangu yayi, benoit moyo yina ke na kukwenda na lweka, benoit muntu ya mawa ya kukwenda na lweka yina ke na kwendaka na lweka na kasiba ya nene yina kuna, sala keba. Ya kele kima ya boma ntangu benoit zaba ti ya kele ve na mpulusu samu na benoit kuna. Benoit lenda kuzwa ve mpulusu kuna, benoit zaba nsuka ya benoit kele kaka na ntuala ya benoit. Na yina benoit zaba na kati ya baminuti fyoti benoit ke kuwa Ndinga yango kuzonza, “Benoit katuka na Munu, benoit bisadi ya masumu ya nko, benoit kwenda

kota na tiya ya kukondwa nsuka yina ba kubikaka samu na dyabulu mpe bawanzio ya yandi.” Beno ke zaba ntangu beno ke kuwa makelele ya bakubwa yango ya nene ya bandinga yango ya balukutakanu yango, na yina beno ke na kulutaka na yayi. Oh, wapi mutindu ya kima ya boma, wapi mutindu ya ndosi ya yimbi! Beno bika ve ti ya salama na beno, bantu. Beno fungula masumu, beno sungama na Nzambi ntangu kaka yayi, na yina beno lenda sungama.

¹⁹⁸ Ntangu yayi mu zola kuyufula beno kima yankaka. Wapi mutindu kitoko mingi ya kele na muntu yina kele ya kukangama, ke na kupema na yisi ya yinti ya makasa ya mbote, kuwa makelele ya yinto ya masa? Oh! Ya kele Dibuundu ya kuvwanda na bisika ya mazulu na Ndinga ya Nzambi na malembe mpe ke na kuzonzila bawu kuna. Beno me mona yinki ya kele? Ya kele kitumbu samu na musumuki, mpe lusakumunu samu na muntu ya kuvuuka. Muntu yina me kanga na nkebolo bwatu ya yandi na zulu ya Ditadi ya Klisto Yesu, mpe yina ke vwanda kaka mpe ke kuwa, mutindu yandi lenda pema! Beno kota na kupema yango.

¹⁹⁹ Wapi mutindu mu zola kukuma kisika bamaza ke na kulutaka. Kana beto kwenda na kuloba to kima, munu mutindu ntangu nyonso ke mekaka na kuzwa samu na munu kisika bamaza ke lutaka, samu ti ya ke salaka kaka beno kupema. Beno ke kuwa yawu kaka kuzonza mpimpa nyonso. Oh, la la!

²⁰⁰ Ya kele ve kitoko ntangu beno lenda kieleka kukangisa mwelo ya beno na kati ya Klisto, na kisika mutindu beno lendaka vwanda swi na ntwala ya Yandi? Mpe kuwa Ndinga ya Yandi kuzonza na beno, “Mu kele Mfumu yina ke belusa nge. Mu kele Mfumu yina ke pesa nge Luzingu ya Kukonda nsuka. Mu zola nge. Mu zabaka nge ntete mbandukulu ya yinza. Mu tulaka nkumbu ya nge na zulu ya Buku, nge kele ya Munu. Kutala boma ve, ya kele Munu. Kuvwanda na boma ve, Mu kele na nge.” Kuna mu ke yimba:

Mu me kangisa moyo ya munu na kiswamunu
ya kupema,
Mu ke nata dyaka ve maswa na mubu ya
kudasuka;
Kitembo lendaka komba mabulu, na ngolo na
kati;
Kasi na Yesu mu kele ntangu nyonso na
nkebolo.

²⁰¹ Beno bambuka moyo, Ndinga kaka yina zonzaka malembe na beno, ke fundisa musumuki. Kufulukuka ya maza kaka yina vuukisaka Noé, kufwaka musumui. Beno me mona yina mu zola kutuba? “Ndinga ya bamaza mingi.”

²⁰² Beno tala mbote ntangu yayi, “Nsuki mutindu mika ya dimeme, mpe meso mutindu milaka ya tiya, makulu mutindu kisengo, mpe Ndinga ya bamaza mingi.”

Mpe yandi vwandaka na diboko ya yandi ya kibakala bambwetete sambwadi: . . .

203 “Bambwetete sambwadi.” Ntangu yayi beto baka nzila ya 20 kaka awa:

Mpe dinsweki ya bambwetete sambwadi yina nge monaka na diboko ya munu ya bakala, mpe minda sambwadi ya wolo. Bambwetete sambwadi kele bawanzio sambwadi (to minati-nsangu sambwadi, baministere sambwadi) ya mabuundu sambwadi: mpe minda sambwadi yina nge monaka kele mabuundu sambwadi.

204 Yandi tendulaka yawu samu na yandi samu ti ya vwanda kieleka ve na foti. Wabzio ya konso nsungi ya dibuundu. Oh, ya ke vwanda kitoko, sabala yayi, ntangu beto ke vutuka kuna na disolo mpe kubaka bambanzi yango mpe kumona kisalu ya kieleka vwandaka na bawu. Ba vwandaka na mutindu mosi ya kisalu. Kieleka ya mutindu mosi nzila nyonso na nsungi ya mwa Dibuundu yango.

205 Mwa ntangu me luta, muntu mosi tubaka, “Nge zaba, dibuundu ya Katolika, ya kele na kutuba ya mbote, ti, ‘Ya kele dibuundu ya kieleka samu ti ya telamaka nzila nyonso ya bansungi.’”

206 Mu tubaka, “Ya ke yitukisa ve, na kisika ti yawu kuzwaka luyalu nyonso mpe nyonso yankaka na manima ya yawu, mpe ya kele mutindu yawu vwandaka mpe telamaka na mipepe ya ngolo. Kasi yina ke yitukisa munu kele wapi mutindu mwa nkonga, ya fyoti mingi yina lendaka na kutelama na mupepe ya ngolo, bayina ba zengaka na scie na bitini-bitini, mpe bayina ba losaka na bankosi, mpe ba tulaka na bamfulu, mpe bayina ba kudyaka, mpe ba nyengisaka, mpe na bankosi. . . mpe ba kufwaka mpe nyonso yankaka, mpe mutindu bawu vuukaka na yawu.” Ya ke lakisa ti diboko ya Nzambi vwandaka na bawu. Kaka yina. Mpe dyaka bubu yayi Nsemo ya bawu ke na kupela dyaka. Amen! Yinga, tata!

207 Ntangu yayi, “Bambwetete sambwadi yina vwandaka na diboko ya Munu ya kibakala.” Yandi vwandaka na bambwetete sambwadi na diboko ya Yandi ya bakala, yina zola kutuba baministere sambwadi ya bansungi sambwadi. Oh, ya kele—ya kele kitoko. Ti beto ke vutuka manima mpe ke baka ministere yina nataka Nsangu na dibuundu ya Ephèse. Mpe ministere yina nataka Nsangu mpe simbaka Yawu tii lufwa, mbala mosi na dibuundu ya Smyrne, mpe na dibuundu ya Pergame, Thyatire, mpe nzila nyonso na bansungi, mpe tii na nsungi yayi bubu yayi. Baministere yina bumbaka mpe nataka Nsemo, mpe simbaka Yawu mutindu ya ntete na mbandukulu, mpe nataka Nsemo na nzila ya yandi.

208 “Yandi simbaka bawu na diboko ya Yandi ya kibakala.” Beno banza! Diboko ya bakala ke zola kaka ve kutuba mutindu Klisto ya kuvwanda na diboko ya kibakala ya Nzambi. Ya zola ve kutuba ti Nzambi kele na diboko ya kibakala, samu ti Nzambi kele Mpeve. Kasi Klisto vwandaka diboko ya kibakala ya ngolo. Muntu ya beno ya diboko ya kibakala, kele muntu—muntu yina ke telamaka na lweka ya beno, yina kele pene-pene mingi na beno.

209 Mpe, beno bambuka moyo, bambwetete sambwadi vwandaka na diboko ya Yandi ya kibakala. Beno banza kaka, ba vwandaka baka ngolo ya bawu, Nsemo ya bawu na Yandi. Ba vwandaka ya muvimba na yisi ya kuyala ya Yandi, na diboko ya Yandi ya kibakala. Oh! Konso kisadi ya kieleka ya Nzambi kele mutindu mosi. Kukota . . . Nani lenda sala bawu mpasi? Nani lenda sala bawu mpasi? Mutindu mosi ya bawanzio bokaka kuna na mbandukulu. Beno bambuka moyo *wanzio* zola kutuba “munati-nsangu.” Beto ke kota na kati mingi ya bima yango na ntwala ya sabala. *Wanzio* zola kutuba “munati-nsangu.” Mpe yandi tubaka, “Yinki lenda kabula beto na luzolo ya Nzambi yina kele na Klisto? Ya lenda vwanda kubela? Ya lenda vwanda mambu ya boma? Ya lenda vwanda kinkonga? Ya lenda vwanda mpele? Ya lenda vwanda lufwa? Mu kele ya kundima” tubaka Paul, “ti ya kele na kima ve lenda kabula beto na luzolo ya Nzambi yina na kati ya Klisto,” samu ti beto kele ya muvimba ya kupesa na diboko ya Yandi ya kibakala.

210 Muntu ke tuba, “Ba-exalté! Ba-exalté!” Yina ke kwamisa bawu ve ata fyoti ve. “Beno kele bafanatiki ya nsambulu!” Bawu ke kuwa mpe yawu ve. Bawu kele ya muvimba ya kupesa mpe ke na kubaka Luzingu ya bawu na diboko ya Yandi ya kibakala ya ngolo, na kulakisaka Nsemo ya Yandi na lembami, mpe bumbote, mpe kusalasana, mpe ngemba; bidimbu, mpe mambu ya ngitukulu, mpe bimangu. Ti yinza bokila Yawu “bundoki,” nyonso yina bawu zola, ya ke sala beto ata luswaswanu ve, samu ti beto zaba ti beto kele ya kupesa mpe na diboko ya Yandi ya bakala. Ya kele mbote mingi ve? Oh!

211 Ntangu yayi beto sala mbangu, samu ti mu zola ve kunyongisa beno. “Na diboko ya Yandi ya kibakala, bambwetete sambwadi.”

212 Ntangu yayi kumonisa ya sambwadi mpe ya nsuka ya muntu ya Yandi:

. . . mpe vwandaka basika na yinwa ya yandi mbele ya meno na balweka nyonso zole: . . .

mu zolaka kutuba, yina kele ya sambanu.

. . . vwandaka basika na yinwa ya yandi mbele ya meno na balweka nyonso zole: . . .

213 Ntangu yayi, Ndinga ya bamaza mingi, mpe vwandaka basika na yinwa ya Yandi. . . Na diboko ya Yandi ya kibakala Yandi vwandaka na bambwetete.

. . . *mpe vwandaka basika na yinwa ya yandi mbele ya meno na balweka nyonso zole: . . .*

214 Ntangu yayi, beno zaba yina mbele ya meno na balweka nyonso zole na Biblia kele? Beto baka kaka yawu samu beno zaba. Beno baka Hébreux 4:2, kaka page kaka mosi na manima to zole mpe beno ke kuzwa yawu, beno me mona. Hébreux kele kaka na manima ya Apocalypse awa; Jude, mpe kuna Hébreux. Ntangu yayi, mu me kuma pene-pene ntangu yayi. To. . . Hébreux, kapu 4 ya Hébreux, beto bawu yayi. Mbote mingi, Hébreux kapu ya 4 mpe nzila ya 12:

Samu ti ndinga ya Nzambi kele quicker, mpe ngolo mingi, mpe ya meno kulutila mbele ya meno ya balweka nyonso zole, yawu ke kotaka tii na kukabula moyo mpe mpeve, mpe mikwa mpe mafuta, mpe kele mufundisi ya mabanza mpe bansatu ya ntima.

215 Mpe kuna ba ke bokila beno “muntu ke tangaka mabanza.” Ya kele Ndinga ya Nzambi yina me talana na Dibuundu ya Yandi! Mbele ya meno ya balweka nyonso zole. Mu tuba, mu me banza kaka na kima yankaka kuna. Mu zaba ve kana mu sonikaka Mason-. . . Beno baka Apocalypse 19, kaka minuti mosi. Beto baka dyaka yayi, mu banza ya kele kieleka. Mu lendaka mu. . . Apocalypse 19, pene ya 11:

Mpe mu monaka mazulu ya kuzibuka, mpe beno tala mpunda ya mpembe; . . . (Awa ke kwiza dyaka mpembe, lufundusu.) . . . mpe yandi yina vwandaka ya kuwanda kuna na zulu ya yandi vwandaka ya kubokila Kukwikama mpe Kieleka, mpe na kati ya ludedomo yand. . . ke sala lufundusu mpe ke sala mvita. (Beni zaba nani ya vwandaka, beno zaba? Mbote mingi.)

Meso ya yandi vwandaka. . . milaka ya tiya, . . . (Nani Yandi vwandaka?) . . . mpe na zulu ya yintu ya yandi vwandaka. . . bayimpu; . . . (Uh-oh. Yandi ke na kwiza na kimfumu ntangu yayi.) . . . mpe yandi vwandaka. . . mpe—mpe yandi vwandaka na nkumbu ya kusonama, yina muntu ve zabaka, kasi. . . yandi mosi.

Mpe yandi vwandaka ya kulwata kazaka ya kubola na menga: mpe nkumbu ya yandi kele ya kubokila Ndinga ya Nzambi.

216 Yinki vwandaka basika na yinwa ya Yandi? Yinki kwendaka? Munati-mpunda ya mpunda ya mpembe. Mpe Apocalypse, mpe, ya 7, ntangu. . . Mu banza ya 8. Ntangu mpunda ya mpembe. . . ve, ya kele 6. Ntangu munati-mpunda ya mpunda ya mpembe kubasikaka, ba pesaka Yandi tolo-tolo, samu na kununga mpe kununga.

217 Mpe mbele vwandaka basika na yinwa ya Yandi. Yinki Yandi vwandaka? Munati-mpunda ya mpunda ya mpembe ya Apocalypse. Beno tala mbele. “Vwandaka basika na yinwa ya Yandi mbele ya meno ya balweka nyonso zole,” Ndinga. Mpe, na nsuka, na Ndinga ya Yandi, ntangu Yawu ke monisama na bana nyonso ya Nzambi, Yandi ke byeta konso yinsi na Ndinga ya Yandi, na mbele ya meno yayi. Beno tala awa yina salamaka, na yina beto ke baka yawu:

Mpe . . . diboko ya yandi ya bakala . . . mpe vwandaka basika na yinwa ya yandi mbele ya meno na balweka nyonso zole: mpe bizizi ya yandi vwandaka mutindu mwini ke lezimaka na kati ya ngolo ya yawu.

218 “Mbele ya meno na balweka nyonso zole.” Yinki vwandaka basika na yina ya muntu yayi? Ndinga ya Nzambi. Ya kele mbele ya meno na balweka nyonso zole. Yinki ya vwandaka sala? Vwandaka mona mabanza ya ntima, bansatu; ke kwendaka kati mingi kulutila ngombe, nsuni, ba-cellule ya menga, na kati ya mukwa, yisi na kati ya luku ya mukwa, ke simba kati kuna ya yawu, mpe mufundisi ya mabanza mpe bansatu ya ntima. Ya kele yina Ndinga ya Nzambi ke salaka.

219 “Mpe Ndinga kumaka muntu mpe zingaka na kati ya beto.” Mpe ntangu yayi Ndinga me kuma nsuni na kati ya Dibuundu ya Yandi, ke na kuzingaka na kati-kati ya beto. Bawanzio ya Yandi na kati ya diboko ya Yandi, ke na kusalaka kisalu. Nzambi ke na kusalaka na Dibuundu ya Yandi. Nzambi ke na kusalaka kivuvu na beto ya nsungi yayi na kunata Nsemo ya Nsangu yayi ya mbote na yinza ya binkulu, ya kukangama na bumpani, yina ke na kufwa. Nzambi me bika kizitu yayi na zulu ya munu mpe beno. Kyadi na beto kana mumpuni kufwa kukondwa kuzaba. Oh, bawu ke landila na kutanga, na kusonika, mpe kutanga, mpe ba me kabula bawu mwa mikanda ya lukwikilu, mpe bawu me sala mingi ve ti nkonga ya ba-proselyte. Mu zola kuzonza ya Nsangu ya mbote! Nsangu ya mbote kele kaka Ndinga ve. Paul tubaka mutindu yina. Paul tubaka, “Nsangu ya mbote kwizaka ve na beto na nzila ya Ndinga kaka, kasi Ndinga talanaka.” Ntangu Ndinga, na nzila ya Mpeve-Santu, kele. . . Ndinga kele ya kukunda na kati ya ntima yina kele na Mpeve-Santu mpe ke basisa yina Ndinga ke tuba ti Yawu ke basisa. Mpe Ndinga lenda mona mabanza ya ntima! Nkembo! Oh, la la! Oh! Mufundisi ya mabanza mpe bansatu ya ntima, Ndinga ke salaka yawu.

220 Ke basika na yinwa ya Yandi, mbele ya meno na balweka nyonso zole, na kuvumbula mimpani. Kima ke zola kusalama mosi ya bilumbu yayi. Yinga! Ndinga ya Nzambi, Nkumbu ya Yandi vwandaka Ndinga ya Nzambi, Ndinga talanaka. Beno tala, Yesu tubaka, “Beno kwenda na yinza nyonso,” Marc 16, Mbote ya Yandi ya nsuka na dibuundu ntete Yandi vutuka na kumonana Yandi mosi na nsungi ya dibuundu. Yandi tumaka Dibuundu, “Beno kwenda na yinza nyonso mpe beno longa

Nsangu ya mbote na konso kivangu.” Yinki? Beno longa Nsangu ya mbote. Marc 16, “Beno longa Nsangu ya mbote na konso kivangu.” Yinki ya kele? Na bampova yankaka, “kulakisa ngolo ya Mpeve-Santu,” ya fwana vwanda.

221 Ntangu yayi beno tala mbote, “na nyonso. . .” Ve kaka kulonga Ndinga; Yandi tubaka ata mbala mosi ve, “Beno kwenda longa Ndinga.” Yandi tubaka, “Beno kwenda longa Nsangu ya mbote.” Ve beno longa Ndinga, beno longa Nsangu ya mbote. “Mpe bidimbu yayi ke landa bawu yina ke kwikila na Nsangu ya mbote yayi; na Nkumbu ya Munu bawu ke basisa bampeve ya yimbi, bawu ke zonga bandinga ya malu-malu, kana bawu simba nyoka to kunwa kima ke kufwaka ya ke sala bawu mpasi ve; kana bawu tentika maboko na zulu ya bambevo bawu ke beluka.”

222 “Mpe bawu kwendaka,” me tuba Masonuku, “kulonga bisika nyonso; Mfumu vwandaka sala na bawu, na kusiamisaka Ndinga na bidimbu vwandaka landa.” Beno tala Nsangu ya mbote, Nsangu ya mbote kumonana.

223 Bidimbu yayi ke landa bantu yikwa? Tii nsuka ya yinza, na konso nsungi. Beno tala mwa nkonga yango ya fyoti kulandila nzila, na kusimbaka Nsemo yango. Kukondwa ntembe ti Yesu tubaka, “Beno tala boma ve, mameme fyoti, ya kele luzolo ya Tata ya beno na kupesa beno Kimfumu.” Mwa mameme; ntangu nyonso fyoti, mingi ve.

224 Mbote mingi, ntangu yayi masonuku. Mpe beto baka ya 20, na yawu ntangu yayi beto mona awa na nzila yayi awa. Ntangu yayi ya 16:

Mpe yandi vwandaka na kati ya diboko ya yandi bambwetete sambwadi: . . .

225 Ntangu yayi beto baka . . . mpe . . . bizizi ya Yandi:

. . . vwandaka basika na yinwa ya yandi mbele ya meno na balweka nyonso zole: mpe kizizi ya yandi vwandaka mutindu mwini ke lezimaka na kati ya ngolo ya yandi.

226 Kana beno baka na . . . beto mona, Matthieu 17. Beto baka kaka yaw awa na yina beto kele na yawu; na yawu beto ke na kulutilaka kaka na yawu, mpe mingi ya bantu yango ke na kubaka yawu, beto . . . to kusonika yawu na yisi, beto ke bika kaka bawu kutanga yawu samu ti beto zaba.

227 Matthieu 17, mbote mingi:

. . . na manima ya bilumbu sambanu Yesu bakaka Pierre, Jacques, mpe Jean . . . na mongo mosi ya zulu,

Mpe kitukaka na ntwala ya bawu: mpe kizizi ya yandi vwandaka lezima mutindu mwini, mpe robe ya yandi vwandaka mpembe mutindu nsemo.

228 Yandi kitukaka. Yinki Yandi salaka? Yandi lutisaka Yandi mosi na kukituka, kuna na kilumbu ya Yandi. Ntangu yayi beno tala mbote, kaka bangunga fyoti ntete yayi, Yesu salaka kutuba yayi na manima awa na kapu yina ke landa, “Kieleka Mu ke tuba na beno, ti bayankaka telama awa . . .” Bantu yikwa zaba yina mu ke zola kutuba? “Bayankaka ya kutelama awa ke luta ve, ke kufwa ve, tii bawu monaka Mwana ya muntu kukota na Nkembo.” Ya kele kieleka? Mpe Yandi bakaka Pierre, Jacques, mpe Jean, bambangi tatu, samu ti na Ngwisani ya Ntama nyonso, mwa konso ndinga, vwandaka ya kutula na nzila ya bambangi tatu, mpe nataka bawu na zulu ya mongo.

229 Beno tala yina salamaka ntete. Oh, mu lenda kaka ve kusukisa awa, mu fwana kuma kaka na yayi. Beno tala! Wapi kima ya ntete bawu monaka? Ba nataka Yesu na zulu ya mongo . . . to Yandi nataka bawu, mpe Yandi kitukaka na ntuala ya bawu, kusoba. Dizwela ya Yandi lezimaka mutindu mwini na kati-kati ya ngolo ya yawu, mpe kuna talanaka na Yandi Moïse mpe Élie. Na wapi nzutu Mwana ya muntu ke kwiza bubu yayi? Mpe na ntete, ke monika, ke vwanda Moïse mpe Élie.

230 Ntangu yayi, beno tala, ntete Yesu vutuka na ntoto . . . Ntangu yayi, yayi kele mwa yina ya ntuala ya ntangu, kasi Mpeve ya Élie ke vutuka na ntoto mpe ke vutula bantima ya bana na tata. Biblia ke tuba yawu. Yesu monaka yandi awa, bantumwa monaka yandi awa, nzila samu na nkwizulu ya Mwana ya muntu yina ba me kembisa. Yandi fwana vwanda ya kukembisa mpe yina ke vutuka. Kima ya ntete, ntete bawu kumona Yandi, vwandaka yinki? Élie. Na yina yinki? Moïse; Israël na kuvutukaka kuna, muzitisi-musiku. Mpe kuna Mwana ya muntu ya kukembisa. Alleluia! Beno me mona nzila samu na nkwizulu ya Yandi? Mpeve ya Élie, to mbangi ya nsungi ya dibuundu ya nsuka. Beno me mona, kukwiza na ngolo na kulakisa Yandi.

231 Kuna nkama mpe makumi yiya na yiya ya mfunda ya ba-Juif ke vukana na Mongo ya Sinaï, kisika Israël kumaka yinsi yawu mosi; yinsi ya kulutula ntama na yinza, dalapo ya kulutula ntama na yinza; kele na yinsi ya bawu mosi, dalapo ya bawu mosi, basoda ya bawu mosi, mbongo ya bawu mosi, mpe nyonso yankaka. Ba kele mosi ya bamambele ya ba-league ya bayinsi samu ti bawu kele yinsi. Yesu tubaka ata mbala mosi ve ti ba ke losa bawu tii ntangu bima nyonso ke salama.

232 Ngitukulu mutindu nkonga yango ya ba-Juif, yina ba talisaka mpasi bisika nyonso, mpe yina ba pusaka na manima, mpe yina ba basisaka mpe yina ba losaka, mutindu Dibubundu na nzila nyonso ya bansungi ya kumanga, mpe dyaka Yesu tubaka, “Ntangu beno ke mona yinti ya bafike kubasisa bafololo ya yawu, yinsi na kuvutukaka na kuvwanda dyaka yinsi, ntangu me belama, mpe na mwelo. Kieleka Mu ke tuba na beno, nsungi Yayi ke luta ve tii bima nyonso yayi kusalama.” Kubenda yayi . . .

Bantu yayi ke luta ve. Hitler mekaka na kufwa bawu, Mussolini mekaka na kufwa bawu, Staline mekaka na kufwa bawu, muntu nyonso yankaka, kasi ata mbala mosi ve ti bawu ke beba, to ke katuka na ntoto, bawu ke vwanda bantu mpe yinsi yina ke telama kuna. Amen!

²³³ Kuna ke kwiza Moïse mpe Élie. Oh! Mu banza ti beno ke bakula yawu.

²³⁴ Mbote mingi, “Mwini na kulezimaka na ngolo ya yawu,” Bizizi ya Yandi, ya kusoba, ya kukituka. Ntangu yayi kima yankaka, na Apocalypse 21:23, kana beno zola kusonika yawu. Na Jérusalem ya Malu-malu, 21:23, Yandi kele Mwana-dimeme yina kele na Mbanza, ya kele Nsemo kuna, ke na kulezima; samu ti bawu ke na nsatu ve ya nsemo na Mbanza, mwini ke telama na yawu ve, samu ti Mwana-dimeme yina kele na kati-kati ya Mbanza ke vwanda Nsemo kuna. Mpe bayinsi yina kele ya kuvuuka ke kota na Nsemo ya Mwana-dimeme! Amen! Yandi kele Nsemo ya Mwana-dimeme. Oh, beno kele na nsayi ve samu na yawu?

²³⁵ Kaka yina ve, kasi Yandi kele mpe, na nkwezulu (Jean monaka Yandi na kilumbu ya Mfumu), Mwini ya ludedomo. Beto baka Malachie. Malachie, profete ya nsuka ya Ngwisani ya Ntama. Malachie, kapu ya 4.

²³⁶ Mu kele na mwa disolo ya kutuba na yina me tala kento ya munu ya ntalu yina kele ya kuvwanda na manima kuna. Mu pesaka yandi ntangu mosi ya mpasi ntete beto kwelana, mu mekaka na kuvutula yawu na manima ya makwela ya beto. Mpe mu vwandaka zaba ve kana mu zolaka kwela dyaka to ve, mpe na yawu yandi vwandaka nyonso ya kulemba. Mpe mu vwandaka banza yandi vwandaka mwana ya kento mosi ya mbote mingi na kubika kaka kukwenda, kubika bakala mosi ya mbote kukwela yandi yina ke keba na yandi. Mpe mu banzaka mu mpe vwandaka ve ya kulunga na yandi; mpe mu kele ve, ya mutindu ya yandi, na mutindu nyonso. Na yawu yandi vwandaka yandi nyonso ya kulemba mpe vwandaka zaba ve yinki ya kusala. Yayi me salama bamvula me luta, pene ya bamvula makumi zole me luta. Yandi vwandaka ya kulemba mingi, ti yandi bandaka na kudila kilumbu mpe mpimpa. Mpe mu vwandaka meka na kuzenga na yandi, ve samu ti mu zolaka yandi ve, samu ti mu vwandaka zola ve kulutisa yandi ntangu; samu, na kubika yandi kuzwa muntu, muntu mosi ya mbote, samu ti yandi kele mwana mosi ya kento ya mbote mingi ya kubika kaka kukwenda mutindu yina, mpe munu kubaka . . . kukwenda kaka na yandi mpe bima mutindu yina. Mpe mu—mu banzaka ti yandi zolaka munu, mpe mu zolaka yandi. Na yawu kuna mu banzaka, “Mbote, mu ke mekaka kaka na . . . Mu ke sala dilaka na mwana mosi yankaka ya kento mpe kubasika na yandi, mpe kusala yandi kunyonga samu na munu.” Na manima mu yinaka yawu yimbi yina; yandi vwandaka nyonso ya kulemba. Mu tubaka na yandi,

mu tubaka, “Nge kele mwana mosi ya kento ya mbote mingi, mu—mu zola ve kulutisa nge ntangu mutindu yina.”

²³⁷ Mpe yandi tubaka, “Kasi mu—mu zola kaka nge, Bill, mpe ya kele kaka yandi yina mu lenda zola.” Yandi tubaka, “Mu—mu ntangu nyonso ke zolaka nge.”

Mu tubaka, “Mu—mu zola yawu. Kasi,” Mu tubaka, “nge zaba,” mu tubaka, “Mu kele muntu ke vwandaka yandi mosi.” Mu tubaka, “Mu ke—mu ke zinga kaka mutindu muntu ke vwandaka yandi mosi. Nge me mona, mu—mu ke kwelana ata fyoti ve.”

²³⁸ Mpe yandi vwandaka mingi ya kuvwanda na yawu, beno zaba, mwa mawa ya mwana yango. Mpe yandi kwendaka na ngaanda na mwanza. Mpe yandi kumaka kuna, mpe yandi fukamaka, mpe yandi tubaka, “Mfumu, mu zaba ve yinki ya kusala. Mu—mu zola ve kukondwa Nge buzitu, mpe kasi mu zola Bill, mpe mu zaba ve yinki ya kusala. Mfumu, Nge lenda pesa kaka munu mwa fyoti ya kubomba? Nge lenda sadisa kaka munu mwa fyoti? Mu me lombaka Nge ntete ve yayi na bilumbu ya ntama na luzingu ya munu, Mfumu, mpe mu banza mu ke lomba Nge dyaka ve,” yandi tubaka, “kasi kana Nge ke sadisa kaka munu, mpe ti mu kangula Biblia yayi, mpe Nge pesa munu Masonuku. Mu kuwaka bantu kutuba Nge salaka yawu.” Mpe na yina yandi fungulaka yawu, ya vwandaka Malachie ya 4:

Beno tala, mu ke pesa na . . . to ke fidisa na beno Élie profete ntete kilumbu yango—yango ya mpasi ya MFUMU:

²³⁹ Yandi tubaka, “Mu telamaka kuna kaka mutindu ya kusepela mbote ti beto vwandaka kwelana na mutindu nyonso.” Beno me mona?

Samu ti, beno tala, kilumbu ke na kwiza, yina ke kuzika mutindu dibulu ya tiya; mpe bantu nyonso ya lunangu, inga, . . . bawu yina nyonso ke salaka yimbi, ke vwanda mutindu matiti: mpe kilumbu yina ke na kwiza ke nyengisa bawu, me tuba MFUMU ya basoda, mpe ya ke bikana na bawu ata musisa to kintala.

Kasi na beno bayina ke zitisaka nkumbu ya munu ke telama Mwini (M-w-i-n-i) Mwini ya ludedomo na kubeluka na mapapu ya yandi; . . .

²⁴⁰ “Mwini na kulezimaka na ngolo ya yandi.” Oh! Ngolo ya Mwana ya Nzambi na kulezimaka na kati-kati ya beto na nkokila yayi. Ya kutelama na kati-kati ya minda sambwadi ya wolo na bima sambwadi ya bumuntu ya Yandi awa mutindu zuzi. Mutindu Muntu yina me tala mpasi mpe me kufwa samu na beto, mpe me baka lufundusu ya Kinzambi na zulu ya Yandi, mpe me dyata kikamununu, ngolo ya Nzambi. Na musumuki Yandi kele kasiba ya yimbi, samu na beno ke nyangula mwela na zulu ya mubu ya luzingu. Mpe na Dibuundu, Mvulusi ya mbote, ya kukangama na kupema, mpe ke kuwa makelele ya malembe ya

yinto ya masa na yina beno ke lala mpe ke pema na mutindu ya mbote na kilengi na Klisto. Wapi mutindu ya ntangu! Na kulezimaka na zulu ya beto na minzenzi ya Yandi ya tiya, “Beno tala boma ve, Mu kele Yandi yina vwandaka, yina kele, mpe yina ke kwiza. Mu kele ya Ngolo nyonso, na balweka yankaka ya Munu ya kele na muntu ve. Mu kele nyonso zole Alpha mpe Omega, mpe Mu ke pesa na yandi yina kele na mpwila ya bayinto ya maza ya Luzingu ya mpamba.” Oh, wapi mutindu ya nsilulu mpe wapi mutindu ya dyambu ya luzolo ya kele! Mpe Mwana-dimeme na kati-kati ya Mbanza yina ke na nsatu ve ya nsemo, mpe Yandi kele Mwini ya ludedomo na kubeluka na mapapu ya Yandi.

Yandi kele Lis ya Vallée, Mbwetete yina ke
Ngengaka ya Suka,

Yandi kele samu na moyo ya munu kulutila
kitoko kumi ya mafunda.

Na mpasi Yandi kele kubomba ya munu, na
nkwamusu Yandi kele kivuvu ya munu,
IYandi ke tuba na munu na kubika bizitu ya
munu nyonso na Yandi.

Alleluia!

Yandi kele Lis ya Vallée, Mbwetete yina ke
Ngengaka ya Suka,

Yandi kele samu na moyo ya munu kulutila
kitoko kumi ya mafunda.

²⁴¹ Yinga, tata! Oh, Mbwetete yango ya Suka ya nene na yina ya ke basika na kulezima, ke pesa mbote na kilumbu na kilumbu ke na kwiza, na kulosaka yawu, na kutubaka, “Kilumbu ke na kuyilama na kubasika, Mwana ke na kubelamaka na kukwiza,” mpe Yandi ke basika Yandi mosi na manima ya bambwetete yankaka (Oh, la la.) na kubeluka na mapapu ya Yandi.

²⁴² Ntangu yayi beto vutuka na nsangu ya beto. Mpe beto ke kanga ntangu yayi, samu na kukubama mbasi na nkokila, samu ti ngunga me kuma baminuti kumi na tanu na ngunga yivwa, beto zola ve kubumba muntu ntangu ya yinda, kaka samu ti beto vwanda awa.

²⁴³ Mbote mingi, Mwini ya ludedomo na kubeluka na mapapu ya Yandi. Ntangu yayi bizizi ya Yandi. Yandi vwandaka zuzi, to kima yankaka samu na kulakisa ti yandi kotaka na kilumbu ya Mfumu. Beno ke kwikila yawu? Yandi kotaka na kilumbu ya Mfumu mpe monaka Mfumu mutindu zuzi; ve mutindu nganga-Nzambi, ve mutindu ntinu, kasi mutindu zuzi. Yandi kele Zuzi. Beno ke kwikila yawu ve? Biblia ke tuba ti Yandi kele Zuzi. Mpe awa Yandi vwandaka nyonso ya kulwata mutindu Zuzi, na kulakisaka yina Yandi salaka; yina Yandi vwandaka: yina Yandi vwandaka samu na musumuki, yina Yandi vwandaka samu na Muklisto. Mpe awa Yandi me telama ntangu yayi na Ndinga ya

bamaza mingi, mpe bizizi ya Yandi vwandaka mutindu kulezima ya mwini na ngolo ya yawu.

244 Ntangu yayi bandandu, na nzila ya 16. “Mpe. . .” Ve, beno lemvokila munu, ya kele nzila ya 17:

Mpe ntangu mu monaka yandi, mu kubwaka na makulu ya yandi mutindu ya kufwa.

245 Oh! Profete zolaka telama dyaka ve, na kumonaka mutindu ya vision. Yandi kaka—Yandi zengaka kaka yandi ngolo, mpe yandi kubwaka kaka na yisi na makulu ya Yandi mutindu ya kufwa. Ntangu yayi beno tala mbote:

Mpe yandi tentikaka diboko ya yandi ya bakala na zulu ya munu, na kutubaka na munu, Kuvwanda na boma ve; mu kele ya ntete mpe ya nsuka:

246 Oh, la la! Ve profete, Nzambi! “Mu kele ya ntete mpe ya nsuka. Mu kele ya ntete ya Kubeluka, nsuka ya Luzayikisu. Mu kele Yandi yina vwandaka, Mu kele Yandi yina kele, Mu kele Yandi yina ke kwiza.” Beto mona:

mu kele. . .mu. . .

Mpe yandi tentikaka diboko ya yandi ya bakala na zulu ya munu, na kutubaka na munu, Kuvwanda na boma ve; mu kele ya ntete mpe ya nsuka:

Mu kele yandi yina kele moyo, mpe vwandaka ya kufwa; mpe, tala, mu kele moyo tii seko, (Kaka ntangu yayi. Mpe kuna yandi bokaka:) Amen; mpe ke na bafungula ya difelo mpe. . .lufwa.

247 Ntangu yayi, beno kuzwa boma ve. Samu na yinki beno ke vwanda na boma? Samu na yinki Dibuundu ke kondwa na kuzitisa ya Yandi. . .na kubanza na Ndinga ya Yandi? Beto telama kaka awa minuti mosi, samu ti beto ke na kukanga. Samu na yinki Dibuundu yayi ke vwanda ntete na boma? Yinki Yandi me silaka ntete ti Yandi me lakisaka ve na ntwala ya beto? Samu na yinki beno ke tala boma ya kitumbu to ya bilumbu na ntwala? “Beno vwanda na boma ve! Mu kele Yandi yina vwandaka, Yandi yina kele, mpe ke kwiza. Mu kele ntete mpe nsuka. Mu kele na bafungula ya difelo mpe lufwa kaka awa.” Samu na yinki? “Mu me yala mpe me nunga nyonso zole difelo mpe lufwa (Ya kele nyonso zole ndyamu mpe mafelo; lufwa yawu mosi, mafelo yawu mosi.) samu na beno. Mu me yala yawu nyonso. Mu me yala difelo, lufwa, ndyamu.” Ntangu Yandi vwandaka na ntoto, Yandi vwandaka yina kaka ya ne. . .

248 Bantu mingi basikaka samu na kununga. Beno zaba yawu? Napoléon basikaka samu na kununga yinza, mpe yandi salaka na mvula ya makumi tatu na tatu. Na mvula ya kumi na sambwadi tii mvula ya makumi zole na tanu, Napoléon vwandaka muntu ya misiku, yandi vwanda kwikilaka ve na kunwa to kima mosi. Yandi kwendaka na France. Yandi vwandaka ve muntu ya

France, yandi katukaka na kisanga mosi, yandi kwendaka kuna samu kuvutula yimbi na France samu ti yandi vwandaka zola yawu ve, yandi vwandaka zola ve France. Kasi ba nungaka yandi. Mpe yandi kwendaka mpe yandi nungaka France, mpe yandi bakaka bantu yango ya France mpe nungaka yinza. Mpe na mvula ya makumi tatu na tatu yandi vwandaka na yisi mpe dilaka samu ti ya vwandaka ve na muntu yankaka na kununga, mpe kufwaka kinwe-malafu. Na kuvwandaka ya kununga, yandi lendaka ve kununga yandi mosi. Beno me mona? Mpe kuna kutanaka waterloo ya yandi na Waterloo, yandi kutanaka nsuka ya yandi na Waterloo. Mu kwendaka kuna mpe monaka bidimbu ya ntama ya yina bikanaka mpe bima kuna, na yina beto vwandaka na yinsi yango. Ntangu yayi, beto baka munungi yina, yandi bandaka mutindu ntwenya kasi yandi bakaka lweka ya yimbi samu na kununga, mpe yandi kufwaka, nsoni.

²⁴⁹ Kasi ya vwandaka na ntwenya mosi ya Bakalayina kwizaka na yinza kilumbu mosi. Yandi kufwaka na bamvula makumi tatu na tatu mpe Yandi nungaka nyonso yina zolaka vwanda ya kununga. Ntangu Yandi vwandaka na ntoto Yandi nungaka bansatu, lunangu, Yandi nungaka kimbevo, Yandi nungaka bampeve ya yimbi. Ntangu Yandi kufwaka, Yandi nungaka lufwa. Ntangu Yandi vumbukaka, Yandi nungaka difelo. Yandi mataka mpe nungaka nyonso yina vwanda telemina bumuntu, ya kwendaka na kimanunu ya Nzambi mpe dyataka yawu mpe nungaka lufwa, difelo, ndyamu, kimbevo, kukangama na misiku, nyonso yankaka, mpe yalaka na zulu ya yawu nyonso, mpe vumbukaka na kilumbu ya tatu mpe nungaka ba-atimosfere nyonso ya zulu, mpe zengaka dibungi na kati-kati ya Nzambi mpe muntu, mpe vukisaka Mazulu mpe ntoto kintwadi. Nkembo! Oh, la la! Fiu!

²⁵⁰ Kuna Yandi ke telama Munungi ya Ngolo na manima Yandi kabulaka vwale na zole, Yandi yayi. Mu kele na bafungula nyonso zole ya lufwa mpe difelo ya kulelika na lweka ya Munu, “Beno vwanda na boma ve.” Tentikaka diboko ya Yandi ya bakala (ngolo ya Yandi) na zulu ya yandi, mpe vumbulaka yandi na ngolo ya diboko ya Yandi ya bakala, tubaka, “Kutala boma ve, Mu kele Yandi yina vwanda, mpe Yandi yina kele, mpe yina ke kwiza. Mu kele ya ntete mpe ya nsuka. Mu kele Yandi yina ke zinga, mpe yina kufwaka, mpe kele moyo dyaka tii seko. Amen!” Oh!

Beno tala! Beno tala Munungi ya Ngolo,
 Beno tala! Beno tala Yandi kumonana
 mpwelele,
 Kuna Yandi ke telama, Munungi ya Ngolo,
 Kubanda na ntangu Yandi pasulaka vwale na
 bitini zole.

²⁵¹ Amen! Zengaka konso disakuba ya muntu, samu ti bawu lendaka vwanda ya kuvukana mutindu na nsaba ya Eden.

Ntangu yayi, muntu. . . Mu zolaka kanga yawu, kasi mu ke tuba yawu. Muntu kele ya ngolo nyonso. Beno ke kwikila yawu ve, kasi yandi kele. Muntu yina kele ya kuzungidila na Nzambi kele ya ngolo nyonso. Yandi tubaka ve, na Marc 11:22, “Nyonso bima beno ke tuba, mpe beno ke sala ve ntembe na ntima ya beno, ya ke salama. Beno lenda kuzwa yina beno me tuba?”

²⁵² Yinki ke salamaka ntangu bangolo nyonso zole ke kutanaka? Ntangu Nzambi mpe muntu ke vukanaka, bangolo nyonso zole, kima fwana ningana. Mosi. . . Nyonso yina beno ke tuba na ngolo ya kivangu yina ya yina ya ngolo nyonso ya Nzambi, na kuzabaka ti Yandi silaka yawu, mpe Yandi tubaka yawu na Ndinga ya Yandi, ya ke vangaka ngolo yina ke basika kuna mpe ke nata bima na kusalama, bima yina kele ve, ya ke sala, yawu mutindu ti ya kele, samu ti banglo nyonso zole me kutana. Kuna Yandi me telama! Oh, Yandi kele ve mbote!

²⁵³ Beto mona kana beto ke kuzwa bima mingi ya mbote. Nzila ya 18, ntangu yayi nzila ya 19. Jean; yinki salamaka ntangu yandi monaka kizizi ya Yandi? Wapi ndandu? Yandi kubwaka na makulu ya Yandi; yandi lendaka kaka ve kutelama dyaka, luzingu ya yandi ya kimuntu bebaka, yandi lendaka kaka ve kusala yawu. Yandi vwandaka Munungi, Yandi nungaka yimeni.

²⁵⁴ Ntangu yayi Yandi pesaka lutumu, mpe kuna beto ke kuma na nsuka ya kapu, ya nzila ya 19 yayi:

Sonika bima yina nge me mona, mpe bima yina kele, mpe bima yina ke vwanda na manima;

²⁵⁵ Beto bakaka nzila ya 20:

Dinsweki ya bambwetete sambwadi yina nge monaka na diboko ya munu ya bakala, . . . kele minda sambwadi ya wolo. Bambwetete sambwadi kele bawanzio sambwadi ya mabuundu sambwadi: mpe minda sambwadi yina nge monaka kele mabuundu sambwadi.

²⁵⁶ Oh! Ya ke kanga kupema, nkundi. Beno mona Yandi ya kutelama kuna na bunene. . . bunene ya Bunzambi ya Yandi. Yandi kele Zuzi, Nganga-Nzambi, Ntinu, Ngononi, Mwana-dimeme, Nkosi, Alpha, Omega, Tata, Mwana, Mpeve-Santu; Yandi yina vwandaka, yina kele, mpe yina ke kwiza. Dyataka kikumununu ya ngolo ya Nzambi, mpe zitisaka nyonso, tii Nzambi (Tubaka na kulunsi,) ntangu Yandi vwandaka ya zanguka (Yandi tubaka, “Yimeni.”), sepedisaka Nzambi *mutindu yina*, tii ntangu Mpeve yina boikaka Yandi vutukaka na Paki na suka mpe bakaka Yandi mpe vumbulaka Yandi dyaka samu na lunungu ya beto.

²⁵⁷ Kuna Jean talaka mpe monaka Yandi ya kutelama kuna na makulu ya kisengo, meso mutindu milaka ya tiya vwandaka tambula bisika nyonso na notot. Daniel monaka Yandi bamvula nkama sambwadi na ntuala ya yawu, na kisika mosi, na mutindu mosi, muntu mosi ya kutelama kuna, Kuluntu ya bilumbu, mpe

mosi mutindu Mwana ya muntu yina vukanaka na Yandi, mpe lufundusu nyonso kupesamaka na Yandi, ya kutelama na Kiti ya kitinu ya Mpembe ya Lufundusu.

258 Na kumonaka bima yayi, wapi mutindu ya bantu beto fwana vwanda, bankundi? Nzambi sakumuna beno ya kele kisambu ya munu. Beno me mona? Beno zola Yandi? Beno ke kwikila Yandi? Beno me kangisa mwelo ya beno na Yandi?

259 Beto kulumusa bayintu ya beto kaka mwa ntangu fioti.

260 Kaka na mutindu ya swi mpe ya malembe, na yina beto ke yimba na malembe, *Mu Me Kanga Moyo Ya Munu Na Kiswamunu Ya Kupema*, “Mu ke kuwa dyaka ve makelele ya bakasiba yango kufidisa moyo ya munu ntama, kasi Yawu ke zonza ngemba ya mbote na moyo ya munu.” Na malembe ntangu yayi, na buzitu, muntu nyonso.

Mu me kanga moyo ya munu na kiswamunu ya
kupema,
Mu ke sabuka dyaka ve mubu ya kudasuka;
Kitembo lendaka komba mabulu, na ngolo na
kati,
Na Yesu mu kele ya kukeba ntangu nyonso.

Mu me kanga moyo ya munu na kiswamunu ya
kupema,
Mu ke sabuka dyaka ve mubu ya kudasuka;
Kitembo lendaka komba mabulu, na ngolo na
kati,
Na Yesu mu kele ya kukeba ntangu nyonso.

Lezima na munu, (Bika minzenzi ya Nkembo,
Mfumumu,) Mfumumu, kulezima na munu,
Ti Nsemo ya Yinzo ya nsemo lezima na zulu ya
munu;
Oh, lezima na munu, Mfumumu, lezima na munu,

Beto telemisa maboko ya beto na Yandi.

Ti Nsemo ya Yinzo ya nsemo, kulezima na zulu
ya munu.

Kuvwanda mutindu Yesu, (Inga, Mfumumu.)
kuvwanda mutindu Yesu,
Na zulu ya ntoto mu zola kuvwanda mutindu
Yandi;
Nzyetolo ya luzingu ya munu nyonso na ntoto
tii na Nkembo,
Mu zola vwanda mutindu mosi na Yandi.

. . . O Mvulusi ya mbote,
Na zulu ya ntoto mu zola kuvwanda mutindu
Yandi;

Nzyetolo ya luzingu ya munu nyonso na ntoto
tii na Nkembo,

²⁶¹ Beno ke zola kuzwa Luzingu ya Yandi kuzinga na kati ya beno, na kulakisaka Mvwandulu ya Yandi? Kana beno zola, mpe kana beno me kuzwaka ntete yawu ve, beno zola kutelama samu na kisambu? bantu yina ke zola ti ba bambuka bawu moyo na kisambu. Nzambi sakumuna beno.

Na kidikulu ya Bethlém . . .

Beno vwanda kaka ya kutelama ntangu yayi, beno vwanda kaka.

. . . kwizaka Nzenza, (Beno ke vwanda nzenza na yinza.)

Na zulu ya ntoto mu zola kuvwanda mutindu Yandi;

Nzyetolo ya luzingu ya munu nyonso na ntoto
tii na Nkembo,

Mu ke lombamba kaka na kuvwanda mutindu Yandi.

Kaka kuvwanda mutindu Yesu, kuvwanda mutindu Yesu, (Ya kele nsatu ya munu.)

Na zulu ya ntoto mu zola kaka kuvwanda mutindu Yandi;

Nzyetolo ya luzingu ya munu nyonso na ntoto
tii na Nkembo,

Mu ke lombamba kaka kuvwanda mutindu Yandi.

. . . na lembami, ya kulemvuka mpe na lembami.

²⁶² Ntangu yayi, Tata ya Mazulu, ya kutelama kele mingi yina zola kuzwa Nge. Bawu me lembamba na kuyenga-yenga bisika nyonso, na kuzabaka ve kisika bawu ke na kukwenda, na ngaanda ya nyamba ya luzingu; mpe bawu zaba ti ya lendaka vwanda ntete kilumbu kusuka ntima ke suka na kubula, kuna kasiba ya nene, ke kubwa, na ntwala ya bawu, ya mwela yina ke na kwenda na lweka. Bawu me vwanda mutindu bawu mosi, bawu me vwanda mutindu yinza, kasi bawu zola kuvwanda mutindu Nge ntangu yayi, Mfumu. Yamba bawu na Kimfumu ya Nge, bawu kele baya Nge, Tata, samu ti Nge zaba bantima ya bawu mpe balukanu ya bantima ya bawu. Mpe Nge sonikaka yawu, mpe tubaka yawu na bikoba ya Nge mosi, “Yandi yina ke kuwa Mambu ya Munu, mpe ke kwikila na Yandi yina fidisaka Munu, kele na Luzingu ya Kukonda nsuka.” Nge tubaka mpe, Mfumu, “Ya kusakumuna kele yandi yina ke tanga mpe yandi yina ke kuwa mambu ya profesu ya Buku yayi, samu ti ntangu me belamba.” Bawu me bakula ti ntangu me belamba. Bawu lenda dyaka ve kukwenda na lweka, Mfumu. Losa sauvetage, benda bawu na Nge mosi, Mfumu. Ti bawu kwenda na nkokila yayi, na kulakisaka Nsemo ya Yesu Klisto. Mu me pesa bawu na Nge,

Tata Nzambi, na Nkumbu ya Yesu Klisto. Ti bawu na kulemvuka landa Mfumu na mbotika awa na dibuundu; tula Mpeve-Santu na luzingu ya bawu samu ti ba lenda vwanda mutindu Yesu bilumbu ya bawu yina me bikana. Beto me lomba yawu na Nkumbu ya Yandi.

Kaka kuvwanda mutindu Yesu, kuvwanda mutindu . . .

²⁶³ Bayankaka ya beno nyonso yina kele ya kutelama pene to yina kele ya kuvwanda pene na bantu yango, bayina kele Miklisto, beno luta mpe beno simba diboko ya bawu mpe kupesa bawu mbote. Beno tula diboko ya beno na zulu ya bawu, “Beni kembila Nzambi samu na moyo ya beno.” Bisika nyonso na autel ya beto me fuluka awa na bana mpe bima, beto lenda matisa bawu ve awa.

. . .nzyetolo ya luzingu ya munu nyonso na ntoto tii na Nkembo,
Mu ke lomba kaka na kuvwanda mutindu Yandi.

Lezima na munu, Oh, lezima na mun,
Oh, ti Nsemo ya yinzo ya Nsemo, kulezima na zulu ya munu;
Oh, lezima na munu, Mfumu, lezima na munu,
Ti Nsemo ya Yinzo ya nsemo, kulezima na zulu ya munu.

²⁶⁴ Beno ke kuwa kieleka mbote? Beno ke kuwa mbote ve? Beno kele ve na kyese ti beno kele Muklisto? Beno pesana maboko na muntu yina kele ya kuvwanda pene na beno ntangu yayi, na yina beto ke yimba nkunga, “Beto ke tambula na kati ya nsemo, Nsemo yayi ya kitoko,” Nsemo ya Mfumu Yesu Klisto yina me monisama na nsuni.

Beto ke tambula na kati ya Nsemo, Nsemo mosi ya kitoko mingi,
Beni kwiza kisika ke lezima kinoko ya kyadi;
Ke lezima pene-pene ya beto, kilumbu mpe mpimpa,
Yesu, Nsemo ya yinza.

Beni yimba yawu, beto nyonso!

Beto ke tambula na Nsemo yayi, ya kele Nsemo ya kitoko mingi,
Beni kwiza kisika ke lezima kinoko ya kyadi;
Ke lezima pene-pene ya beto, kilumbu mpe mpimpa,
Yesu, Nsemo ya yinza.

Beno kwiza, beno nyonso basantu ya Nsemo
 beno tuba,
 Yesu, Nsemo ya yinza;
 Kuna bangunga ya Mazulu ke wakana,
 O Yesu, Nsemo ya yinza.

Beno telemisa diboko ya beno ntangu yayi.

Beto ke tambula na kati ya Nsemo yayi, Nsemo
 ya kitoko mingi,
 Beno kwiza kisika ke lezima kinoko ya kyadi;
 Ke lezima pene-pene ya beto, kilumbu mpe
 mpimpa,
 Yesu, Nsemo ya yinza.

Beto ke landila na tambula na Nsemo yayi, Ya
 kele Nsemo mosi ya kitoko mingi,
 Ya ke kwiza kisika ke lezima kinoko ya kyadi;
 Ke lezima kaka pene-pene ya beto, kilumbu
 mpe mpimpa,
 Yesu, Yandi kele Nsemo ya yinza.

Beto ke landila na tambula na Nsemo yayi
 (Nsemo ya Nsangu ya mbote), Nsemo ya
 kitoko mingi,
 Beno kwiza kisika ke lezima kinoko ya kyadi;
 Ke lezima pene-pene ya beto, kilumbu mpe
 mpimpa,
 Yesu, Nsemo ya yinza.

²⁶⁵ Beto vutuka na mbandukulu, na Pantekote ntangu Mpeve-
 Santu kubwaka na zulu ya Dibuundu. Nsangu landilaka tii
 na Smyrne; kuna telamaka Irenée, muntu ya nene ya santu ya
 Nzambi, na kuzonza na bandinga, ngolo ya Nzambi, kuvumbula
 mafwa, kubelusa bambevo, yandi vwandaka tambula na Nsemo.
 Na manima ya yandi me kwiza Colomban, santu ya nene ya ngolo
 ya Nzambi. Mingi ya bayankaka ya basantu ya nene landilaka
 na kunataka Nsangu, tambulaka na Nsemo, Nsemo ya Nsangu
 ya mbote, Nsemo mosi yina lezimaka na Kilumbu ya Pantekote;
 Klisto na kutelamaka na kati-kati ya bantu ya Yandi, mpe minda
 sambwadi ya wolo na kulezimaka nsemo ya Yandi mutindu
 mwini na kati-kati ya tiya ya yawu.

²⁶⁶ Beto bawu yayi na mvula 1961:

Beto ke landila na tambula na Nsemo yayi, Ya
 kele Nsemo mosi ya kitoko mingi,
 Ya ke kwiza kisika ke lezima kinoko ya
 bakyadi;
 Oh, lezima pene-pene ya beto, kilumbu mpe
 mpimpa,
 O, Yesu, Nsemo ya yinza.

Beto telama.

Beto ke landila na tambula na Nsemo yayi, Ya
 kele Nsemo mosi ya kitoko mingi,
 Ya ke kwizaka kisika ke lezima kinoko ya
 kyadi;
 Ke lezima pene-pene ya beto, kilumbu mpe
 mpimpa,
 Yesu, Nsemo ya yinza.

Beno zola Yandi?

Mu zola Yandi, mu zola Yandi,
 Samu ti (kaka samu ti) Yandi zolaka munu
 ntete,
 Mpe futaka mpulusu ya munu
 Na yinti ya Calvaire.

²⁶⁷ Ata mbala mosi dyaka ve na kubaluka na bima ya yinza. Mu kele ya kufwa na yinza mpe yinza kele ya kufwa na munu. Mu ke tambula kaka na Klisto, ya kutwadisa na Mpeve-Santu. Mu zola Yandi samu ti Yandi zola munu, mpe lezimaka balusakumunu ya Yandi na zulu ya munu, na kupesaka munu diboko ya bakala ya kubundana na kati ya Kimfumu ya Yandi. Ntangu yayi beto kele bana ya babakala mpe bana ya bakento ya Nzambi, mpe ya ke monika ntete ve yina beto ke vwanda na nsuka; kasi beto zaba ti beto ke kuzwa nzutu mutindu nzutu ya Yandi mosi ya nkembo, samu ti beto ke mona Yandi mutindu Yandi kele.

Kuna beto ke tambula na Nsemo, Nsemo ya
 kitoko mingi,
 Ya ke kwiza kisika ke lezima kinoko ya
 bakyadi;
 Ke lezima pene-pene ya beto, kilumbu mpe
 mpimpa,
 Yesu, Nsemo ya yinza.

²⁶⁸ Beno zola Yandi? Beno zaba, na manima ya nsangu yina ke lwalisa mpe nyonso, Mu ke zolka kuwa bantu kukota na bankunga mpe kukota na kusambila mpe kuyimba na Mpeve. Ya kele ve na kima ya kulutila kitoko na bankunga ya mbote ya ntama. Ya kele kieleka. Mu zola bankunga ya mutindu ya ntama ya mbote ya bantu ya pantekote; ve bayina bandinga ba me yidika yina ke simbaka tii ba ke looka mpe ke kuma bleu na kizizi, mpe kuzaba yina bawu ke na kuyimbaka. Mu zola muntu yina lendaka na kutala kunata ve kiwisa na banoti kasi dyaka yandi kele na Lusakumunu ya Pantekote, awa yandi ke yimba samu na yawu. Oh, mutindu—mutindu nkembo kele ba-melodie yango ya bankunga ya kulunsi! Oh, la la!

Nkunga ya beto ya kubasika ntangu yayi:

Baka Nkumbu ya Yesu na nge,
 Nge mwana ya mawa mpe ya kiadi;
 Yawu ke pesaka beno kyese mpe kikesa,
 Beno baka Yawu na beno bisika nionso.

Mbasi na nkokila na ngunga ya sambwadi, na ngunga kieleka ya sambwadi, lukutakanu ke banda.

Beto ke fukimina Nkumbu ya Yesu,
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka.

Ti beto nyonso kuyimba ntangu yayi.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka beno kyese mpe kikesa,
Oh, beno baka Yawu bisika nyonso beno ke
kwenda.

Nkumbu ya ntalu, Oh Nkumbu ya mbote!
Kivuvu ya ntoto mpe kyese ya Mazulu;
Nkumbu ya ntalu, Oh Nkumbu ya mbote!
(Wapi mutindu mbote!)
Kivuvu ya ntoto mpe kyese ya Mazulu.

²⁶⁹ Ntangu yayi, beto me manisa yawu na nkokila yayi. Ya . . . ba me yufula kaka munu ntangu yayi, “Kana ya ke vwanda na lukutakanu na suka?” Ve, mbasi ve, beno pema mbote mbasi. Ya lendaka vwanda mbasi na nkokila, ti mu lenda ve kumanisa nsangu, na yawu mu ke baka yawu kilumbu yina ke landa. Ntangu nyonso yina mu ke lenda ve na . . . kumanisa nsangu yayi, mu ke nata yawu kilumbu yina ke landa. Kasi beto me vwandisa yayi, mu banza ti beno me yilama samu na Bansungi ya Dibuundu. Mutindu yina ve?

Mbote mingi, beto kulumusa bayintu ya beto na yina beto ke yimba na malembe ntangu yayi:

Na Nkumbu ya Yesu beto ke fukama, (Ndinga
nyonso ke funguna Yawu.)
Beto ke fukama na makulu ya Yandi,
Samu na kubyadisa Yandi ntinu ya bantinu na
Mazulu,
Ntangu nzietolo ya beto ke suka
Nkumbu ya ntalu, Oh Nkumbu ya mbote!
Kivuvu ya ntoto mpe kyese ya Mazulu;
Nkumbu ya ntalu, Oh Nkumbu ya mbote!
(Mutindu mbote!)
Kivuvu ya ntoto mpe kyese ya Mazulu.



VISION YA PATMOS KNG60-1204E
(The Patmos Vision)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 4 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org